

WANTOK

Niuspepa bilong Papua Niugini stret

25 yia nau

40 pes

Namba 1113

Wik i stat long Fonde, Oktoba 26, 1995

50 toea

Gavana Skate tingting long pasim bia

SAPOS lika ben (pasim bia) i ken kamap long Hailans rijon na daunim lo na oda hevi, watpo na dispela samting i no inap kamap tu long Nesenel Kapital Distrik (NCD).

Sapos lika o bia i wanpela bikpela as bilong lo na oda hevi insait long NCD i wok long kamap moa bikpela, orait wanpela gutpela samting i mas kamap long daunim lo na oda hevi long NCD. Gutpela rot, em long putim kamap lika ben-wankain olsem i kamap long Hailans rijon.

Gavana bilong Nesenel Kapital Distrik, Bill Skate, i mekim ol dispela toktok long aste Trinde, Oktoba 25, taim em i holim wanpela bung wantaim ol Viles Kot majistret

GODFRIED YASSAFAR i raitim

na ol arapela opisal bilong Viles Kot bilong NCD.

Gavana Skate i tokaut long ol Viles Kot opisal bilong NCD olsem em i givim wok pinis long ol opisa bilong em long karim aut wanpela wok sekap. Dispela wok sekap em long sekim ol hevi bia i wok long kamapim insait long NCD.

Em i tok ol opisa i wok long karim aut dispela wok sekap yet. Taim ol i pinisim, ol bai kamapim wanpela ripot na givim i go long em.

Gavana Skate i tokim ol Viles Kot opisal bilong NCD: Taim ol opisa bilong mi pin-

Ol opisa sekap

isim wok na givim mi ripot na mi lukim olsem i gat nid, mi bai holim wokim disisen long putim kamap lika ben insait long NCD.

Em i tok tu olsem: Sampela lida tu i save dring bia tumas na mekim planti pasin nogut.

Mista Skate i tok sapos i gat egens i kamap long lika ben bikos long mani bia i save kamapim, mi bai go het wantaim disisen bilong lika ben. Bikos i gat nid long kamapim dispela samting long daunim lo na oda hevi.

Sapos lika ben i kamap long NCD, Skate i tok, dispela i min olsem olgeta blak-

maket, botol sop na tred stua na bikpela stua i gat laisens long salim bia bai no inap salim bia. Ol hotel tasol na salim bia.

Long luksave bilong NCD Gavana, taim lika ben i kamap long Hailans rijon, lo na oda hevi surik i kamdaun.

Skate i tokaut olsem long nau yet, NCD i no moa wankain olsem bipo. Nau kankain lo na oda hevi wok long kamap. Olsem na em i taim sampela gutpela wok na samting aninit long lo i mas kamap long traim bringim kain gutpela taim bilong bipo i kam bek long NCD.



● Gavana bilong NCD Bill Skate ... ol opisa bai givim ripot bihain long sekap.

Olpela provinsal gavman westim mani

WANPELA ripot bilong Odita Jenerol i tokaut pinis olsem 11-pela provinsal gavman i no bin kamapim gutpela wok bilong yusim na lukautim ol pablik mani stat long 31 Disemba, 1993 i kam inap nau.

Ol dispela provinsal gavman em Sentral, Is Nu Briten, Is Sepik, Enga, Madang, Milen Be, Morobe, Nu Ailan, Not Solomons, Oro, Simbu na Wes Nu Briten Provins.

Ripot i tokaut olsem insait long wanwan provins, i gat ol developmen program bilong wok Sosel, Ikonomiks, Infrastraksa, Komes na Industri. Mani bilong ronim ol dispela wok i kam aninit long ol fans provins o Nesenel Gavman i kamapim. Na long dispela, 63 pesen bilong baset

BETH SOLIAU i raitim

bilong olgeta yia i save kam long Nesenel baset. Dispela em wanpela bikpela helpim i save kam long Nesenel gavman. Tasol wanwan provinsal gavman i ting dispela helpim mani i liklik tumas.

Bikpela hap tru bilong dispela mani em wanwan provinsal gavman i bin yusim long edministresen na ol bikpela (ovahed ekspendisa) wok. Long dispela mani, 47 pesen tasol em ol i bin yusim long wok bilong bringim ol sevis na ol arapela samting i go long ol rurel eria (ol ples).

Ripot i tok dispela ol provins i bin kisim pinis K96 milien long yia 1993. Long dispela mani, K61 milien i makim 60 pesen em

Nesenol Gavman i givim. Na ol dispela 11-pela provinsal gavman yet i yusim K45 milien long ol developmen program bilong ol.

Ripot i tok tu olsem i gat bikpela slek long wok bilong lukautim ol rekot bilong mani. Tasol planti ol dispela provinsal gavman i no bihainim toktok na tingting bilong Odita Jenerol long lukautim na yusim gut mani bilong ol. Sampela ol tingting Odita Jenerol i kamapim pinis long dispela ripot bilong 1993 i olsem:

- Sistem na Intenel Kontrol i slek, i no wok gut na i gat bikpela hevi bai kamap taim ol provinsal gavman i westim nambaut moni,

- I nogat gutpela rekot bilong ol gren na subsidi. I

no bin i gat gutpela akaunting stetmen we i karamapim ol wanwan gren na subsidi bilong K5.7 milien i kam long 9-pela provins, na dispela i makim 22 pesen bilong total gren. Sampela provinsal gavman i no kisim tokorait na bihainim tok bilong edministresen, na wok lukaut bilong ol fan na kirapim wanpela program ol i kolim, Ilektorel Konstituensi Developmen Fan (ECDF). Na i nogat gutpela ripot bilong mani i go olsem wanem.

- I nogat gutpela kes edvensmen rekot na total edvens mani olsem K2.8 milien i bin lus nating na nogat ripot,


- Baset plen bilong ol provins i no gutpela na stret. Mani 5-pela provins i bin lusim i olsem K333,000 na i

abusim tru mak bilong mani ol i bin makim. I no bin gat gutpela rekot bilong mani na planti provins husat i bin putim mani long ol projek na ol bisnis, ripot i soim 6-pela provinsal gavman i bin yusim moa long K5.3 milien. Dispela mani i stap insait long Konsolidated Revenu Akaun (CRA). Planti provinsal gavman i no bin bihainim lo bilong tenda na Ikonomik Akwesisen.

- I nogat inap kontrol long wok sekyuriti na insurens na long wok bilong salim ol aset na propeti we provinsal gavman i bosim,

- Ol bisnis han na arapela liklik wok bisnis bilong planti provinsal gavman i no wok nau bikos ol provinsal gavman yet i save kamap fainensel stetman.

I go moa long pes 2



BAIM WANPELA NIUPELA SUPA KIJANG LONG K13990 TASOL

EM SPESEL BILONG MOSBI NA LAE

RINIM KIANG HOTLAIN...
MOSBI PH 322 9441 • FAX 321 7268 • SCRATCHEY RD. BADILI
LAE PH 427064 • FAX 422463 • MILFORDHAVEN RD. LAE

Ela Motors

EM173

Plis ripot

MOSBI: Pikinini man bilong wanpela biknem pablik seven i kisim bagarap bihain long ol man nogut i sutim em taim em i traim long helpim susa bilong em. Plis i tokaut long dispela long tunde. Ripot i go het long tok olsem dispela mangi nau i go pinis long Ostrelia long wanem ol man nogut i sutim em stret long bros bilong em. Ripot i go het long tok tu olsem ol man nogut i bin repim tu sista bilong dispela mangi. Ripot i tok olsem polis i no nap tokaut long nem bilong dispela femeli long wanem ol i go het yet long wok painim aut bilong ol. Long wankain taim yet ol man nogut i repim wanpela meri long Sabama taim em i bin wokabaut i go bek long haus bilong em wantaim boi fren bilong em. Plis ripot i tok tupela man i soim naip na repim em. Ripot i go het long tok olsem fopela moa man i kam na repim em. Bihainim dispela ripot i go het long tok olsem Divisinol Komanda Sentrol na NCD Asisten Komisina, Philip Taku i givim tok lukaut long ol meri husait i stap long Sabama, Hos kem, Kaugere na Kilakila.

WES NIU BRITEN: Wes Niu Briten Provins i pulap tru long kankain ol gan nogut bilong bagarpaim ol man. Plis ripot i tokaut long dispela bihain long ol polis i bin painim planti bilong dispela ol birua samting bihainim ol wok painim aut bilong ol. Ripot i go het long tok olsem ol plis i painim 20 gan na ol nrapela samting olsem tia-ges greded. Ripot i tok bihainim dispela i bin i gat planti hevi i bin kamap. Long wankain taim yet ripot i tok pasin bilong yusim ol spak brus i wok long go antap moa.

MOSBI: Plis ripot i tokaut olsem plis i holim pinis tripela man husait i bin stap insait long wanpela stil pasin. Ripot i tok olsem plis i holim ol long Mande bihain long ol ronim ol long ka. Polis i tokaut long nem bilong ol olsem Kavoi Eko husait i gat 20 krismas, Augustine Andrew 19 bilong Bereina na Benny Miva bilong Gulf.

Long Mosbi yet ripot i tok tupela man wantaim gan i bin ron i go insait long Renbo sevis stesen na ronowe wantaim sampela mani. Ripot i no aut long hamas mani ol i kisim. Dispela ol man nogut i kisim mani na ronowe long wanpela ka i wetim ol i stap.

Ripot i go het long tok tu olsem plis i holim pinis wanpela man husait i bin ronowe long kalabus. Plis i tokaut long nem bilong dispela man olsem Raphael Komai Kava bilong Tapini long Sentrol provins.

Skate askim ol NCD Viles Kot opisal long wok hat

OL Viles Kot opisal bilong Nesenel Kapital Distrik (NCD) i kisim bikpela askim long wok strong na tu long karim aut wok bilong ol long gutpela na stret-pela rot.

Dispela askim i kam long Gavana bilong NCD Bill Skate.

Gavana Skate i putim dispela askim i go long ol Viles Kot majistret long aste Trinde, Oktoba 25, insait long wanpela bung em i holim wantaim ol.

Long dispela bung, Gavana Skate i tokim ol NCD Viles Kot opisal long karim aut gutpela wok long wanwan komyuniti bilong ol. Astingting em long helpim ol pipel bilong komyuniti.

Tasol Skate i toki klia long ol olsem husat i no karim aut wok long gutpela na stretpela rot o i slek tumas long mekim wok, em bai rausim dispela lain.

Bihainim sampela askim bilong ol sam-

pela taim i go pinis, Gavana Skate i tokaut long ol Viles Kot majistret bai kisim yunifom na medal (bes) bilong ol bilong wok. Em i tokaut tu olsem wanwan Viles Kot eria bai gat nupela komyuniti hal bilong ol majistret na opisal bilong ol long harim kot. Na tu long mekim ol arapela wok bilong ol.

Em i tok tu olsem em bai redim wanpela sabmisen na givim i go long Jastis dipatmen. Na paitim stretim toktok wantaim ol opisa bilong Jastis dipatmen long bringim wok bilong ol majistret i kam daun long lukaut bilong em.

Wanpela bikpela samting Skate i tok em ol Viles Kot opisal i mas kisim skul na trening. Na tu ol i mas kisim skul long save long ol lo we i karamapim na tu kam aninit long wok bilong ol long lukautim komyuniti.

Long sait bilong kisim skul, em i tokaut

olsem namba wan kos bai kamap long Novemba 13 long dispela yia. Long dispela taim, em bai givim wanwan ka i go long wanwan kaunsil gavman-Motu Koitabu, Mosbi Not Is, Mosbi Not Wes na Mosbi Saut.

Long toktok bilong em i go long ol Viles Kot opisal, Mista Skate i askim ol long no ken mekim wantok sistem. Tasol i mas mekim wok long gutpela sindaun, wok-abaut na laipstail bilong komyuniti bilong ol.

Long sait bilong fainensal helpim, Gavana Skate i tokim ol olsem mani bai bihainim namba bilong projek i kamap long wanpela kaunsil gavman. Dispela i min olsem sapos wanpela kaunsil gavman i gat planti projek, em bai kisim moa mani. Na wanem kaunsil gavman i nogat planti projek i kamap, em bai kisim mani bihainim ol projek.



• Lephon: Embasada bilong Denmark Kris Lund-Jensen i bungim Gavana Jeneral Sir Wiwa Korowi longTunde 24 Oktoba long gavman haus.

Olpela provinsal gavman westim mani

i kam long pes 1

Man husat i lukautim wok bilong provinsal gavman, David Unagi i tok dispela ol slek pasin bilong wok i save kamap long olgeta yia.

Em i tok, wok bilong stretim, kontrolim na yusim gut moni i stap long han bilong provinsal gavman. Na ol i mas wok gut na kamapim sampela senis.

Mista Unagi i go het long tok olsem em i lukluk long ol gavana bilong wanwan provins long sanap strong na luksave long dispela wok helpim bilong kamapim ol gutpela ripot bilong mani. Em i tok Odita Jenerol i save salim ol odit ofisa i go long ol wanwan provins na mekim ol odit wok tasol planti taim ol provins i no save salim ol ripot bilong mani kwiktaim na bekim ol askim pepa. Na wok odit i save go isi isi.

Sampela provinsal gavman husat i inap long salim fainensal ripot bilong 1994 1 Mas long Odita Jenerol opis i no mekim yet. Mista Unagi i askim olgeta provins long helpim long daunim kain hevi.

Long daunim dispela hevi bilong odit, Mista Unagi i tok Odita Jenerol i kamapim pinis 6-pela odit sels bilong ol provins. Na em i askim Fainens Dipatmen pinis long givim sampela mani bilong balensim akaun bilong 6-pela provins. Tasol Fainens dipatmen i tok nogat.

Aninit long Ogenik lo bilong Provinsal na Lokol levl gavman, Odita Jenerol i ken sanapim opis long wanwan provins. Bihainim dispela Mista Uagi i toktok strong long Fainens Minista, Chris Haiveta i mas stretim kos bilong kirapim 6-pela odit sel we Odita Jenerol i ken mekim wok bilong em. Mista Unagi i mekim dispela toktok taim em i autim ripot bilong ol provinsal gavman long palamen tupela wik i go pinis.

Nogat man i pusim ol tisa - Taian

SEKETERI Jenerel bilong Papua Niugini Tisa Asosiesen (PNGTA), Moses Taian i tok ol lain bilong em i nogat kros wantaim ol biklain bilong Tisa Sevings na Lons Sosaiti.

Toktok bilong Mista Taian i kamap bihain long jenerel menesa bilog Tisa Sevings na Lons i putim wanpela toksave long ol niuspepa long ol tisa i tingting pastaim long joinim nupela welfea fan. Dispela welfea fan i kamap long tingting bilong Tisa yunien long was long bihain bilong ol tisa na famili bilong ol.

Jenerel menesa bilong Tisa Sevings na Lons Sosaiti, Lalepa Patapu i toksave long ol tisa olsem ol memba bilong yunien i mas tokaut gut long wanem kain helpim i bin kam long dispela fan. Na em i mas soim ol rekot bilong ron bilong ol mani pastaim long ol memba i ken joinim.

Tasol Mista Taian i tok ol lain bilong em i no gat kros na ol i gat laik long wok bung wantaim dispela grup bikos wok bilong welfea fan na Sevings na Lons i bilong helpim ol tisa tasol.

"Mipela i no gat kros na mipela i bilip i no gat as bilong ol man long kalap kalap. Dispela fan i bilong ol tisa tasol", Mista Taian i tok.

Mista Taian i tok moa olsem i gat taim bilong toktok na wok bung wantaim ol lain bilong Sevings na Lons long pinisim ol kain kros olsem.

Em i tok ol tisa yet i mas luksave long wanem kain helpim ol i ken kisim na bihain sapos ol i laik joinim, em laik bilong ol tasol.

WANTOK

All departments Phone 325 2500 - Fax 325 2579
P.O. Box 1982, Boroko, NCD, Papua New Guinea

Published Weekly, Thursday, for
Word Publishing Company Pty. Ltd.
Printed and published by Anna Solomon of Bittern Place, Gordons, at Alotment 2, Section 208, Spring Garden Road, Honiara, for Word Publishing Co. Pty. Ltd.
General Manager and Company Secretary: Ian Fry.
Group Editor in Chief: Anna Solomon.
Editor of Wantok: Leo Wativa
Advertising Manager: James DeLisle
Advertising Deadlines
Display bookings and
Camera ready copy: Tuesday midday
Classified advertising: Wednesday 2pm.
Regional Office:
Suite Haus Tisa, Second Street Lm, P.O. Box 1728, Lae, Morobe Province, Phone/Fax 42 0618, Phone: 42 1562
Regional Manager: Alphonse Pu.
Papers distributed by air throughout PNG.
Available by airmail subscription within Papua New Guinea and overseas.
Australia & New Zealand Representatives:
Tonkin Media Pty Ltd, P.O. Box 101, Avoca Beach NSW, 2251 Australia.
Sydney, James Tokin, (043) 851746, Melbourne, Glen Smith, (03) 8072311.

Ripot tok Aitape papagraun paul long operesen bilong Damansara

FELIX RAMRAM i raitim

OL ples long Sandaun provins we Damansara Timba Kampani long Vanimo bai wok long en i nogat save long gupela na nogut bilong dispela opere- sen bilong kampani ya.

Ol ripot em wanpela komiti ol i kolim Busgraun Komiti Lotu Katolik long Aitape i kirapim aninit long lukaut bilong Jastis na Pis Opis i soim olsem ol pipel i nogat save yet. Long ol bikipela bagarap ol papagraun bai i bungim taim Damansara Kampani i

kirapim wok tru antap long graun bilong ol.

Krai bilong ol ripot i soim klia olsem planti lain pipel husat long ol i no stap insait long operesen eria tu bai kisim bikipela bagarap we ol bus, wara na abus bai bungim hevi. Na dispela i sut long ol wanpisin i sindaun klostu na husat i save kisim sevis bilong bikipela Wara Raihu. Wantaim tu ol wanpisin i sindaun long 4-pela ailan ausait long nambis bilong Aitape.

Ol i toktok kampani ya i no karimaut wanpela awenes kempen long tok klia long ol pipel wanem samting

kampani ya bai i mekim. I gat bilip tu olsem kampani ya i no givim Nesenel Gavman Operesen Plen wantaim Envaironmen na Konsevesen Plen bilong em bipo long em i ken kisim tokorait bilong gavman long go het. Planti samting kampani wantaim liklik lain "papagraun dairek- ta" i gat save long en, ol i haitim na i no tokaut stret long ol narapela papagraun.

Ripot i tok Damansara Fores Prodak Kampani i gat tingting long statim operesen bilong em long het bilong Wara

Raihu. Kampani ya bai katim na rausim olgeta bikipela na liklik diwai, operesen ya ol i kolim "Clear Felling". Dispela i min olsem bai i nogat wanpela diwai samting i sanap antap long graun taim ol i pinisim wok long dispela hap.

Ol pipel bilong ol ailan ausait long Aitape bai kisim bikipela bagarap long graun na doti bilong ol skin diwai bai i pulapim ol rif bilong ol. Na ol ailan pipel bai i painim olsem rif na solwara bilong ol bai i nogat moa pis olsem nau," Busgraun Komiti ripot ya i tokaut.

Komiti i go het na o tok olsem sampela samting tu i no klia tumas long wok tru tu bilong Damansara. Dispela kampani i bilong katim diwai na salim o i bilong planim oil pam o ating tupela wantaim. Sapos ol dispela i tru na Nesenel Gavman wantaim papagraun kampani bilong ol, PAI i mas sindaun ken na skelim ol samting na painim narapela rot bilong kirapim dispela projek.

I mas gat luksave olsem bisnis i wanpela samting bilong em yet na long bagarapim sindaun bilong planti lain pipel i narapela samt-

ing olgeta. Taim planti samting i kisim bagarap, bai i gat planti tokpait bilong baim kompensesen i kamap. Na husat nau bai i sanap strong long baim kompensesen long samting bilong ol pipel i bagarap, Komiti i askim.

"Ol bikipela invesmen olsem St Ignatius Hai Skul, Raihu Haus Sik, Raihu Bris, planti ol liklik bisnis bilong kes krop na tred stua bisnis i stap arere long Wara Raihu bai i go aninit long wara. Taim Wara Raihu i tait na kapsait bikos bai i nogat ol diwai i stapim wara

long tait na ron strong," Busgraun Komiti ripot i tokaut.

Ripot i go het na tokaut olsem ol namel man wantaim ol dairek- ta i kisim fri balus i go kam long Malaysia na Mosbi wantaim planti mani long poket. Tasol ai bilong ol i pas yet bikos dispela ol wok- about na amamas wantaim planti mani i wanpela rot ol bikipela bisnis kampani i save yusim long grisim tasol ol papagraun. Dispela pasin i stap pinis long planti narapela provins na ol Aitape pipel wantaim ol papagraun i mas luksave nau, Komiti i tok.

100 eks sevisman long Ali ailan wetim yet gavman long baim ol

MOA long 100 eks sevisman bilong 4-pela ailan ausait long nambis bilong Aitape long Sandaun provins i gat bikipela wari tru. Dispela em long lukim gavman i baim kompensesen mani bilong ol hariap.

Bikos planti bilong ol i dai pinis na liklik lain i wok long wet longpela taim tumas. Na i laik lukim gavman i givim 'presen' bilong ol bipo long ol i dai. Mausman bilong ol lain husat i mekim wok olsem ol lain bilong karim kago long taim bilong Wol Woa 2, William Bagore bilong Ali ailan i mekim ol dispela toktok i go long Wantok Niuspepa.

William Bagore i tokaut olsem sampela taim long 1989 ol gavman opisa wantaim ol opisa bilong PNG Difens Fos i bin kamap long Aitape. Na ol eks sevisman i bin pilim sampela pepa o fom.

Ol i tok ol bikman bai kisim kompensesen mani bilong ol. Tasol ol i wet nating na i nogat wanpela samting PNG gavman i mekim. Mista Bagore i tok gavman i bin tokaut olsem i gat K13 milien i stap bilong paim ol eks sevisman. Tasol liklik lain tasol i bin kisim kompensesen taim bikipela lain i wok long wetim gavman yet.

Em i tok aut ol lain bilong karim

kago long Alian Seles Ailan, tripela man tasol i bin kisim K500 wanwan. Na sampela bilong ol i wetim gavman long baim ol taim sampela lapun i no kisim presen bilong ol na i dai pinis. Mipela ol lain i stap yet i gat strongpela laik long lukim Sir Julius wantaim gavman bilong em long painim mani na baim mipela hariap. Bikos mipela i no ain na bai stap wetim gavman longpela taim.

"Mipela i bilip olsem bikipela hap bilong dispela K13 milien ol i no baim aut i go long olgeta eks sevisman. Olsem na gavman i no ken painim ol kainkain trik na tok olsem mani i pinis. Mipela long Aitape i wetim gavman winim pinis 6-pela krismas na watpo bai gavman i wok long kusai long mipela moa moa yet," Mista Bagore i tokaut.

Mista Bagore i go hed na tok: "Bikipela samting mipela i luksave tu em ol lain bilong opis i pilaim bikipela wantok sistem. Long taim ol i wok long stretim ol pepa wok bilong paim kompensesen mani i go long ol eks-sevisman bilong Wo. Planti eks-sevisman bilong ol narapela provins, klostu olgeta i kisim pinis kompensesen bilong ol. Taim mipela ol lain i stap long Wes Sepik i no kisim mani bilong mipela yet".

Mausman bilong ol ek sevis-

man ya i tokim Wantok tu olsem em yet i bin autim dispela wari wantaim Sandaun Gavana John Tekwie long las krismas. Na Mista Tekwie i tok em bai painimaut watpo gavman i kisim longpela taim tumas. Na i no baim ol eks sevisman kompesnesen mani bilong ol.

Nau yet nogat wanpela toktok i kam long maus o opis bilong Msita Tekwie long dispela samting.

Ol eks-sevisman ya i gat wari tu olsem sistem bilong ol eks sevisman insait long Papua Niugini i narakain stret i no olsem long Ostrelia, Amerika ba Japan. Bikos long ol dispela kantri, gavman i save lukautim na rispektim gut ol eks sevisman meri bilong ol.

Ol i tok planti taim Nesenel na Provinsel Gavman i save lus tingting long ol dispela lain. Long wanem kain ol bikipela samting o bikipela de bilong kantri. Ol i no save pulim ol eks sevismanmeri i go na stap insait long wanem samting ol i laik kamapim.

Ol i tok bikos long ol dispela lain manmeri husat i givim laip bilong ol long taim bilong Bikipela Pait. Dispela kantri nau i sindaun isi na karim aut wok bilong en. Tasol ol yangpela bilong yedi i no save gat rispek long dispela lain insait long kantri.

DR. WONG'S MARASIN SOP



Sop bilong rausim

- Kaskas
- Skabis skin sua
- Hed Laus

Yusim olgeta de

Askim stoa klostu long yu

Wholesalers: CBChee, Cheong Supermarket, City Pharm, Daru Tdg, Garamut, Hokit, Johnston Pharm, Morobe Pharm, PB Cheung, Price Rite, Rabtrad, SCS Tdg, S & N Tdg, Tangmow, Tropicana, TST.

For Wholesale savings

TOR

100

TORO WANTAIM PORO BILONG EM SPAK NOGUT TRU LONG WANPELA PATI...

PORO DRAIN NA TUPELA ISI ISI IGO LONG HAUS...

TAPIOKA, TAPIOKA HEI, HEI, HE! TAPIOKA, TAPIOKA!



LONG HAP ROT NA ENGIN BILONG KAR I HOT TRU NA SIMUK I KAMAUT LONG FRAN BILONG KAR...

OH SIT! WARA MAS PINIS, YAH! (Chic!) TORO PLUS PULUMAPIM LONG WARA... CHIC!



LONG LONG TORO I KAM AUT NA PULUMAPIM BIA IGO INSAIT LONG ENGIN...

AH! EM I NO NIDIM WARA... CHIC! EM DRINGIM LIKLIK BIA PAS-TAIM...



NAU TUPELA KALAP NA KRUIZ IGO.. INO LONG TAIM NA KAR I RON' LONG LAIK BILONG EM..

HOO!!! KAR YAH I LONG LONG YAH! AYOOO! I LUK OLSEM EM SPAK YAH!! AAEEEE!!!

YU SAVE.. TORO KAPSAITIM BIA LONG ENGIN NA EM SPAK!



WANTOK

NIUSPEPA BILONG OL PAPIA NIUGINI STRET

Tambuim bia long Mosbi

Gavana bilong Nesenel Kapitel Distrik, Bill Skate i tokaut long asde, Trinde Oktoba 25 olsem sapos lika ben o tambu long salim bia i kamap long hailans rijon na daunim lo na oda hevi, watpo na dispela tambu i no inap kamap tu long NCD?

Mista Skate i autim dispela tingting long wanpela bung bilong em wantaim ol viles kot mejistret, na ol arapela bikman bilong viles kot long NCD.

Tru tumas, kainkain raskol pasin i kamap bikpela nau long NCD o Mosbi siti.

Em i tru olsem bia na ol arapela strongpela dring i go pas long ol dispela hevi bilong lo na oda. Mekim na ol gutpela sitisen o pipel bilong Mosbi siti i kisim taim long ol liklik bikhet lain tasol. Askim bilong ol gutpela lain nau em long tambuim bia long sampela taim.

Taim tambu i stap, Mista Skate mas sekap kwik long ol bikpela rot bilong stapim hevi bilong lo na oda long longpela taim bihain. Sampela samting bilong mekim em long daunim namba bilong ol setelmen, rausim ol bikhetman nogat wok go bek long ples, holimpasim ol manki husat em krismas bilong ol i no fit long dring bia, kirapim moa bisnis na wok bilong ol lain i nogat wok, kamapim moa skul bilong ol yangpela manmeri long kisim save, na kampani bilong wokim bia mas go pas long skulim ol pipel long gutpela rot bilong dring bia.

MV Sankamap bai go bek long Bogenvil

VERONICA HATU-TASI

PROVINSAL sip bilong Bogenvil, MV Sankamap bai go bek gen long provins bihain long em i stap long Mosbi long tupela wik. Sip ya i bin kamap long Mosbi long Tunde Oktoba 10 long sata bilong Bogenvil Trengsisenel Gavman (BTG). Dispela em long kisim sampela kago bilong BTG. Antap long dispela, Lloyds Rejista kampani i wok long karimaut sevei wok long sip long sekim olsem olgeta samting long em i stap orait long sip i ron gut.

Kepten bilong sip, Konga Sione i tok sip bai lusim Mosbi long go bek long Buka long dispela wiken, bihain long seveiya bilong Lloyds Rejista, Chris Wong i pinisim ol sevei wok bilong en. Kepten Sione i bilong Motlok Ailan. Na em i namba wan man long stiam dispela sip long 1989, taim ol i kisim nupela tasol i kam long kantri Singapo. Na long las yia gen taim sip i go bek long han bilong ol pipel bilong Bogenvil, em i go bek long keptenim sip bihain long em i pinisim tupela yia notikal skul long Nu Silan.

Pastaim Kepten Sione i joinim MV Sankamap, em bin wok 7-pela yia olsem kepten



• MV Sankamap i wanpela nupela sip long kamap long Mosbi long Tunde.

wantaim Kostel Siping kampani long Rabaul. Orait, long dispela wok sekap we seveiya bilong Lloyds Rejista i karimaut long sip nau, Kepten Sione i tok i kam inap long tude, sevei i soim olsem olgeta samting long sip i stap orait na sip i wok gut tasol. Enjin wel tasol i gat liklik asua. Sekap tes i soim olsem i gat sampela ol liklik hap pipia i go insait long em. Dispela em las tes na sip i wok long wetim risal bilong em tasol.

Long ol arapela wok sekap, Mista Wong i bin sekim ol dua long sip olsem ol i stap gut na wara inap long go

insait, ol ikwipmen bilong stapim paia, ol laip seving rafs an laip bot i stap orait tasol na ol i seif long yusim. MV Sankamap em i sip bilong Bogenvil yet. Olpela Not Solomons provinsal gavman i bin baim sip long mun Ogas, 1989 long taim hevi long ailan i bin kamap pinis.

Em bin baim sip wantaim mani inap long K2 na hap milien long em. Dispela wantaim bikpela astingting long givim sevis i go long ol pipel long ol liklik ailan we balus ino inap go long ol na tu long sampela hap bilong bikples Bogenvil we i hat long

tainim trenspot. Dispela em ol ples olsem Nissan, Katerets, Motlok, Tasman na Nuguria long hap bilong Atols wantaim Buin na Torokina long saut na saut wes bikples Bogenvil.

Orait, long dispela taim MV Sankamap i bin go long lukaut na yus bilong Kostel Siping kampani we i beis long Rabaul. Tasol long Julai las yia (1994), Not Solomons edministresen i kisim bek sip na i putim aninit long nupela menesmen bilong Atols Developmen Faundesen we i stap aninit long lukaut bilong Bogenvil trengsisenel gavman.

Kepten Sione i tok nau MV Sankamap i stap long han bilong ol, ol i wok hat long mekim sip i kamap gutpela olsem tasol pastaim em i go long han bilong Kostel Siping kampani.

Stat long taim sip i go bek long han bilong Bogenvil gavman las yia, ol bin wokim wanpela bikpela sevei o sekap long em long Jun dispela yia long Lae wantaim mani inap long K100,000. Na sekap long nau em i namba tu taim bilong em.

Sip inap long karim 121 pipel. I gat ples bilong slip long 106 pasindia, faopela ekondisen kebin we long wanwan rum i gat foapela bet bilong slip long en. Antap long fiftin pela kru memba husat i wok long sip i gat kepten, sief enjinia, operesens menesa na narapela kuskus husat i wokim ol jenerel pepa wok bilong opis long sip. Kepten na kru em ol bilong ol liklik Atol ailan bilong Bogenvil yet. Sief enjinia tasol, Timai Gidegai i bilong Lae long Morobe provins. Dispela em fes taim bilong MV Sankamap long kam long Mosbi taim Bogenvil gavman i kisim bek sip long Kostel Siping kampani. Tasol long taim Kostel Siping i lukautim, em bin save mekim ol ron i kam long Mosbi long sata tasol.

WANTOK

NIUSPEPA BILONG OL PAPIA NIUGINI STRET

P.O. Box 1982 BOROKO
telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00

Asples Bogenvil pater tokaut long hevi

WANPELA Bogenvil pater i tok pasin nogut i no inap pinisim ol hevi we i kamap nau long Bogenvil ailan. Pater Anthony Nawata bilong Nagovis long saut wes Bogenvil i bin mekim dispela toktok long las

Sarere insait. Dispela em long wanpela lotu long Mosbi we ol Katolik pipel bilong Bogenvil i bin bung long em long pre, na painim rot bilong pinisim ol hevi we i stap long ailan long 6-pela yia i go pinis.

Pater Anthony em dispela pater we ripot i kamap long niuspepa i tok long las mun sampela lain sekuriti fos i bin paitim em nogut long peris bilong em yet long Sovele, saut Bogenvil. Bikos ol i sutim tok long pater ya olsem em i lukautim wanpela yangpela man husat ol i tok em i wanpela BRA paitman.

Long bagarap we ol ami i kamapim taim ol i paitim em, Pater Anthony i bin slip i stap long Vunapope haus sik, Is Nu Briten inap long las wik taim em i orait na i kamap long Mosbi. Pater ya i tok gutpela pasin tasol inap bringim gutpela sindaun i kamap bek long Bogenvil. Em bin tok i gat bikpela nit long senis i kamap long spiritual sit we bai i mekim ol man husat i gat bel kros long pogivim wanpela narapela. Na trupela gutpela sindaun i ken kamap bek long Bogenvil.

Pater ya i bin singaut strong long ol Bogenvil pipel long Mosbi long go long pre strong na ol hevi i ken pinis. Long ol bagarap we em bin kisim long ami, em we ol bin paitim na soa i kamap i stap klia yet.

Kopra bisnis gro long Buka

ALOYSIUS SAMI i raitim

BISNIS wok bilong salim kopra i go strong moa gen long Buka long dispela mun. Menesa bilong Kopra Marketing Bot (CMB) long Buka, Steven Bolam i tokaut olsem ol pipel i wokhat tru long katim planti kopra stat yet long las mun Septemba i kam inap nau. Namba bilong ol bek kopra we ol pipel bilong not wes na Buka distrik i wokim namel long las mun na nau i klostu long 20,000 beg. Hevi bilong dispela i moa long 2,000 metrik ton.

Mista Bolam i tok mak long dispela namba i soim olsem kopra i wok long kam yet na Buka depo i pulap tru gen. Em i tok long las yia CMB i bin baim moa long 11 tausen ton kopra long Buka depo tasol i luk olsem long dispela yia, mak bilong kopra bai i winim mak bilong las yia wantaim samting olsem 200 metrik ton hevi i go antap. Mista Bolam i tok ripot bilong em i soim olsem long las yia CMB i bin tromoi mani inap long K2,500 milien long baim kopra long provins tasol long dispela yia mak long mani i go antap moa.

Long dispela taim, planti ka na trak i lainim Buka CMB depo long salim ol kopra bilong ol. Krismas i kam klostu tu na ol pipel i laikim mani long baim klos bilong lotu o bilong raun. Na tu planti papamama i laik painim mani long baim skul fi long ol pikinini bilong ol neks yia. Mista Bolam i tok moa olsem stat long las mun prais bilong kopra long Buka i go antap gen long K13.00. Na prais bai i go antap yet inap long mun Disemba o inap long taim senis i kamap gen.

Pe bilong hot air kopra long Buka depo i stap olsem K333 long wanpela ton. Pe bilong FMS inap long K323 long wan wan ton na pe bilong smuk kopra inap long K313. Maski tupela sip, wanpela em MV Kaijin na MV Kuanua i bin stap long Buka na karim sampela bek kopra i go aut long provins, wea haus bilong putim ol kopra long Buka bris i pulap tru. Na moa kopra i stap yet bikos ol pipel i bringim yet moa kopra i go long depo. Mista Bolam i tok long neks yia sampela wok bai i kamap long mekim Buka CMB haus bilong putim ol kopra i go bikpela bikos long nau Buka depo i kamapim moa kopra winim planti ol arapela provins long kantri.



NHC Lae rausim ol famili long haus

TONY LUKE i raitim

SAMPELA manmeri long Lae siti i no amamas long wanem samting Nesanel Hausing Kopresen (NHC) i mekim nau long rausim ol long haus. Dispela em ol lain husat i no baim gut bilong ol.

Dispela wik long Mande, sampela bilong ol dispela lain i bung long 7 strit long Lae, na toktok long dispela samting. Ol lain i go pas long dispela kibung em Mista Buza Dala, Mista Anian Dokala na John Watas. Bikos long 7 strit yet, i gat moa long 4-pela simen haus em NHC i laik rausim. Maski ol i stap long ol haus ya moa long 10-pela krismas. Bikos ol haus ya i bilong gavman.

Ol famili husat i stap long simen haus i kirap nogut long las wik taim ol i harim olsem ol i mas bungim kago bilong ol. Na painim nupela hap long stap.

Sampela famili husat i stap long simen haus longpela taim i no amamas tumas. Ol i tok olsem, ol i westim planti mani bilong ol pinis long mentenim haus we ol i stap long en.

Is Sepik tu i ken pulim turis

ELIZABETH LENY i raitim

Turis industri long ol sampela provins i wok long kamap olsem wanpela bikpela rot bilong ol manmeri long kisim mani. Insait long Is Sepik provins, planti ol grasrut pipel i save kisim mani long salim ol samting ol i wokim.

Olsem basket na kaving. Dispela i kamap pinis olsem wanpela bikpela rot we ol i save kisim mani long lukautim ol yet.

Tasol nau yet planti bilong dispela ol pipel i save wet longpela taim bihain long ol i kisim mani long salim ol samting bilong ol long ol turis. Long wanem ol turis i no save go olgeta taim.


Wewak i gat planti gutpela samting we i ken pulim planti turis.

Stat long Wewak yet na i go insait long ol liklik distrik, i gat planti ol gutpela samting. Wewak yet i gat nambis long olgeta kona long wanem em i wanpela kostol taun.

Na sapos yu kisim ka na bihainim rot i go long Wes Kos sait, bai yu painim moa nambis i stap.

Bai yu painim moa gutpela nambis na arapela ol gutpela samting sapos yu kisim bot na yu go outsait long ol ailen.

Dispela ol ailen olsem Kairuru, Musu, na Roboin. Long Kairuru ailan yu ken painim ol samting



● Moses Saki bilong ples Kambagora long Wewak i soim ol kaving em bin wokim.

olsem ol bikpela maunten i gat hul na hot spring wara. Dispela hot spring em hot wara we i save kam antap long graun na i save boil olgeta taim.

Na sapos yu lusim Wewak na yu kisim rot i go long Sepik haiwe, bai yu painim olsem i gat planti ol gutpela wota-fol i stap long Pasam sait. I gat liklik i go inap long bikpela.

Na tu i gat ol gutpela bus na han rot bilong wokabaut insait long bus.

Na sapos yu go moa bai yu painim bikpela Wara Sepik. Insait long dispela eria yet i gat Apa Sepik, midel sepik na Lowa Sepik. Apa sepik em ol lain i stap long Ambunti na i go antap.

Dispela ol lain i gat nem long ol kainkain bilip bilong ol we ol i save bilip olsem ol samting bai kamap nating.

Midel Sepik i stat klostu long Angoram na i go pinis klostu long Ambunti.

Dispela ol lain i gat nem long ol at (basket, kaving, graun pot na planti ol arapela samting) bilong ol. Lowa Sepik i stat long Angoram na i go pinis wantaim solwara. Na Angoram em i edministretiv senta bilong Lowa na midel sepik. Wara Sepik i longpela inap long 1126 kilomit. Ol pipel husat i stap arere long dispela wara i gat planti tumbuna pasin we i go wantaim dispela wara. Ol i save yusim wara long

wokim planti samting. Ol i save yusim wara long go treid wan-taim ol wantokples na narapla ples, ol i save yusim wara olsem wanpela rot bilong ol long kisim kaikai.

Na ol i save yusim wara tu long kisim ol samting bilong wokim haus.

Wara i save helpim ol long kisim ol bikpela pos bilong haus i kam kamap stret long ples.

Wara sepik em i laip bilong dispela ol pipel; bilong ol tumbuna bilong ol na bilong ol.

Tasol nau yet nogat planti pipel insait long Papua Niugini yet i save olsem Wiwek i gat dispela ol gutpela samting.

Long wanem turis industri bilong Papua Niugini em i liklik tru na i wok long groa isi isi tru.

Na tu liklik turis sevis long Wiwek i no nap go het sapos i nogat mani.

Olsem Siaman bilong Turis Bod long Wiwek, Tony Bias i bin tok turis sevis insait long provins i wok long kisim liklik sapot tasol long Papua Niugini Turisim Promosen Atoriti(PNGTPA).

Em i bin toktok long dispela na Satade Indipenden i bin ripotim dispela. Bihainim dispela, wanpela wokman bilong TPA i tokaut olsem gavman i bin tok olsem ol i bai helpim TPA long go het wantaim wanpela program ol i bin askim gavman long helpim. Nau yet ol wet long gavman long helpim ol.

Bogenvil So bai kukim Buka long Desemba 13-17

LEO WAFIWA i raitim

BUKA bai pai alait long Desemba 13 i go inap long namba 17 de. Bikos dispela em taim 1995 Bogenvil So bai kamap, we planti manmeri na pikinini wantaim ol soldia, na plisman bai stap insait long kainkain singsing na pilai long amamas.

Komiti i go pas long redim ol amamas bilong so i kamap pinis. Nau yet komiti salim wanpela pas i go long ol bisnis kampani insait long kantri. Na askim ol long sponsaim dispela so.

Siama bilong komiti em George Lesi. Mista Lesi i tok komiti i gat

bilip olsem moa long 60,000 pipel long ailan bai kamap long dispela so, wantaim ol pipel bilong narapela provins.

Bai gat tu ol stol insait long pilai graun we ol manmeri na bisnis kampani i ken baim na yusim long soim na salim ol samting. Ol lain i laik sponsaim so i ken ring long telipon namba 93-9790 o feks na telipon namba 939798 na askim long Mista Lesi. Yupela ken rait tu long adres: PO Box 267, Buka Passage.

Sapos Mista Lesi i no stap, yupela ken ring long telipon namba 93-9791 o feks na telipon namba 93-9798, na askim long Mista Hillary Laris.

Bulolo Memba brukim K100,000 EDF mani

ARI GUH DANDEE i raitim

MEMBA bilong Bulolo Open Iektoret na Minista bilong Indastrel Rilesens, Samson Napo nau i tokaut olsem em i givim pinis K100,000 EDF mani bilong em i go long ol pipel.

Mani i go long pinisim ol wok em ol bin statim bipo.

Brukim bilong dispela EDF mani i go olsem:


Ol wok long Pararoa, Sapanda, Yokua and Sosaitit rot long Watut bai kisim inap long 60,000; Kobiak bris long Wau i kisim K20,000, namba 8 bris bilong wokabaut long lek long Bulolo i kisim K15,000; na Buang Komyuniti Hol bai kisim K5,000. Mista Napo i tok

olsem dispela moni nau i stap wantaim BMS opis long Lae. Na ol kampani i laik kisim kontrak long mekim ol dispela wok i mas lukim Distrik seketeri bilong Mumeng, Mista Kevengu Senny.

Em i go het tu na tokaut olsem long mun Oktoba o Novemba, ol pipel long Garaina distrik bai kisim narapela K50,000.

GAZELLE RESTORATION AUTHORITY

PROJECT IMPLEMENTATION UNIT



CONTRACT NOS : GRA - 1E-04WB
: GRA - 1E-05WB

Tenders are invited for the Phase One (1) building works for the New Gelagela and Sikut Community Schools at Gelagela and Sikut Resettlement Areas respectively, in the East New Britain province.

The projects are under the Gazelle Restoration Programme and are funded by the World Bank Loan 3290.

The work for the projects comprise.

GRA-1E-04WB - Construction and completion of 2 x double classroom blocks, 1 x staffroom and library block, 1x3 bedroom house, 2 x 2 bedroom houses, 2 x single pit toilets and 3 x double pit toilets at Gelagela Resettlement Area, and;

GRA-1E-05WB - Construction and completion of 2 double classroom blocks, 1 x staffroom and library block, 1 x 3 bedroom house, 2 x 2 bedroom houses, 2 x single pit toilets, and 3 x double pit toilet at Sikut Resettlement Area.

There is a charge of K60.00 non - refundable for each contract document. Application for the documents must be accompanied by a cheque or bankers draft made payable to:

Department of East New Britain
Revenue Office, Kokopo
Vote: 604-15

Tender documents are available from:

The Provincial Works Co-ordinator
Department of East New Britain
PO Box 714
VUNADIDIR ENBP

The time and date for returning tenders to the above address is 12.00pm on Friday November 17 1995.

Envelopes containing tender documents must bear the contact number and closing date of tender.

AUTHORISED BY:

ELLISON KAIVOVO OBE
Manager - PIU

TU MINIT TINGTING SAKRIFAIS

INAP long sampela yia nau long sampela hap bilong PNG i gat planti toktok long mekim sakrifais. Ol lotu grup ya i min mekim wanpela bikpela samting, olsem prea long "6 tu 6" o kain bikpela samting olsem. Na long neks de ol i bagarap olgeta na ol i no inap wok na lukautim famili bilong ol. Na planti taim ol i mekim kain bikpela samting bikos ol i laik kisim spesel samting long God. I osem, ol i givim pen long ol, bai God i ken marimari na inapim laik bilong ol.


Dispela kain aidia i orait, tasol ating em i aidia bilong ol man nating na i no aidia tru bilong God. I tru, i gat wanpela stori long Olpela Testamen we God i bin askim Abraham long kilim indai pikinini bilong em Aisak olsem sakrifais. (Lukim enesis sapta 12). Tasol long las minit God i no larim Abraham i tekewe laip bilong liklik boi God i bin traim bilip bilong Abraham tasol.

Na long Nupela Testament yumi gat bikpela stori bilong pen na dai bilong Jisas; we em i givim laip bilong em bilong baim bek yumi. Long dispela taim em inapim tasol

dispela tok bilong em: "bikpela ofa tru em i dispela: yu givim laip bilong yu bilong helpim narapela man." (Jon 15: 13) Tasol em i no bin askim yumi wan wan long go na mekim bikpela wok olsem. Nogat. Jisas i gat narapela kain aidia bilong sakrifais. Long Matyu 9:13 em i bin tok olsem: "Mi laikim pasin belgut na i no sakrifais."

Em i min olsem: wanpela gutpela we tru bilong ofaim sakrifais em i long go mekim gut long olgeta manmeri. Em i min, yu daunim laik bilong yu, na yu mekim gut long famili bilong yu, long papamama na pikinini, long ol wanskul, long ol wanwok, long ol sikman, long ol lapun na han lek nogut. Daunim pasin les bilong yu, na taitim bun long wok bilong yu. Maski long mekim wok hap hap. Mekim tru.

Sakrifais em i min yu givim wanpela samting bilong yu long narapela man o meri. Yu serim save bilong yu, na strong bilong yu, na



FRANK MIHALIC i raitim

taim bilong yu, na moni bilong yu. Yu bihainim tok bilong bosman o tisa; yu givim yau long narapela bai em i ken autim wari. Ol dispela samting i kam aninit long biknem sakrifais, bikos hap bilong yu i stap insait long ol, na ol i kostim

long sampela yu sakrifais na yu givim wanpela samting, yu mas pilim liklik pen.

Yumi save long Baibel stori bilong moniman i troimoim bikpela moni bras long bokis ofa bilong tempel ... Olgeta manmeri nabaut ol inap harim pairap bilong planti moni ya, na ating ol i bin tingting na toktok amamas long dispela so-op risman. Ating ol aposel tu i kalap nogut long harim. Tasol Jisas i stiaim het bilong ol long lukim wanpela rabis meri i troimoim wan toea tasol long bokis moni. Na Jisas i litimapim nem bilong dispela meri. Watpo? Bikos moniman ya em i gat planti moni i stap bek long haus bilong em yet. Em i no pilim liklik pen long givim sampela long God. Tasol dispela meri i bin givim olgeta moni bilong em. Em nau i pilim bikpela pen tru. Em i mekim ofa tru, sakrifais tru.

Namba wan we bilong wokim sakrifais em i long bihainim stret tok bilong Jisas: "Sapos yu laik bihainim mi, yu mas daunim laik

bilong yu na karim diwai kros bilong yu." (Mat 16:24) Em ya i samting bilong mekim long olgeta de, na planti taim yumi mekim long ples hait. Dispela kain sakrifais em i samting tru. I no gat liklik hambak i hait insait long en. Em i no wet bai man i mas lukim em.

Karim diwai kros bilong yumi em i sakrifais tru, long wanem, oltaim em i givim pen. Sampela taim em i givim pen long skin bilong yumi; tasol olgeta taim em i givim pen long laik bilong yumi. Em i no isi long smail oltaim, na karim gut pen, na karim sik, na harim tok, na sakim laik bilong bodi, na mekim gut long manmeri nogut, na brukim het long skul, na tambu long gim smok na long buai na long bia.

Man o meri ting long sakrifais, em i no mas driman long wanpela bikpela samting. Nogut. Em i mas bihainim tok bilong Jisas na karim gut olgeta de dispela ol liklik diwai kros i save kam long han bilong God. Sapos em i mekim olsem, em i bihainim gut tingting bilong Jisas long sakrifais ... na i no tingting bilong ol man nating.

Kanin pipel long Finsafen gat nupela haus lotu nau

GISUWAT SINIWIN i raitim

OL pipel bilong ples Kanin long Finsafen eria bilong Morobe provins i gat nupela haus lotu nau.

Luteran sios i bin opim wanpela Marimari haus lotu long hap long Septemba 30, we moa long 3,000 manmeri na pikinini i kamap na lukim.

Ol bikman olsem Memba bilong Kabwum Ginson Sounu, sampela ol bikman bilong Morobe provinsal gavman olsem Provinsal Afeas seketeri Mista Gorgonu, bikman bilong Redio Morobe, Tikarin Meruk wantaim tu ol arapela bikman bilong sios na komyuniti long ol wanwan seket long provins i bin stap long amamasim dispela bikpela de.

Em bin kos moa long K24,000 long sanapim dispela haus lotu. Wok bilong haus lotu ya i bin stat yet long mun Mas 1991.

Long dispela taim, sios komyuniti i bin stat long bungim mani long mekim wok bilong baim ol samting long sanapim haus lotu bilding ya. Wan wan sios memba i wok long bungim mani na tu ol i painim ol narapela rof long kamapim mani we bai i karamapim taget mak bilong ol.

Long Disemba 1993, ol i brukim

graun na statim tru wok wantaim K14,000.

Na wok i bin pinis long Me 20 bilong dispela yia.

Long opim sios bilding ya, ol bin wokim bikpela kaikai tru long amamasim sanap bilong sios we long hatwok bilong ol memba ya i kamap bihain long foapela yia.

Ol bin kilim 120 pik, wantaim 13 kau na bringim tu ol arapela kain kaikai bilong stoa na gaden long dispela de.

Long makim Bisop Getake Gam bilong Luteran Sios husat long dispela taim i stap long Ostrelia, Pasto Sokekai i bin go pas long opim dispela haus lotu.

Bihain long opening bilong sios, ol bin karimaut planti ol baptismo, marit na givim fes komunio tu long ol dispela lain husat i bin gat laik long kisim ol sakramen ya.

Ol yut bilong Gain peris i bin lukautim sekyuiriti long ol manmeri na pikinini husat i bin stap long tripela de amamas long selebretim opening bilong nupela haus lotu.

Ol pipel bilong tripela pies olsem Magong, Gain, Sirabo, Sadau, Sosomang, Gufin, Yong na Mumng i bin mekim wok long lukautim ol man wantaim ples bilong slip na kaikai long dispela de.



• Poto i soim nupela haus lotu ya we i kos long K24,000 long sanapim.

Katolic sios amamasim Wol Misin Sande

LAs wik long Sande Oktoba 22, olgeta Katolik peris long kantri i bin amamasim Wol Misin Sande. Dispela amamas i no kamap long Papua Niugini. Katolik sios long olgeta hap bilong graun i amamasim dispela Sande.

Ol arapela kristen sios tu i gat wankain kastam na dispela i bilong promotim aweanes long ol kongrikesen bilong ol long karimaut tok bilong God i go long olgeta hap bilong wol.

"Misin Sande em taim bilong askim God long givim bikpela laik long ol man long ol bai i karimaut wok bilong

evanjelaisesen. Long dispela taim, em i moa gut long yumi i givim bikpela tingting long ol manmeri na pikinini husat i kisim taim nogut bikos i gat pait, trabel, no laikim wanpela arapela bikos long kala bilong skin, lotu, politikel bilip na tu dispela ol lain husat i no moa givim bikpela tingting long trupela mining bilong laip," hetman bilong Katolik Sios long wol, Pop John Paul i bin tok.

Long wanpela pas bilong ol Katolik Bisop long PNG, ol i tok yumi no ol kristen bilong yumi wan wan yet. Holi Spirit i singautim yumi long karimaut wok bilong evanjelaisesen.

Na long dispela Sande long olgeta yia, yumi save givim tok tenkyu i go long God long yumi wantaim ol pikinini na ol yangpela pipel i kisim evanjelaisesen long komyuniti, kantri na tu ausait long kantri.

Ol bisop i tok tu olsem i gutpela moa sapos olgeta man husat i kisim baptais i karimaut ol wok bilong pasin kristen long olgeta hap bilong komyuniti.

Askim i go long ol wan an kristen manmeri long soim olsem ol i trupela kristen pasin insait long famili na ples bilong wok.

Moa long 500 Luteran yut bung long Lae

bilong Evanjelikel Luteran Sios bilong Papua Niugini (ELC-PNG) i bin bung long Kote Memoriel haus lotu long Anta kompaun, Lae.

Dispela bung lotu i bin kamap long Septemba 3, wantaim astingting bilong bungim wantaim ol yangpela bilong ol wanwan sios yut grup long luksave long ol yet. Na tu bilong wok bung wantaim long karim na strongim ol wok bilong yut insait long sios.

Moa long 500 manmeri na pikinini husat i memba bilong ol grup olsem Wemo Yut Ministri, Yasare yet, Bel Isi yut, Dedva yut, Anis 1 na 2 yut, Biliai na Yamai yut

VERONIC A HATUTASI i raitim bin stap long dispela bung. Wewo yut grup i bin go pas long dispela bung.

Planti ol kain kain samting i bin kamap long dispela bung we ol yut yet wantaim ol papamama bilong ol i bin putim kamap.

Planti ol kain kain samting i bin kamap long dispela bung we ol yut yet

bilong ol i bin putim kamap. Em long pilai drama, ol singsing, tambuna pilai na ol kainkain danis.

Eric Neong man husat i bin go pas long rereim na kamapim dispela bung i tok moa long kain bung olsem i mas kamap long daunim pasin bilong wok resis, brukim lain na tu helpim long daunim ol wok kriminel insait long komyuniti na kantri.

Mista Neong i tok em i tingting long kamapigen wankain bung olsem long dispela mun. Olsem na em i askim ol papamama, ol yut na ol Sande skul pikinini long givim sapot na helpim em long dispela bung.

Ali ailan bai bungim 2,000 Katolik long opim Santu Antoni haus lotu

Sen Mary's Katolik Ligin bung long strongim wok bilong helpim pipel

FELIX RAMRAM | raitim

I GAT luksave olsem moa long 2,000 Katolik manmeri na pikinini, ol pater na sista na ol arapela visita bai kamap long Ali Ailan long Desemba 25, 1995 long dispela yia. Dispela em long bikpela de bilong opim nupela simen haus lotu bilong Santu Antoni peris long ailan.

Haus lotu ya i kism ol Katolik long Ali Ailan klostu 6-pela krismas olgeta long wokim.

Wanpela i no inap bilip olsem ol manmeri na pikinini nating long wanpela ples olsem Ali Ailan insait long Aitape, Sandaun provins inap long wokim dispela haus. Na antap long en, i nogat wanpela kapenta man husat i gat setifiket bilong wokim ol haus i sanap baksait long ol Katolik bilong ailan long kirapim, wokim na pinisim nau dispela bikpela na naispela haus lotu. Dispela haus lotu sapos yu lukim i fit nating, na ol kain haus olsem wanpela i mas painim long ol bikpela taun tasol. Tupela kamdaman husat i go pas long ol Katolik long Ali long wokim dispela nupela haus lotu em John Pitau na Pius

Apo.

Pius Apo i tokim *Wantok* olsem wokim bilong dispela nupela haus lotu i bihainim tingting bilong holim yet olpela haus lotu bilong Santu Antoni i stap klostu long nupela nau ol i kirapim i stap. Tupela grup i toktok pait long holim yet olpela na long kirapim nupela haus lotu.

"Grup mi stap long en i sanap strong long tingting bilong kirapim nupela haus lotu. Bikos bai i kos bikpela mani long holim yet na stretim olpela haus lotu long olgeta krismas. Antap long dispela, olpela haus lotu i wok long go liklik long spes taim namba bilong Katolik long ailan i wok long go bikpela.

"Dispela tingting i kamap strong long taim mi kam kism lip bilong mi long ples. Mi save wok long Madang na mi kam long ples 5-pela krismas i go pinis. Na mi no go bek ken long wok bilong mi. Bikos pipel i laikim mi long stap na helpim papa John long wokim dispela nupela haus lotu", Mista Apo i tok.

Mista Apo i tok ol Katolik i stat long pulim mani insait long ol yet. Na tu ol i makim ol lain long helpim Mista Pitau na emi yet long putim ol mak long graun na statim bilong dispela nupela haus lotu. Wanpela

bikpela samting ol i kamapim tingting long en, em long wokim dispela haus olgeta.

Long simen na timba wantaim liklik ain long frem bilong holim het bilong bilding yet. Mista Apo i tok John Pitau i go pas olsem fomen bilong wokim haus lotu ya, taim em i go pas olsem supavaisa. Na ol wokman bilong tupela em ol yangpela man bilong ailan yet husat long ol i grasrut lain bilong ples. Olgeta wantaim i nogat wanpela gutpela save long wokim kain haus olsem wanem samting ol i kirapim nau i sanap i stap. Em i tok tu olsem em yet i no save bai haus lotu ya i luk olsem wanem long pinis bilong en.

"Tasol mi mas litimapim nem bilong God bilong yumi long givim papa John dispela save na strongpela tingting long kirapim haus biong em. Mi bilip tru olsem Bikpela i stap wantaim mipela na i wok long yusim papa John long wanem lukluk bilong dispela nupela Haus lotu. Bikpela samting em i nogat tru wanpela woking plen bilong dispela haus lotu mipela i putim long pepa. Na mipela i lukim na wokim, nogat tru. Wanem ol samting i stap long dispela nupela Santu Antoni Haus Lotu i kamap tasol long tingting

bilong papa John.

"Em bai i tokim mi na mitupela i stori long en, na bihain putim i go long eksen. Na lewa bilong mi i krai long lukim dispela Haus bilong God klostu i pinis nau. Na lewa bilong mi krai long lukim dispela Haus bilong God klostu i pinis nau. Na long krismas de stret long Desemba 25, mipela i makim long opim nupela Santu Antoni Sios long Ali Ailan.

"Mi bilip bai planti katolik manmeri na pikinini wantaim ol pater na sista. Mipela tu bai i askim ol bikman bilong gavman na ol komyuniti lida insait na arasait long provins long kamap. Na stap wantaim mipela long de bilong opim dispela nupela haus lotu bilong mipela", Pius Apo i tokim *Wantok*.

Mista Apo i go het na i tokaut olsem kos bilong ol samting ol i yusim long kirapim dispela haus lotu i abrusim pinis K30,000 na ron i go antap moa yet. Bikpela bilong dispela mani wantaim wok i kam long ol pipel yet bilong Ali Ailan.

Haus Lotu ya ol i wokim long simen (flea), brik wol na het bilong haus ol i karamapim long tails ol yet i wokim. Namba bilong tails ol i putim antap long haus lotu ya em 5,000 olgeta.

LAS wik long Trinde Oktoha 18, ol Sen Mary's Katolik Ligin bilong Mary i bin holim wanpela bung bilong ol long Sen Mary's Hol. Dispela bung i bin kamap we ol memba i bin tokaut na mekim gen promis bilong ol long bihainim lo bilong sios, na tu long mekim gut wok bilong Ligin.

Ligin o ami bilong Mary em i wanpela grup insait long Katolik sios yet we i save mekim ol lotu bilong honarim Santu Maria, husat i Kwin bilong Heven. Dispela grup i bin stat long 27 de bilong mun Januari, 1991 bihain long tokorait i kam long haus bilong Bisop Henry Van na olpela peris pater, Michael Steecy.

Ligin bilong Mary i gat man na meri we i stap memba. I bin gat tupela man na 6-pela meri tasol taim dispela grup bin stat nupela. Dispela grup i bin stat isi isi na nau em i kamap bikpela namel long planti Katolik sios insait long Lae siti.

Misis Josephine Ilavie, husat em kodineta bilong Sen Mary's Ligin bilong Mary, na tu presiden bilong olgeta Ligin grup insait long Morobe provins, i bin tok olsem Ligin bilong Mary i mas kamap olsem bikpela wok insait long Katolik sios. Dispela em ol kain wok bilong go long haus sik long serim tok bilong God na prea wantaim ol sik pipel, givim gutpela tingting long ol Katolik sios memba husat i lusim lotu longpela taim pinis, na helpim long stretim hevi bilong ol marit we i laik bruk o bin bruk.

WEWAK SPESEL!


TOYOTA HIACE BUS

Baim wanpela bren nu Toyota Hiace 15 sita bas long Ela Motors Wewak namel long 9 Oktoba na 31 Desemba 1995, long dispela spesel draiv i go praos na yu inap kism wanpela Fri Yamaha Jenereita...

Em i fri. Hariap, noken misaut!



YAMAHA
Marine
ET500
JENEREITA



Spesel Ofa!

K28,995

DRAIV I GO PRAIS!

Hariap nogut stok pinis!



TOYOTA
Wils Bilong Olgetahap!

ELA MOTORS WEWAK
PH 862072 KEITH REICK - BRENS MENESA
PH 862255 JACK MATHAW - SELS MENESA
FAX 862252 P.O. BOX 778, WEWAK,
EAST SEPIK PROVINCE.



Ela Motors
BPT (PNG) LTD.
WEWAK

Sandaun asembli rausim vot nogat bilip long Gavana Tekwie

STAN RANGA i raitim

LAS wik kuskus bilong Sandaun provinsel asembli i rausim wanpela petisen pas i karim tingting bilong sampela memba bilong asembli long traim muvim wanpela vot i nogat bilip long Sandaun Gavana, Mista John Tekwie.

Olpela Sandaun Primia na Deputi Gavana, Pien Aloitch wantaim sampela memba i raitim na sanim wanpela petisen pas long las wik Fraide long askim gavana long holim wanpela spesel kibung long Oktoha 27.

Dispela bai i ken larim ol long muvim dispela vot i nogat bilip long Mista Tekwie.

Petisen ya i no tokaut stret long wanem as na ol i laik mekim dispela. Tasol sampela ripot i tok sampela memba bilong asembli i no wanbel long pasin Gavana Tekwie i mekim long Rivium 1995 Provinsel baset o moni plen bilong provins:

Na K100,000 em i givim i go long komiti husat i ogenaisim 20 indipendens selebren long provins, wea i nogat toksave.

Opis bilong kuskus bilong asembli, Simon Melendu i rausim dispela petisen pas bikos i gat planti tok egensim dispela tingting bilong vot i nogat bilip long gavana. Planti bikman na saveman bilong Sandaun i no laikim tru dispela samting.

Bikos ol i tok planti taim gavman i wok long pilai politik na i no sevim gut ol pipel. Dispela samting tasol i wok long stapim wok developmen insait long Sandaun provins long planti yia na i nogat gutpela kaikai.

Wanpela as tu bikos opis bilong gavana i no kisim kopi bilong dispela petisen long bot i nogat bilip.

Tasol opis bilong Mista Tekwie long

Vanimo i bekim toktok olsem gavana Tekwie i wari long bikpela wok developmen i mas kamap long provins.

Na i no wari long dispela vot i nogat bilip. Mista Tekwie i tok dispela em ol giaman politik taosl we i laik bagarapim na stapim developmen insait long Sandaun.

Em i tok sampela memba bilong asembli i laik pilai politik tasol long redim ol yet long 1997 ileksen. Olsem na i laik mekim dispela samting.

Nau yet wanpela bikman bilong Sandaun, Ignas Aro i singautim ol provinsal na nesanel politisian bilong provins long noken pilai politik. Na traim bringim gutpela wok kamap insait long provins.

Mista Aro i tok ol pipel bilong Sandaun i gat bikpela bilip long gavana Tekwie.

Husat i bagarapim Striklen?



Tingim. Namba wan wok bilong ol kampani i bilong wokim bikpela winmani. Na sapos i gat sampela banis i pasim ol long mekim wok bilong ol, ol bai painim kainkain rot long rausim ol dispela banis. Long 1992, mipela harim olsem sampela bagarap bin kamap long Kopiago, bikos ol yusim wara long hap. Sampela pipia bilong PJV i save go long Kopiago tu.

Bihain long ol dispela, sampela bagarap bin kamap long Kopiago, bikos ol yusim wara long hap. Sampela pipia bilong PJV i save go long Kopiago tu. Bihain long ol dispela, sampela lain bilong gavman na PJV i bin go lukluk raun long ol ples we ol dispela bagarap i bin kamap. PJV i tok olsem ol dispela bagarap i mas kamap long ol arapela samting na i no long ol pipia bilong main.

Gavman tu i bin tok olsem ol i amamas long wok bilong PJV. Tasol bilong wanem na gavman i no mekim wanpela wok painimaut long luksave na tokaut long wanem as tru na ol dispela bagarap i kamap. Ating sapos ol i mekim wok painimaut, bai ol i tokaut long as tru bilong ol dispela bagarap olsem na ol i no wokim. Ol pipel bilong Striklen i autim nau ol wankain hevi em ol pipel bilong Kopiago i bin autim bipo. Na wanem samting bai kamap bihain? Dispela stori em i wankain olsem ol pipel bilong Flai riva na bagarap em Ok Tedi main i wokim long hap. Olgeta lain husat i bin lukim 60 minit TV progrem las wik i lukim pinis. Bus na wara i bagarap olgeta.

Na wanem sapos sampela pipel i dai, Mista Uari bai mekim wankain bekim o wanem? Em i mas tokim yumi nau. Na yumi mas luksave olsem Striklen em i wanpela han wara bilong Flai Riva. Mi tok las wik olsem olgeta main husat i wok nau long Papua Niugini i nogat wanpela plen bilong putim gut ol pipia bilong ol. Ol bai troma pipia bilong ol long wara na solwara. Ol asples Nomad i bin go lukim ol bikman bilong PJV na tokim ol long noken tromoi ol pipia long Striklen. PJV i bin bekim olsem gavman bilong PNG i bin givim ol tokorait long wokim dispela pasin. Sir Julius Chan, i luk olsem yu na gavman bilong yu i no laikim moa ol pipel bilong PNG. Yupela egensim ol asples long Ok Tedi na i luk olsem nau bai yupela egensim ol asples pipel long Pogera. Na yupela bai mekim wanem long Misima, Wopulu, Tolukuma na Lihir?

LAS wik mi bin stap long Momad distrik long Westen provins. Mi bin go long hap bikos mi harim olsem sampela bagarap i bin kamap long Striklen Riva. Na ol pipel i wok long askim long as bilong dispela bagarap. Ol i tok olsem, ol pis na pukpuk long wara i wok long dai nating. Ol diwai na ol arapela samting arere long wara i wok long dai nating, na ol i kisim ol kainkain sua long bodi bilong ol. Taim mi stap long hap, ol asples i tokim mi tu olsem gras long het bilong tupela man i pundaun nating na tupela i bin kela olgeta.

Pastaim, taim ol dispela bagarap i kamap long wara, ol asples i bin tok olsem, "I mas ol tumbuna biang ol i kros long ol na i bagarapim wara." Bihain ol i go lukim kiap na kiap toksave long ol long ol arapela as. Na em i bin askim ol bos bilong em long painimaut as bilong ol dispela hevi. Kiap i raitim pas i go tu long Porgera Joint Venture (PJV) main. Ol wokman bilong PJV i bin kam na mekim wok painimaut na tokim ol pipel bilong Striklen olsem i nogat wanpela samting i rong long wara. Tasol bihain long ol dispela wok painimaut bilong PJV, ol asples i wok long painim olsem ol wankain hevi i stap yet. Mi harim tu olsem PJV i save troma olgeta pipia bilong main i go insait long Striklen Riva. Ol dispela pipia gat ol sampela strongpela marasin em PJV i save yusim taim ol i rausim gol long graun. Na PJV i tok olsem ol i save putim sampela arapela marasin insait long ol dispela pipia long rausim nogut bilong ol dispela strongpela marasin, bihain ol i putim go insait long Striklen Riva. Tasol husat tru i ken sekim ol dispela toktok bilong ol. Ol wokman bilong PJV i no inap tokaut sapos sampela bagarap i kamap. Nogut ol bai pinis long wok.

Vanimo Fores bai wokim 60 haus slip bilong ol wokman

FELIX RAMRAM i raitim

SAPOS ol wok i gut gut, bai 60 nupela haus bilong Vanimo Fores Prodak i kamap long dispela yia o long neks yia. Taunsil kampani bai mekim dispela wok.

Jenerel Seketeri bilong Sandaun Timba Wokas Yunien, Jerry Kina i tokaut olsem dispela em i wanpela agenda em planti taim ol wokman na eksekutiv bilong bipo na nau i save toktok long en. Tasol ol bosman bilong kampani i no save luksave long hevi bilong wanwan famili man husat long ol i wokman bilong tupela bikpela kampani, nau i wok long katim na salim ol diwai insait long Sandaun provins. Tupela kampani ya em Vanimo Fores Prodaks na WTK Realty bilong Malasia.

Mista Kina i tok long taim em i kisim wok olsem jenerel seketeri bilong yunien, em i raitim pinis leta moa long 5-pela taim i go long gavman bilong provins, na tu holim toktok wantaim ol bikman bilong Alotich Lakarengim gavman, tasol ol toktok bilong em i pundaun long ol 'ia pas na maupas' lain.

Em i tok wanem samting em i mekim i bihainim tasol ol toktok na belhevi bilong olpela eksekutiv aninit long lukaut bilong Mathias Kenuangi. Dispela em long lukim olsem VFP i kirapim ol gutpela haus, bikpela samting em ol nupela haus long senisim ol haus nau i stap long Wesdeco Kompaun husat long ol i winim 30 krismas, em i tok.

Em i tok planti long ol haus nau i stap long Wesdeco kompaun em ol haus bilong Goldore Timba kampani bilong Nu Silan. Planti long ol dispela haus i olpela tru winim 30 krismas.

Kampani bilong bipo na bilong nau i kusai tasol long senisim wanpela o tupela hap palang na pos long ol haus. Antap long en ol i penim nupela pen long mekim haus i luk nupela.

"Ol hatwok bilong mi wantaim Mista Kenuangi i lus nating, taim gavman bilong Aloitch/Lakurengim i kisim opis. Mi no klia, ol i wokim sampela samting wantaim menesmen bilong VFP na WTK Realty o nogat. Bikos mi no kisim wanpela bekim i kam long hatwok bilong mi.

"Taim dispela nupela senis bilong provinsel gavman i kamap, mi lukim olsem bai mi kisim sampela helpim long en. Na mi no westim taim, mi raitim wanpela pas ken na salim hariap tru long Sandaun Gavana. Em i singautim mi go long opis bilong em na i tokim mi olsem kampani bai kirapim 60 haus slip bilong ol wokman bilong kampani. Nau bai VFP na WTK Realty bai i kirapim ol dispela haus long wokman bilong kampani", Jerry Kina i tokaut long Wantok.

Tasol Jenerel seketeri Kina i givim tok lukaut bilong em tu olsem em wantaim ol memba bilong em bai stap belisi na lukluk i stap long dispela toktok bilong kampani. Sapos nogat, ol bai stapim wok bilong kampani.

"Jenerel Menesa Philip Tiong i tokim Gavana olsem bai kampani i kirapim 60 haus slip bilong ol wokman. Na Gavana i tokim mi olsem em bai lukim olsem kampani i mekim dispela wok. Nau kampani i mas kirapim ol dispela haus, nogat bai mi lukim olsem Vanimo operesen bai i stap wok. Na dispela i min olsem Vanimo Fores Prodaks, WTK Realty na Bikibulan.

Maggi
2-MINUTE NOODLES
K10 000 CASH SURPRISE!
10 LUCKY SHOPPERS EACH WIN K1,000!

10 WEEKLY DRAWS
8.30 FRIDAY NIGHTS ON EM TV
COMMENCING FRIDAY, SEPTEMBER 1ST
UNTIL FRIDAY, NOVEMBER 3RD, 1995.
HOW TO ENTER

NAME: _____
 ADDRESS: _____
 TELEPHONE: _____ AGE: _____

SEND COMPLETED ENTRY FORM WITH 3 EMPTY 2-MINUTE NOODLES PACKETS IN A STANDARD SIZE ENVELOPE TO:

MAGGI 2-MINUTE NOODLES
K10 000 CASH SURPRISE
PRIVATE MAIL BAG BOROKO NCD

DRAWN UNDER POLICE SUPERVISION

TERMS AND CONDITIONS:

1. Information on how to participate and prizes from part of these terms and conditions. 2. Entry is open to all residents of PNG except employees of Nestle and their families, its associated companies and agencies. 3. No responsibility is accepted for lost, misdirected or delay mail. 4. K1,000 to be won weekly for 10 weeks. All entries must be received not later than 12.00 noon on Friday for the same week's draw under police supervision. 5. Winners will be notified by registered mail and names will be published in the Post Courier every Monday. 6. Prizes must be taken as offered and are not redeemable. 7. Competition commences on 1st September, 1995 and closes on 3rd November, 1995. 8. In the event of any dispute the decision of the promoter (Nestle) is final and no correspondence will be entered into. All entries become the property of the promoter. (Nestle).



WANSOLWARA NIUS

Gavman givim bikpela tingting long ol wok developmen

SOLOMON AILANS:

Gavman bilong Solomon Ailans ino givim bikpela tingting long ol pipia i bagarapim ol wara na nambis bilong em.

Sief fiseris opisa bilong gavman wantaim ekstensen na developmen seksen, Nelson Kile, i tok Solomon Ailans i nogat polisi o lo long kontrolim polusen (bagarapim ples wantaim ol pipia nogut) long nabis. Na tu gavman i no tingting long kamapim wanpela lo long dispela samting yet.

Mista Kile i bin tokim ol lain bilong Indipenden Wol Komisen long ol Ousen olsem bikpela tingting blong gavman bilong en em long developim tuna risosis.

Tasol em bin tok i gutpela long gavman i kamapim wanpela lo nau bikos sapos nogat, ol nambis bilong kantri bai i bungim moa hevi na bagarap.

Strongpela protes slekim Frans

NU SILAN:

Presiden bilong Nu Silan Jim Bolger i bilip olsem ol protes o tok egensim Frans long karimaut ol nuklia tes long Saut Pasifik we Nu Silan i bin go pas strong long em i mekim na wanpela long ol samting i kamap em long Frans i agri pinis long sainim wanpela agrimen long larim Saut Pasifik i stap klia long ol nuklia tes bihain long em i pinisim ol testing bilong em long dispela yia.

Presiden bilong Frans, Jacques Chirac i bin bungim Mista Bolger long 50 yias selebresen bilong Yunaitet Nesens long Nu Yok las wiken.

Long save bilong Mista Bolger, Presiden Chirac i bin tok Frans bai i pinisim ol tes hariap na dispela i min em bai no nap long karimaut eitpela tes olgeta we em bin plenim long karimaut pastaim. Em bai wokim tripela o foapela moa tes tasol na bihain pinis olgeta.

Mista Bolger i tok em i klia olsem Presiden Chirac i no amamas tumas long protes we Nu Silan i mekim long stapim Frans long karimaut nuklia testing bilong em long insait long Saut Pasifik.

Paiawoks long Fiji kukim wanpela haus

Fiji:

Selebresen bilong ol Hindu long Fiji long amamasim festede bilong ol lait o Diwali long dispela wik i bin kukim sampela haus na ol famili i lusim olgeta samting.

Fiji long Made nait i bin luknais tru wantaim ol paiawok na ol kala kala lait i pulumapim skai. Long wanpela paia klostu long Suva, sevenpela famili i bin lusim olgeta samting taim bikpela haus bilong ol i paia.

Long Lautoka, tupela famili i bin lusim haus na olgeta samting bilong ol. Laki tru na ol paiman i bin stapim paia bipo long em i kalap na kukim ol arapela haus klostu.

Long Labasa, paia i bin kukim haus bilong taun kuskus taim ol paiman i wok long stapim paia long narapela hap bilong taun.

Fiji Times niuspepa i bilip olsem ol dispela birua wantaim paia i kamap bihainim dispela ol paiawoks na lam we ol Hindu lain i laitim long selebretim long Diwali festivel.

Nupela ripot kamaut long kilim Picchi

Pot Vila, VANUATU:

Vanuatu long nau i wok long ranim wanpela kot keis trail we wanpela meri i kilim dai man bilong em. Dispela em i namba wan taim long kantri i holim wanpela kot kes trail we i go long longpela taim.

Long dispela kot kes, wanpela meri i kilim dai man bilong em bilong kantri Itali, Franco Picchi.

Nupela evidens we kot i harim long dispela wik i kam long namba tu ki witnes.

Witnes ya Berry Max Jimmy i tok Misis Picchi i binyusim tupela plastik bek long karamapim het, pes na maus bilong man bilong em. Em i tok em narapela witnes tu Tui George Saipir i bin holim Mista Picchi taim meri bilong em i holim pasim plastik long pasim win bilong em na dai.

Jimmy i bin tok tu olsem taim namba wan plen i no wok, orait, Misis Picchi i yusim plastik pipia beklong putim antap long het bilong man na psim i kam olsem long nek.

Long mun Novemba las yia ol bin painim bodi bilong Mista Picchi long arere bilong Pot Villa taun. Mista Picchi em bin gat 53 krismas na em i wanpela bisnis man bipo long dai bilong em.

- *Ol ripot i kam long PACNEWS*

OL LIKLIK WOL NIUS

Ol strit lait i on na ol kakaruk i krai

HANOI:

Planti ol kantri long Asia long dispela wik Tunde i bin laki long lukim iklips bilong san i kamap gut tru. Iklips bilong san i save kamap long taim mun i stap namel long san na et (graun). Long taim dispela i kamap, tudak i save karamapim ples long sampela minit.

Orait, long dispela yia, ol pipel long sampela ples olsem Iran, India, Afghanistan, Pakistan, Bema, Tailen, Kambodia, Malesia na Bonio i lukim gut tru iklips i kamap long ples bilong ol.

Long Ho Chi Minh siti taim tudak i kamap, ol kakaruk i ting em i laik go moning na ol i krai. Dispela em taim iklips i kamap na ples i go tudak. Ol strit lait tu ibin kam on long dispela taim.

Planti tausien manmeri na pikinini wantaim tu ol sains sumatin bilong ol arapela foren kantri i bin bung long hap na lukim mun i wokabaut namel long san na et na kamapim tudak long yumi long graun long sampela taim. Ol wokman meri tu i bin malolo long wok. Na lukim dispela samting long sampela taim.

Long Binh Thuan provins, planti pipel i bin lukluk i stap taim ol kakaruk i ting

olsem em i nait yet na i laik go moning na ol i krai.

Wankain samting i bin kamap long ol arapela hap bilong Asia we iklips i kamap ful na ol man i lukim.

OJ Simpson gat moa mani yet

WASHINGTON, USA:

OJ Simpson, wanpela blakman bilong Yunaitet Stet ov Amerika(USA) husat i no longpela taim i go pinis i bin winim kot bilong em long sas bilong kilim dai olpela meri bilong em wantaim poroman (poroman ya i bilong meri) i stap olsem wanpela mani man o ris man yet. Dispela em bihain long planti pipel i ting em bai lusim bikpela mani long dispela kot kes bilong em, bikos em baim ol loya bikpela mani long helpim em long kot.

Long olgeta hap bilong wol, nem bilong OJ Simpson i bin kamap bikpela tru bikos ol televisen, redio na niuspepa i bin karim stori bilong em long stat yet bilong keis inap long em i pinis taim kot i givim fainel disisen olsem Simpson i winim kot long las mun. Niuspepa ol i kolim long USA Today i tok olpela biknem futbol pilaia bai i pulim namel long K3 na K6 milien moa bihain long kot i rausim sas long em.

HBO[®] ASIA WARNING

HBO wish to announce that decoders have been sold into Papua New Guinea without **HBO** authorization.

HiTRON is the only recognized and legal distributor for **HBO** services and the only authorized supplier of decoders throughout Papua New Guinea.

HBO offers an **AMNESTY** period for those who have unknowingly purchased a satellite TV decoder from an **UNAUTHORIZED** party. This service will be cut off unless the following measure is observed.

Contact:

HiTRON Pty Ltd
P.O. Box 209
Waigani, NCD
Ph: 325 2311
Fax: 325 0349

to register your decoder by 4pm, Friday
24th November, 1995.

It is critical that you register your receiver by this date if you wish to continue to receive services.

Under **NO CIRCUMSTANCES** will unregistered decoders be legitimized after this date.

**HBO[®]
ASIA**

OL pipel bilong ples Kanin long Morobe provins i amamasim Septemba 30 we ol i bin opim wanpela haus lotu bilong Marimari Luteran Sios. Pasto Sokekal na Pasto Pein i bin go pas long dispela amamas bilong opim haus lotu, we moa long 3,000 pipel bilong ples, na ol sampela gavman opisa i bin kam long en.

Ol poto: GISUWAT SINIWIN

A • Kakibe famili i katim wanpela pik bilong ol bikman na meri husat i bin kam long lukim haus lotu i op.

B • Zawiec Hekec na lain bilong em i kilim 5-pela pik olgeta long dispela de.

C • Ol pipel bilong pkes Kanin kilim moa long 60 pik na 13 kau long dispela de.

D • Pasin bilong givim bilum em i wanpela bikpela pasin long Morobe. Long dispela de, ol i givim moa long 500 bilum i go long ol manmeri. Piksa i soim Pasto Pein i holim ol bilum.


E • Long taim bilong wokim haus lotu i bat sampela lain husat savw wok long nait. Dispela em wanpela sekurity gad, Haringbi i malo na slip, bikos em wokhat stret long nait



A



B



C



D



E

Baim takis long mani i kam long kontrak

DISPELA wik mipela bai pinisim ol toktok bilong mipela long takis bilong ol bisnis na tokaut long lo we ol i kolim Inkam Ripoting Sistem. Dispela em long was long ol building kontrakta na arapela i baim long mani ol i kisim. Inkam Ripoting Sistem (IRS)-em long sekim olsem olgeta bisnis husat i rejista wantaim opis bilong takis i gat luksave long takis ol i baim olgeta yia. Wok bilong IRS i stap wantaim ol bisnis sapos ol i kisim pemen o mekim pemen long wok long ol dispela industri;

Building and construction

Surveying

Road Transport Security

Motor Vehicle Repairs

Cleaning and Maintenance

Architecture Entertainment

Cabinet Making Advertising

Engineering Consultancy

Dispela sistem tu i wankain long ol kain wok bisnis olsem haia na lis we ol i yusim samting bilong arapela long wokim profit.

Paying authorities

Wanpela bisnis we i mekim kontrak pemen i mas rejista olsem baim atoriti wantaim opis bilong baim takis. Long taim bilong rejistresen, dispela atoriti bai.

* Kisim setifiket bilong komplaiens long bisnis em mekim na we mani bai i kam long bisnis nem bilong em. Dispela kontrak i gat bikpela eria bilong em we i ken bungim ol kain bisnis wok we i gat planti i stap. Sapos bisnis i no soim dispela setifiket bilong komplaiens, bai baim atoriti i mas rausim 10 pesen withholding takis long pemen bisnis ya i kisim.

* Sapos opis bilong takis i wokim stetmen olgeta yia long olgeta kontrak we i orait long pemen we i abrusim K500 o daun long K500 i go long wanpela bisnis we i totol moa long K3,000 long wanpela yia, dispela ripot i mas go long 15 Mas long narapela yia. Kopi bilong dispela stetmen i mas stap wantaim inkam takis riten bilong bisnis.

* Holim strong rejista bilong olgeta pemen we i moa o daun long K500. Dispela rejista i mas stap redi long opis bilong takis i ken sekim bikos dispela inap kamap long wanem taim ol i laik mekim.



Dispela rekot i mas stap inap 7-pela krismas we kontrak bai pinis long en. Sapos dispela i no kamap stret, penalti bilong en em K200 na K2,000.

Payee (Pel)

Kontrakta o man bilong baim takis i go insait long kontrak wantaim pei atoriti em i kamap olsem Pei (payee). Dispela em man husat bai kisim o inap kisim pemen we namba wan i kamaut wantaim setifiket bilong Komplaiens long opis bilong baim takis. Dispela setifiket bai soim olsem dispela bisnis i save baim gut takis bilong em na i save oltaim mekim ol samting bilong takis i go stret na i rejista gut. Sapos wanpela kampani i baim narapela kampani na i no gat dispela setifiket bilong komplaiens we 10 pesen takis i mas go long en, tupela bisnis ya wantaim bai bungim hevi long baim sas mak long K200 na K2,000.

Yumi nau pinisim dispela ripot bilong Papua Niugini inkam takis we mipela i ting sapos yu gat bisnis, yu inap painim i ken helipim yu long bihainim. Tingim olsem ol liklik bisnis i save baim takis wankain olsem ol pesenel inkam long han bilong papa bilong bisnis yet. Tasol long sait bilong ol kampani na bisnis grup em bisnis stret we i mas baim takis. (Bisnis grup i baim kampani takis long 25 pesen). Bisnis husat i no klia gut long ol lo bilong baim takis, kain olsem pinisim takis riten, i mas tok-tok wantaim Opis Bilong Takis we ol i kolim nau, Intenal Revenu Komisnin.

Edres bilong ol em, PO Box 777, Port Moresby. Telepon namba em 3226600. Fax namba em 3214249

NPF baim K1 milien sea long wel bisnis

ELIZABETH LENY i raitim

CUE ENERGY Resources NL, wanpela kampani husat i save painim wel insait long Papua Niugini nau i lukluk long bungim 10 milien Ostrelia dola. Na baim dispela CMS Nomeco PNG Oil Co (CMS PNG), na 7 pesen interes bilong ol insait long Petroleum Prospekting Laisens 56 insait long Papua Niugini we Saut Is Gobe wel fil i hap bilong em. Long dispela we ol i ken go het long painim wel long Saut Is Gobe wel fil.

Kos bilong dispela CMS PNG wel kampani na 7 pesen interes bilong em inap long K5.6 milien we i gat tokorait pinis olsem Cue Energy Resources bai baim. Bihainim dispela, Cue Energy Resources NL i lukluk long bungim mani long salim ol sea i go long ol manmeri insait long kantri. Ol i bai salim 50 milien sea we wanpela sea bai inap long prais bilong 20t. Dispela i bin stat pinis long Mande Oktoba 23 na bai pinis long Novemba 25.

Na Nesenel Providen Fan (NPF) bilong PNG i putim han tu long baim K1 milien sea long dispela kampani. Menesing Dairekta bilong NPF, Robert Kaul i tokaut long dispela long asde, Trinde Oktoba 25. Em i tok NPF bod i tokorait pinis long dispela. Bikos em i tok ol i bilip olsem dispela em i wanpela we bilong kirapim ol wok bilong ol pipel bilong Papua Niugini. Taim CMS PNG i kam aninit long Cue Energy Resources NL, ol i bai lukluk long developim tupela oil fil wantaim. Saut Is Gobe oil fil na Gobe mein fil. Wok bilong dispela ol oil fil bai stat long pinis bilong 1997. Kiyu Eneji Risos i gat bilip long Saut Is Gobe fil.

Bihainim dispela, Menesing Dairekta bilong Cue Energy Resources NL, Frank Jacobs i tok em i gat bilip long dispela invesmen. Long wanem dispela invesmen long Cue Energy Resources NL i go bikpela. Em i go het long tok olsem dispela kampani em i wanpela liklik kampani, tasol em i gat gutpela sans long gro. Dispela kampani em i tok bai gro long wanem em i tok ol i no drilim yet planti hap long Saut Gobe we i gat wel long en. Mista Jacobs i tok dispela ol lain husat i baim se bai lukim win mani bilong ol i go antap bihain long wanpela yia long wanem kampani bai gro.

Em i go het long tok olsem ol i lukluk long ol narapela kantri na Papua Niugini, na ol i painim olsem PNG i moa gutpela long kirapim dispela kain wok. Long wanem em i tok ol i gat ol gutpela polisi. Dispela developmen bai lukluk long mekim 25 tausen barel oil ol de. Gavman i tokorait long dispela projek long go het long 1996. Na namba wan prodaksen long kamap long pinis bilong 1997. Namba wan operesen bilong kampani i lukluk long kamap wantaim moa long 300,000 barel oil.

Cue Energy Resources NL kampani em i wanpela kampani husat i save painim ol wel aninit long graun. Tasol nau em i laik kamap olsem wanpela kampani husat i ken kirapim wok kamap long oil. Long wanem ol i gat bilip long dispela oil fil. Na tu dispela em i wanpela niupela na namba wan wok we ol i laik kirapim insait long Papua Niugini.

Namba wan astingting bilong Cue Energy Resources NL em long kamap olsem wanpela kampani husat i ken go het long wok kamap bilong oil.

Ol kain pis Mackerel i stap long tinpis

TINPIS fektori i stap long Lae em wanpela fektori tasol long Papua Niugini na i save kisim i kam long ovasis kantri planti moa pis. Katim inap long sais na putim i go insait long tin.

Ol kain pis dispela fektori putim long tin em nem bilong em Mackerel. Dispela kain pis em i kam long wanpela famili bilong pis ol i kolim "Scombridae" na dispela famili bilong pis i gat moa long 49 ol kain pis ol kolim Mackerel, Spanish Mackerels, Sardine na Tuna. Olgeta dispela pis i stap long kainkain hap long olgeta solwara inapim dispela graun, sampela i stap long ples kol na arapela i stap long hotples olsem long Papua Niugini.

Ol lain pis "Scombrids" i gutpela abus moa na planti man i kaikai. Mackerel em yumi save kolim "tangii" long Papua Niugini na Tuna yumi kolim "atun" em ol namba wan abus tru na planti man moa i gat laik long kisim long bik solwara na salim.

Insait long solwara bilong Papua Niugini traipela wok bisnis pis em kamap long tuna, moa long 85 pesen ol tuna em "skipjack" tuna. Tasol kain pis Mackerel em gutpela abus long putim long tin i no planti insait long solwara bilong Papua Niugini olsem na tinpis fektori long Lae i kisim planti pis Mackerel i kam long arapela kantri. Insait long PNG i gat "Spanish Mackerel" tasol na tu em i bikpela sais i no inap long putim long em.

Gutpela pis Mackerel tru em i stap long ples kol olsem solwara bilong Japan, Australia, Nu Silan, Yurop na Amerika. Ol kain pis Mackerel i gat kainkain, tasol foapela Mackerel em gutpela abus moa long mekim bisnis pis na tu gutpela sais na mit long mekim tinpis.

Dispela pis Mackerel long tokples bilong Yurop ol i kolim "Scomber Australasicus" na long Inglan em ol i save kolim "spotted chub mackerel",

Australia slimy mackerel" na Nu Silan ol i kolim "Blue Mackerel" bikpela sais bilong dispela pis em i olsem 40cm tasol namel sais em 30cm long olgeta. Kala bilong dispela pis em bilong long baksait wantaim zigzag lain na waitpela bel.

Arapela pis Mackerel em ol kolim "Scomber Japonicus" em long Australia ol kolim long "common Mackerel", Amerika na Inglan "chub mackerel" i stap planti moa long biksolwara bilong "Atlantic", "Indian" na "Pasific biksolwara". Kala i wankain olsem Scomber Australasicus tasol sais makim bikpela bilong em sampela taim inap 50cm.

"Scomber scombrus Linnaeus" tu em wanpela bilong foapela pis Mackerel na i gat planti moa long dispela pis i stap long bikpela solwara bilong "Northern Atlantic Ocean", "Mediterranean" na "Western Atlantic Ocean". Planti moa i save kamap gut long ples kol na solwara i gat ais long en. Arapela pis Mackerel em ol kolim "Irachurus symmetricus", planti i hap olsem long Nu Silan ol kolim Jack Mackerel" em tu i gutpela moa long putim insait long tin.

Plantu bilong ol dispela pis i save bungbung wantaim na i stap long bik solwara. Ol save man bilong kisim pis i go long bik solwara long ol traipela sip i gat kainkain masin na umben long pulim pis. Tasim ol pulim pis pinis ol save skelim gut i go long wankain sais na putim i go insait long strongpela ais bokis.

Sampela taim ol bai katim het na tel bilong pis pastaim na bihain i go insait long ais, tasol olgeta arapela taim het, tel na bel bilong pis i mas i stap yet bai ol putim long ais na salim long bikpela sip i kam long Papua Niugini insait long tinpis fektori bai ol wokmanmeri i katim het na tel pastaim bihain long pis i go insait long sup na i go long tin.

YOU CAN RECEIVE ALL THESE CHANNELS ANYWHERE IN PAPUA NEW GUINEA.

If you have a PALAPA dish all you need is a DECODER from HiTRON

**If you don't have a dish contact HiTRON for a quote
DECODER K1500 YEARLY SUBSCRIPTION K600**

HITRON PTY. LIMITED P.O. Box 209, Waigani, N.C.D., Papua New Guinea

PH : (675) 325 2311 FAX : (675) 325 0349

STICK-ON

OX & PALM

AND

WIN

K5,000!

Yes! you have a chance to win a K5,000 cash and many consolation prizes of K50.00. In the 1995 Bigger and Better "Stick On Ox & Palm And Win" bumper sticker competition. From the 23rd of October until the 8th of December purchase K5.00 or more of fuel or goods from your nearest Shell Service Station and you'll receive a big bright "OX & PALM" sticker.

Stick it on the bumper of your car and you than have a chance of being spotted by the OX & PALM spy snooping around all parts of the country.

Starting the 30th of October if your registration number is announced on Nau FM send the copy of the registration papers to Hugo Canning Co. Pty. Ltd. P.O. Box 635, Boroko, NCD. and you automatically win K50 and get put in the draw for the Grand Prize of K5,000 cash.

The more stickers you have on your car, the greater the chance of being spotted by the OX & PALM spy and winning.



ALL WINNERS WILL BE PUBLISHED WEEKLY EVERY MONDAY IN THE NATIONAL



**Go to your nearest Shell Service Station now
and be a part of OX & PALM winning team.**

PNG Laipstail

Aitape pipel lainim nupela stail bilong wokim haus

FELIX RAMRAM i raitim

KLOSTU olgeta pipel, yangpela manmeri na ol pikinini em kris-mas bilong ol antap long 7 na i go antap i wok long lainim na kisim save long wanpela nupela pasin bilong wokim haus yusim simen rop na wesan ol i kolim tails (tiles). Wantaim dispela nupela save ol i wok long lainim, ol pipel bilong Ali Ailan 4-pela kilomita ausait tasol long nambis bilong Aitape taun. I kirapim pinis wanpela nupela na bikpela haus lotu bilong ol em bai ol i opim long krismas de stret long mun Disemba long dispela yia.

Wanpela bikman Bill Naisu Bagore bilong ailan husait i go pas long liklik grup bilong em, em ol mama na yangpela ol meri i stap insait longen ol i kolim ol yet

Jays Force i tokaut olsem grup bilong em i wanpela long planti ol narapela grup bilong wan wan liklik ples long Ali Ailan. Husat long ol i gat dispela save long wokim tails long putim antap long het bilong haus.

Em i tok dispela i wanpela nupela save ol pipel i wok long lainim na save gut nau. Na em i kisim dispela taim long givim bikpela tok amamas bilong em makim ol pipel long Ali ailan na tenkim paris pris bilong ol Pater Timothy. Long bringim dispela nupela save long wokim tails bilong putim antap long het bilong ol haus.

Mista Bagore i tok kamapim bilong dispela nupela stail bilong wokim haus i bihainim tingting bilong "stretim ken" olupela haus lotu o wokim nupela haus lotu bilong St. Anthony



● Long Warapu na Sissano long Sandaun provins ol i gat planti liklik haus olsem long i stap antap tru long graun, bai dok i noken kisim ol kapul i stap insait.

Sios Ali Ailan 5-pela krismas i go pinis.

Em i tok ol i pilim olsem nupela haus lotu sapos ol i wokim long timba, faibro na kapa rup, bai i no stap long-pela taim tumas. Na tu bai komyuniti i painim hat long painim mani long karim aut

wok mentenens bilong haus lotu long olgeta krismas.

"Olsem na mipela i askim Pater Timothy long painim rot we mipela i nap kisim na yusim samting ol i kolim tails. Bikos bipo tru taim ol misin i bin kamap na stap long ailan bilong mipela.

Mipela i bin lukim ol i yusim ol hap simen ya antap long rup bilong haus, na ol hap simen ya i stap longpela taim tru na i nogat mentenens bilong ol. Bihainim dispela strongpela tingting bilong mipela, Pater Timothy i givim mipela sampela buk long mipela i lukluk na skelim wantaim tingting mipela i gat.

"Pater Tim . . . i lukim laik bilong pipel i strong long kisim na yusim tails na simen long kirapim nupela haus lotu bilong mipela long Ali Ailan. Orait em i putim oda long tupela liklik masin bilong wokim tails na kisim i kam long kantri Jemeni. Bihain long kamap bilong dispela tupela masin we i no save wok long pawa. Mipela i lainim na kisim save long pasin bilong wokim simen rup ol i kolim tails," Mista Bagore i tokaut.

Dispela save bilong wokim simen tails bilong putim antap long het bilong

haus i stap wantaim ol pipel bilong Ali Ailan klostu 5-pela o 6-pela krismas nau. Na planti long ol pipel long ailan, bikos i gat bikpela sol bilong sololwara, ol i gat tingting long senisim pasin na tingting bilong paim kapa na putim antap long het bilong ol haus bilong ol bihain taim. Ol i skelim olsem ol diwai, pangal na morata long bus tu i wok long sot.

Na kos bilong transpot long kisim ol samting long bikpela i go daun long ailan i wok long go antap tru. Na sampela i gat tingting bilong wokim ol "hap kas" haus long ol samting bilong bus na het bilong haus bai ol i putim simen tails. Ol lain husat i holim ol gutpela wok o pikinini bilong ol i wok long taun bai i nap paim simen na kirapim ol haus simen taim antap long het bilong haus bai ol i putim simen tails.

I go moa long pes 14

It's Better It's Besta!



We cook the finest Mackerel to perfection right here in PNG so your family can enjoy the better, fresher taste of Besta.



PNG's own tinfish . . .

OLD DOGS & The Offbeats

Old dogs kamaut wantaim kik musik bilong Madang stret

JAMES KILA i raitim

BIHAIN long rekotim tripela kaset pinis dispela stail musik grup bilong Madang provins, Old Dogs & the Offbeats i kambek gen wantaim wanpela top kaset bilong ol long Chin H Meen long Mosbi.

Ol musik na singsing bilong dispela nupela kaset i gat kik na ol stail we i ken mekim planti ol manmeri i laikim tru na tu i mekim ol i salim tingting.

I gat bikpela bilip olsem dispela nupela kaset bilong ol mangi Madang ya bai pulim planti ol yangpela manmeri husat i save laikim tru long harim ol stail lokal musik bilong ol.

Long kaset tu i gat planti ol gutpela singsing we i ken katim lewa bilong ol manmeri. Sampela singsing bilong ol i stori long laip bilong ol yangpela bilong ples husat i save stap na salim tingting.

Long sait A bilong kaset i gat ol singsing olsem Kadoi e, Ses o medli, Swit Tala, Moonlight, Kalibobo na Hangu Nui


Dispela sing Kadoi e i bin stap insait long namba wan kaset bilong ol, tasol ol i stretim na mekim narapela stail gen wantaim ol masin bilong studio na mekim i kamap nais tru.

Song ya Kalibobo i stori long taim wanpela i sanap long Yabob ples na lukluk i go long tupela ailan ya em long Yabob na Mareg na bihain lukluk i long Godawan poin na lukim Kalibobo.

Narapela song ya Swit Tala i stori long liklik pikinini bilong Willie Tropu (Old Dog). Em i stori long pikinini i lusim papa na i go pinis.

Old Dog i tok em i no lus tingting long pikinini meri bilong em Tala na em i laik em i mas kambek na lukim em gen bihain.

Dispela song Moonlight em ritem gitaris bilong ben Johnson Lanke i bin raitim. Dispela song i stori long ol kain filings bilong ol yangpela long ples taim ol i lukim gutpela mun i lait. Wanpela song Mel Unug, em i bilong ol lain Amyours ben bilong Umun viles long Amele eria (Ohiss Kantri). Dispela song i save kirapim das long ol stringben pati bipo. Tasol nau Old Dogs i putim long kaset na i luk olsem



● Nupela kaset bilong Old Dogs & The Offbeats wantaim CHM.

bikpela moa das bai i kirap long Ohiss kantri. Ol lain Wali yet bai skelim.

Stori bilong nem ya "Old Dog" i bin stat long bipo yet taim Willie i bin stap olsem wanpela witnes long nesenel kot long Madang. Long dispela taim em i memba bilong wanpela raskel grup ol i kolim Kubulex. Dispela geng bihain i senis i go Mixmates 285 or MXM.

Narapela pren bilong em tu em singa na lida bilong Kales Gadagads ben husat i dai pinis Sandie Gabriel.

Kot i bin askim Willie long toktok na boi i no pret, em i toktok olsem wanpela saveman bilong lo stret. Dispela stail bilong em i mekim wanpela loya tru i ai op na em i tok "Man, em bai i hat long senisim tingting bilong dis-

pela Old Dog," Bihain long dispela kot ol mangi long ples na pren bilong Willie i stat long kolim em Old Dog. Dispela nem i pas olgeta long em inap nau.

Sampela yia bihain Willie i senisim pasin nogut bilong em na joinim yut grup long Yomba Katolik Peris.

Long dispela taim Willie yet, brata bilong em Paul, Demas Saul, David Salok na ol narapela boi bilong Yabob viles i bin pilai. Ol save stap long ol yut wok na tu singsing long haus long ol Sande.

Ol i bin pilai long yut i go na tingting bilong laif ben i kamap. Tasol dispela taim ol i nogat ben set. Tasol long Yabob ples yet i gat sampela ol boi i gat ben set.

Willie, Demas, David na Paul i save go lukluk na taim ol dispela ben i go malolo ol i save askim ol long pilai.

Long dispela taim planti ol boi i no save gut long pilai long pawa ben, olsem na taim ol i pilai kraik bilong musik i go nabaut nabaut stret.

Sampela ol pren husat long sait i harim na i singaut "Offbeats".

Dispela taim nau ol mangi ya i stat long kolim ol yet Offbeats.

Bikos Willie "Old Dog" i save go pas long singim ol song ol i kirap na kolim nem bilong grup bilong ol "Old Dog & the Offbeats".

Taim ben ya i bin stat em i bin winim tru lewa bilong planti manmeri wantaim ol singsing bilong ol.

Planti taim song bilong ol i save stori long laip bilong ples, tumbuna stori na tu pasin bilong yangpela.

Sampela ol song we planti lain i save laikim em Yawi Girama, Mulau o. Hangu Panu na Alona.

Long dispela namba wan kaset wantaim Chin H Meen long Mosbi ol lain mangi bilong ben i tok tenkyu i go long ol memba bilong Madang Provinsel Gavman na ol lain olsem Mathew Gubag, Ivan Mulul na Julie Ariako.

Ol i tok tenkyu tu i go long tupela yangpela husat i bin helpim long dispela rekoting. Ol tupela em Lawrence Tropu bilong Trops C90 na Martin Molt bilong Kales Gadagad.

Lawrence em dispela stail mangi tasol husat i pairapim ol dram insait long dispela nupela kaset. Martin i bin helpim long pilaim sampela bes long kaset.

Long kaset ol lain husat i bin pilai long rekotim kaset em Willie (singa), Johnson (ritem gita), Martin Molt (bes), Lawrence (dram) na Paul Tropu (lid gita). Long kaset kraik bilong lid gita bilong Paul i kamap stail tru wantaim musik.

Ben i mekim bikpela tenkyu tu i go long ol lain husat i bin helpim long putim kaset em ol enjinia olsem Dika Dai, David Sauri na Millan MacCridde.

Ol i tok tenkyu long long ol lain husat i bin lukautim ol long Mosbi taim ol i kam long katim kaset.

Aitape pipel lainim nupela stail long wokim haus

i kam long pes 13

We ol i tok bai i stap longpela taim tru winim planti krismas.

Na moa long 4-pela tumbuna i ken stap long wanpela haus simen.

Long wokim tails, namba wan samting wanpela i mas gat simen, rop (bilong drain kokonas o nailon rop) na bilakpela wesana bilong bikples.

Rop i mas katim sot i nap wan ins longpela na mixim olgeta dispela samting gut tru bipo long tainim i go wantaim wara.

Tasol heve bilong rop i mas olsem 1kg, 1-pela baket simen na 1-pela baket wesana. Taim olgeta dispela samting yu wilwilim gut tru pinis, yusim trei (tray) bilong skelim simen i stap - pulumapim dispela trei long wara wara simen ya. Putim wanpela braitpela plastik antap na insait long tails frem (frame) i pas i stap wantaim masin na taitim

wanpela baten i stap long holim pas plastik ya. Nau kapsaitim wara wara simen ya antap long plastik insait long frem.

Taim dispela i wok long kamap, wanpela man, meri o pikinini i mas stat long tantanim handel bilong masin long meknais long wara wara simen i stap long frem long sindaun na pas gut wantaim. Sem taim kisim wanpela hap stretpela palang na stretim antap bilong simen i nap wara wara simen ya i pulumapim tru insait bilong frem. Luksave olsem simen i mas level wantaim frem orait stapim masin na yusim tul bilong stretim simen ol i kolim traols. Na stretim ken simen i nap i smut olgeta. I gat wanpela likok frem tu i stap long harere bilong tail frem long lep han. Yu mas pulumapim sampela simen tu longen na strongim bikos dispela bai i kamap olsem buk bilong

hangamapim na pasim wantaim waia i go pas long palang o ain antap long rup bilong haus.

Taim buk ya i wara wara yet, yusim waia o nil na putim hul long rait sait i go long lep sait. Bihain long dispela nau, lusim baten bilong holim plastik na rausim wara wara simen i stap long frem i go daun nago antap long tails trei. Na simen i mas sindaun gut na stret bihainim mak ol i makim pinis i stap long trei. Sapos simen i no sindaun gut bihainim dispela mak, bai simen i krungut taim simen i drai. Na dispela bai i kamapim ol bikpela hol long het bilong haus we bai i larim ren wara i ron i go insait long haus taim i gat ren. Yumi rausim pinis wara wara simen ya i go long trei, orait yumi larim i stap i nap tripela de olsem bai i drai na kamap strong. Nau rausim tails long trei na

sanapim ol insait long bikpela kontena na pulimapim wara i go antap i nap samting olsem 5-insis samting. Karamapim long sel na larim ol i stap i nap long narapela 3-pela de ken.

Olsem hat bilong an i ken kukim ol na strongim gut ol. Mista Bagore i tok sapos yu yusim bilakpela wesana bilong bikples bai tails is strong tru taim yu pundaunim.

Olsem na waitpela wesana bilong ailan i no strong tumas na gutpela long wokim tails. Nau wok bilong wokim tails i pinis na i redi long yusim. Bill Bagore i tokaut olsem ol pipel long Ali Ailan i no redi yet long kamapim dispela wok i go olsem wanpela rot bilong kamapim liklik bisnis.

Ating bai ol i tingting gut bihain long ol i pinisim olgeta wok bilong opim nupela haus lotu bilong ol long St. Anthony Paris long Ali Ailan long Disemba 25 long dispela yia.

Stori bilong Indonesia misineri long Wabeg

Dispela em stori bilong wanpela misineri pater bilong Indonesia husat i wok nau long Enga provins hia long PNG. Stori bilong em i bin kamap long wanpela megesin buk bilong ol SVD (Divain Wod Misineri) ol i kolim long "SVD Word in the World-1994/19945"

Pater ya i givim ol tingting long ol samting we i karamapim wok bilong sios, ples na komyuniti insait long Wabag Katolik daiosis.

Em i skelim na glasim tu sindaun bilong ol pipel na pasin we komyuniti i bihainim long stap insait long ol senis bilong tude we i karamapim sait bilong lotu, sosel, ol nupela devel-opmen na ol arapela senis moa.

Hia em stori bilong Pater Paul Liwun SVD, olsem em yet i raitim kamap.

Misineri bilong Indonesia long PNG.

Maski em i wanpela nupela nupela misineri, Pater Paul i mekim sea bilong em long go pas na redim rot bilong ol daisisen pater long kantri.

Mi stap long namba foa grup long ol Indonisen pater

husat i kam wok misineri insait long Papua Niugini. Namel long 13 pater i stap long grup bilong mipela, mi wanpela tasol husat i bin aplai long kam wokim wok misineri long PNG. Na taim ol i tokim mi olsem ol i oraitim aplikesen bilong mi, mi bin amamas tru.

Long tupela nait mi no slip. Bikos ol kain tingting na askim i wok long kamap long het bilong mi. Mi wok long tingim wanem samting bai i kamap long mi taim mi go kamap long dispela nupela kantri we mi save ritim ol stori long em long ol nius-pepa. Na harim tu ol stori long en long Pater Bosco Tou na Pater Rinus Pambut, tupela paslain SVD pris bilong Indonesia husat i bin kam wok olsem misineri long PNG.

Bihain long mi kisim odinesen olsem pater, mi bin go long Woods Inglis Koles, Sidni long Australia long 5-pela mun bilong kisim skul long tok Inglis.

Orait, long Oktoba 1990, mi bin kamap long PNG. Mi lusim Mosbi long go long Alexishafen insait long Madang provins bilong kisim skul long Tok Pisin.

Long hia samting i

narakain long wanem mi nogat tisa long skulim mi long Tok Pisin. Tingting em long mi yet mas harim ol pipel i toktok na save long dispela tokples. Mi laik tru long kisim save long toktok long Tok Pisin kwiktai tru.

Ol wanpisin pait.

Namba wan hap we ol i salim mi long wok long en em long Pumakos Peris insait long Enga provins. Dispela em long hailans rijon.

Bikos Enga em i ples kol na tu planti ol wanpisin pait i save kamap long hap, planti lain i no givim gutpela tingting long dispela ples. Mi ken toktok liklik long pasin bilong pait long Enga bikos mi stap na lukim ol dispela samting long taim ol i kamap.

Long taim mi kamap long Pumakos peris, wanpela pait namel long tupela wanpisin i go het na stap pinis long tupela mun. Gutpela na pait ya i stap ausait long peris we mi wok long en.

Tasol wanpela de bihain long krismas, ol i karim pait i kam klostu long misin bilong mipela. Ol paitlain ino yusim tasol ol bunaro, ol i yusim ol gan long pait wantaim. Mi pret long ol i yusim gan tasol long pait wantaim bunaro, mi

no pret. Mi stap isi na lukim ol paitlain i tromeim ol bunaro i go i kam.

Long Disemba 31, 1990 ol i stat pait long fran bilong haus lotu we i stap klostu long peris haus we mi slip long en.

Sampela man i dai long dispela pait, ol kukim ol haus na tu ol i bagarapim ol gaden kaikai. Pait ya i nogut bikos taim ol man i go pait, ol mama na ol pikinini i ranawe lusim ol ples na painim hap long hait long em na abrusim ol bagarap we ol inap long kisim long taim tupela birua i sut i go i kam long wanpela arapela.

Maski trabel olsem i stap, mipela i go hetim pastorel wok bilong mipela. Wanpela long en em mipela i raun i go long ol autsesen. Isi isi mi wok i long lainim ol kain laip na mi laik stap wok long hap.

Trensfea i go long Pompabus

Maski laik bilong mi i strong long stap long Pumakos, ol bos i strong long mi lusim dispela hap. Bikos ol bos i lukim olsem dispela em no seif hap long nupela misineri i stat wok long en. Olsem na bihain mi stap tupela mun samting, mi lusim

i go long pes 16



Wanpela taim Kanage i go raun long wara na i lukim wanpela meri Sepik i wasim samting long wara i stap. Kanage i save gut long meri ya bikos olgeta taim em i save werim namba 5 yunifom na pilai.

Kanage kamap na lukim em na em singaut, "hei namba 5, yu kisim masis i kam na mi laitim paip bilong mi pas-taim".

Taim meri ya harim olsem em i go putim ripot long meri bilong Kanage long haus. Kanage raun i go apinun na taim em kamap long haus, meri nogut i smokim em stret.


Meri bilong Kanage askim, "yu tok wanem long tim meit bilong mi?". Na Kanage tok, "mi askim em long givim mi paia long laitim paip".

Tasol meri tok, "noken aigris long namba 5 yunifom bilong em na stail bilong em long pilai na yu toktok". Kanage kisim kisim bikpela sem stret.

Joke Masta



WEWAK

Moa tok pilai long pes 21



Tasty Bake

Celebrate any occasion with a cake. Let Tasty bake help make it a memorable day



Croissants light & delicious for breakfast. Italian and other assorted breads with lunch and Danish scrolls & slices with tea.

Tasty Bake offers daily fresh bread, Rolls, Cakes, Pies and Sausage Rolls

Tasty bake is conveniently located at Ela Beach, Steamships Town, Stop N Shop Waigani, Family Store Town and Boroko and Erima Supermarket and now newly opened at Scratchley road Badili

**Telephone: 321 4633,
Facsimile: 320 1271**

Stori bilong Indonesia misineri long Wabeg

i kam long pes 15

Pumakos na ol pipel wantaim bikpela sori.

Pompabus em pleswe mi go long em bihain long mi lusim Pumakos. Pompabus em i namba wan peris long Wabag Daiosis insait yet long Enga provins. Ol bin kirapim wok misin long Pompabus long 1948.

Wanpela bikpela maunten i seperetim tupela peris (Pumakos na Pompabus). Tasol pasin we tupela grup i wokim ol samting i narakain long wanpela arapela. Wanpela tok piksa i stap long bilip bilong ol pipel long tupela eria.

Orait, long Pompabus ol pipel yet i save strong long go aut na wokim ol wok bilong sios.

Long ol Sande na long ol misa bilong ol arapela de, ol pipel yet i save mekim wok long bilasim na redim haus lotu. Long taim bilong givim ofa olgeta Sande long Pompabus, ol pipel i no givim tasol mani. Nogat. Ol i givim tu ol kaikai bilong gaden, kumu, ol mit, paiauwut, laip pik, kakaruk, piul na ol arapela samting moa. Ino gat planti hevi long dispela peris olsem long Pumakos. Wok bilong wanpela grup ol i kolim long God Triwan muvmen i strong na i save sanap olsem namel man long daunim ol hevi long taim ol i

kamap.

Mi bin stap tupela yia long Pompabus. Long dispela taim, tripela peris i stap aninit long lukaut bilong mipela. Pombabus long 1991, Pumakos na Puma long 1992 na Pompabus, Pumakos na Maramuni long 1993. Mi wok wantaim peris pris husat i givim mi wok long lukautim ol pastorel wok. Taim mi mekim dispela wok, em nau mi pilim tru olsem mi mekim wok misinari.

Maski mi lusim Pompabus long 1993, lewa bilong mi i stap yet long hap. Nau mi wok olsem peris pris long Piperes. Long hia mi wan i lukautim peris i stap. Sindaun long dispela hap em i narakain gen long Pompabus. I nogat planti nois tumas na ol pipel i stap isi. Tasol dispela ino mekim mi slek long ol wok bilong mi. Mi wok long lukluk na skelim ol samting na mi bai statim pastorel plen bilong peris. Ol lain grasrut bai i stap insait long dispela wok plen. Peris bilong mi ino gat bikpela tingting long go hetim dispela plen, tasol mipela bai i go het yet long visen bilong daiosis bikos mipela ino laik ol arapela peris i lusim mipela bihain.

Mi lainim wanem samting long PNG?

Insait long tripela yia mi stap long PNG, mi lainim wanem samting?

Sios long Enga em i yangpela yet. Taim Gospel ino painim as tru yet long lewa bilong planti pipel bilong dispela hap, ol arapela senis long sait bilong developmen i kamap hariap tru. Na taim senis i kamap hariap tru, planti pipel i konfius o ino klia tumas long en.

Pasin we dispela ol senis i mekim na ol pipel i hariap long sindaun we ol i yusim ston akis i go antap olgeta long yusim ol hatpela kompyuta masin samting bilong ol waitman.

Orait, long dispela senis wanem gutpela rot ol pipel i ken bihainim?

Long tingting na lukluk bilong mi, em i moabeta long yumi i ritim ol sain bilong nau na helpim ol pipel bilong luksave olsem ol iken ranim wok bilong peris ol yet. Taim bilong givim ol henaut i ova pinis. Olsem ol misinari, yumi mas skulim na helpim ol pipel bilong yumi long kamapim strong wok na ol bai noken bungim hevi long bihain taim.

Mi no bilip olsem sampela lain olsem ol asples PNG stret ino inap long kontribut o helpim long kamapim wok bilong peris. Tasol mi bilip ol i ken.

Insait long tupela yia bilong mi long Pompabus mi bin lainim planti samting long ol pipel. Nau ol pipel i kisim strong long peris pris tasol sapos pris i helpim ol long save long wanem samting ol i ken wokim, ol samting bai i orait. Ol pipel i gat planti samting long planim na mekim mani long em. Na tu ol i amamas tasol long wok helpim peris.

Long liklik trangu peris bilong mi, mi stat pinis long mekim wok long dispela eria. na mi lukim olsem ol pipel i amamas longmekim samting we bai i helpim ol i go hetim gut sindaun.

Olsem ol misinari mipela i redim rot long ol arapela daiosisen pater husat bai i tekova bihain long mipela i lusim kantri. Mi gat bikpela bilip olsem ino longtaim sios long Enga bai i sanap long tupela lek bilong em. Na dispela bai i kamap sapos mipela olsem ol misinari i kirapim em.

Em no isi

Sampela ol SVD pater na ol SSPS Sister i tok bikos kalsa bilong mipela ol pipel bilong Indonesia na PNG i klostu wankain, em bai i isi long mipela i wok bung wantaim.

Mi tok dispela ino tru. Long ekspiriens na lukluk bilong mi

olsem wanpela misinari bilong Indonesia long PNG, mipela i fesim hevi long tupela kalsa we ino wankain.

Tupela em long kalsa bilong ol waitman na narapela em Melanisen (PNG) kalsa. Em no isi long mipela i adjastim mipela long PNG kalsa bikos long narakain kalsa we mipela i kamap long em. Mipela i gat difren wei bilong wokim ol samting, famili laip, edukesen na ol arapela samting moa olsem.

Mi amamas long wok stap long Enga olsem wanpela misinari bikos i gat SVD komyuniti husat i redi long givim sapot na helpim long wanpela arapela. Mipela i wok gut wantaim na sapos wanpela i laik komplek o ino amamas long sampela samting, em i ken go het tasol. Mipela i sambai redi tu long harim na serim ol wanem samting narapela i toktok long em, ol hevi, amamas na wanem moa. Mi pilim tru olsem mi hap long dispela grup na mi luksave olsem mi wanpela misinari tasol olsem ol arapela wanwok bilong mi husat i kam long Yurop. Mi nogat bikpela ekspiriens yet long kantri na mi yangpela yet. Inap mi tok long mi olsem "Mi manki nating" tasol mi stap hia long PNG long traim bes bilong mi long sevim ol pipel bilong God.



Baim "Smile for Life" bes na win



JAMES KILA i raitim

LONG Fraide Oktoba 27 em Smail long Laif de. Ol manmeri long Lae and Mosbi i mas baim ol "Smile for Life" bes na werim long dispela de. Wampela bes i kos K1 tasol. Yu ken baim wampela K5 bes tu long putim long kar bilong yu. Ol manmeri na ol kar husat ol i painim i karim dispela ol "Smile for Life" bes long dispela de i gat sans long winim ol tiket bilong kisim petrol i kam long BP, Mobil na Shell. Olgeta ol sevis stesin bilong dispela ol kampani we i save salim petrol na fuel long Lae na Mosbi tu i wok long salim ol bes.

Yu ken baim ol bes ya long olgeta Steamships stua long Mosbi, Best Buy stua long Lae na olgeta sevis stesin i stap long Lae na Mosbi. Olgeta mani i kam long dispela "Smile for Life" de bai i go long saptim Laif Edukesin Senta long Lae na tu long kirapim wampela narapela senta gen long Mosbi.

Nau yet long Mosbi na Lae sampela ol manmeri i baim ol dispela bes pinis na i save putim long siot na raun. Ol sampela kar na bas tu i wok long karim ol dispela bes na ron long ol rot. Dispela i soim olsem ol i gat tingting long helpim na bringim mani long go long helpim Laif Edukesin Senta.

• Ol pikinini em ol lain we i mas gat gutpela tingting long ranim kantri long bihain.

Laif Edukesin Senta - bikpela win stori

LAIF Edukesin em i wampela bikpela win stori bilong Papua Niugini. Namba wan Laif Edukesin Senta i bin op long Lae long stat bilong 1995. Nau yet samting olsem 10,000 skul pikinini i bin gat sans long stap insait long dispela gutpela skul bilong lainim ol samting bilong helt na drag edukesin program.

Ol pikinini long ol komyuniti skul, sios skul na ol intanesenel skul i save kam wantaim ol tisa na papamama long lukluk raun long senta.

Laif Edukesin Senta em i wampela spesel wok klasrum ol i wokim na i gat planti ol nupela samting long tisim ol pikinini na ol kain wok bilong lainim samting.

Hia ol pikinini i save lainim ol kain kain ol bikpela wok bilong bodi na olsem wanem ol pikinini i no wankain long ol yet.

Dispela klasrum i gat sampela ol gutpela samting tru bilong soim ol pikinini long skul. Mipela i gat dispela Transparent Anatomical Manekuin (ol i kolim TAM) Em i save soim ol skul pikinini long wei ol bodi i save go wantaim.

Em i save toktok long ol pikinini na ol i save lainim wanem ol dispela samting i stap insait long bodi na wanem hap ol i stap long bodi.

Mipela i gat tu dispela bodi modul sistem we i save soim klia ol rot we blut sistem, ol rop bilong bodi na ol rot bilong kaikai olgeta i save wok bung na amamas

wantaim. Dispela ol rop sistem bilong bodi i ken soim ol wei ol kru bilong man i ken go isi taim ol i dring tumas planti bia.

Ol skul pikinini bihain i save toktok long wanem samting ol man i no ken mekim taim ol i go tumas long dring bia. Olgeta taim ol skul pikinini i save wokim aut ol bikpela yumi mas noken mekim taim yumi tingting long dring na draiv.

Ol pikinini i save stat kam long senta long namba wan yia bilong skul. Taim ol i liklik yet ol i save lainim ol wanem kain wei bilong lukautim autsait bilong bodi bilong ol. Sampela eksampel em long mekim bodi bilong ol i klin.

Taim ol i kamap bikpela ol i save lain long kisim ol wanem gutpela kaikai bilong bodi na tu ol gutpela win na eksesais long olgeta de. Ol i save lainim tu ol wei kuru o brein i save kontrolim bodi.

Taim ol pikinini i kamap bikpela ol samting ol i save toktok long en i save go bikpela moa. Ol i save toktok long ol fren na ol samting i ken givim hatwok. Ol i save lain tu long tok "no" long strongpela na gutpela wei.

Ol i save lain tu long ol bagarap we i save kam long ol kain samting olsem bia na sigaret. Mipela i save skulim ol long ol bagarap bipo long ol yet i lainim long go pas wantaim ol dispela samting na stat mekim.

KIDZ KORNER

CREATIVE ACTIVITY KITS

Colour-in

Poster

T-shirt

Face

Finger

PB2 POSTER PAINT

PB3 T-SHIRT PAINT

PB4 FACE PAINT

Paper CRAFT

NOW Available

THEODIST PTY LTD
STATIONERY
SUPERMARKET

Telephone: 325 6500 Facsimile: 325 0302
Spring Garden Rd, Gordons

Laif Edukesin Senta em ples bilong amamas

LAIF Edukesin Senta i gat bikpela tingting olsem ol wei bilong skul na lainim samting i mas gat planti samting bilong amamasim ol pikinini. Olsem na i gat planti ol kain pilai we i save kirapim tingting na ol skul pikinini i welkam tasol long go long klasrum na pilai.

Bikpela samting bilong klasrum em ol tisa

I gat tupela Papua tisa husat i save lukautim Laif Edukesin Senta. Tupela ya em Jessica Simbuna na Mary Kiele.

Bipo Jessica i bin wanpela nes tisa na bihain em i joinim Laif Edukesin Senta long las yia.

Mary i bin wanpela haikul tisa na tu em i gat save long komiyuniti wok. Tupela meri wantaim i bin kisim skul bilong ol long wok long Laif Edukesin Senta long Canberra, Australia na ol i gat moa save long ol rot bilong tism ol progrem long Laif Edukesin Senta. Dispela ol skul ol i lainim i wankain olsem ol narapela progrem long ol arapela Laif Edukesin Senta long wol.

Husat i save sapatim Laif Edukesin Senta

Taim Laif Edukesin Senta i stap aninit long lukaut bilong ol tisa, i gat ol komiti bilong ol vol-

JAMES KILA i raitim

untia husat i mekim bikpela wok bringim mani bilong em. Dispela ol lain em ol sevis klap, ol wan wan manmeri, ol bisnis olgeta i save mekim bikpela wok long lukautim gut ol klasrum.

Colgate Palmolive em wanpela kampani husat i save givim bikpela mani long helpim Laif Edukesin Senta. Ol i save givim K15,000 long wanpela yia long Laif Edukesin Senta long Lae. Colgate Palmolive i save wok strong wantaim Laif Edukesin na i save lukaut gut long wanem ol samting we i ken bringim gutpela helt insait long Papua Niugini.

Ela Motors

Ela Motors i bin stretim rot bilong Laif Edukesin Senta long baim wanpela bas na kar long wanpela liklik prais tasol. Ol tu i save stretim dispela kar na bas bilong senta taim em i painim liklik hevi. Taim sampela hevi i painim ol Laif Edukesin Senta, kwiktaim tru Ela Motors i save stap long helpim ol.

BP Oil


BP OIL i save givim gutpela helpim long givim petrol i go long bas na kar ol pikinini i save

yusim long go long Laif Edukesin Senta. Dispela bas na kari i save bringim ol skul pikinini i go long senta na kar i save bringim ol tisa i go aut na lukluk raun long ol skul na tu redim ol rot bilong ol tisa long go long skul.

Dispela tripela em ol bikpela sponsa tasol i gat helpim tu i save kam long komiyuniti bilong Lae. Niugini Tablebirds i save givim ol kakaruk long taim bilong pati bilong bringim mani long senta, Dunlop na Boroko Motors i save helpim long fiksing ol kar long taim bilong kar resis. EMTV na Nau FM i save edvataisim "Smile for Life" de, tupela Lae Rotary klaps, Lioness na Soroptimists support Laif Edukesin. Em bai hat long kolim nem bilong olgeta lain husat i save helpim senta.

Wanpela trupela eksampel bilong gutpela na strongpela komiyuniti wok bilong senta i bin kamap taim Laif Edukesin Senta i kisim Robert More, wanpela polisman bilong bipo husat i wok 15 yia long draivim bas bilong en.

Mista More i bin amamas long senta na em i stretim rot long bringim ol skul pikinini long ples i go long senta long ol skul holide bilong ol. Dispela ol skul mangi bai ken abrusim skul sapos sistem i winim ol.



• Robert Lipita na Kaumbi Warab i soim bes o frisbi long fran long kar. Dispela bes ol i salim long K5 bai go long helpim Laif edukesin senta. Foto: James Kila.



Post PNG
GOING PLACES

1995

**CHRISTMAS MAIL CLOSING TIMES
BY AIR MAIL
TO OVERSEAS COUNTRIES**

AIRMAIL FOR	POST AT	
	NCD	POST OFFICE IN OTHER MAJOR PNG CENTRES
AUSTRALIA & NEW ZEALAND	19 December	16 December
ASIA PACIFIC	15 December	9 December
USA, CANADA, UK, EUROPE INCLUDING OTHER COUNTRIES	9 December	7 December

NOTE: Earlier dates will apply in some places.

Please contact your local Post Office for detail on Mail closing times in your area.

Steamships

**SUPPORTS
LIFE
EDUCATION
IN PNG.**

Steamships
TOWN & BOROKO

Stop 'n' Shop
WAIGANI

FAMILY STOP
TOWN, BOROKO & ERIMA

Colgate Palmolive givim moa sapot long Laif Edukesin

JAMES KILA i raitim

COLGATE Palmolive i gat bikpela tingting long sapotim ol skul pikinini taim ol i stap liklik yet.

Dispela em i stap aninit long wanpela program bilong ol tu

we ol i save bringim i go long moa long 2,000 skul insait long kantri. Insait long dispela program em ol i kolim long "Bright Smile, Bright Future," ol i traim long skulim

ol pikinini ol wei bilong lukautim bodi na kaikai ol gutpela kaikai we i ken helpim bodi ol i kolim nutrisen.

Wanpela bikpela wok planti manmeri na pikinini long kantri i save pinis em wok

bilong dispela kampani long kantri long helpim ol pipel long lukautim gut ol tit bilong ol.

Jeneral Menesa bilong Colgate Palmolive, Marco Poggi i tok ol i lukim olsem dispela wok bilong Laif Edukesin Senta i go wantaim dispela program bilong ol. Olsem na ol

i wok long givim sapot i go long helpim wok bilong Laif Edukesin Senta.

Mista Poggi i tok long stat bilong senta long dispela yia kampani bilong em i givim moa long K20,000. Sampela bilong ol dispela mani i bin go long wokim klasrum bilong ol long senta.

Mista Poggi i tok tu olsem dispela ol program bilong Laif Edukesin Senta i gutpela bikos dispela ol skul i save givim gutpela aidia long ol pikinini long kamapim gutpela tingting bilong ol yet.

Em i tok planti taim ol pikinini i save kisim skul i kam long ol narapela bikpela

pikinini. Tasol dispela skul long Laif Edukesin Senta i bringim' ol i go long save o tingting long wanem kain ol gutpela aidia ol yet.

Mista Poggi i tok olsem kampani bilong em bai i givim gen helpim long Laif Edukesin Senta long neks yia 1996.



• Kaumbi Warab na Teperd Peter i soim bes bilong "smile for Life" ol i save salim long shell sevis stesin long Waigani long Mosbi. Foto: James Kila.

Planti i save guria long lukim Laif Edukesin Senta

PLANTI ol skul pikinini bilong ol komyuniti na intanesenel skul long Lae taim ol i save go long Laif Edukesin Senta ol i save guria stret.

Long hap ol skul pikinini i no inap painim ol sia o des bilong sindaun. Nogat. Planti taim ol pikinini i save sindaun long flo na mekim lol wok.

Mary Siele, wanpela eduketa o tisa long senta i tok planti ol pikinini i save guria bikos long skul bilong ol yet ol i gat sia na des, tasol long senta dispela em nogat.

Misis Siele i save wok wantaim narapela wanwok bilong em Jessica Simbuna.

Misis Siele i tok planti taim ol pikinini i save amamas long lainim ol nupela samting. Tasol sampela taim ol i save poret long sanap long fran na mekim toktok.

Em i tok olsem ol pikinini bilong PNG i save guria liklik long toktok long fran, tasol ol pikinini long intanesenel skul i no save sem o poret long toktok.

Em i tok em wantaim Jessica i save toktok wantaim ol skul mangi long Tok Pisin na Inglis.

Dispela em bikos ol pikinini i mas save gut long wanem samting ol i lainim na tu ol i toktok bilong en. Taim ol pikinini i go long mekim gret wan ol i save kisim skul long helt na ol drag. Dispela ol drag em ol dispela planti pipel i save yusim olsem simok, bia na buai.

Ol tisa i save tokim ol long wanem ol kain bagarap long bodi ol i ken painim taim ol i kisim dispela ol drag.

Ol pikinini husat i wokim gret 4, 5 na 6 i save lain long ol dispela samting bilong bodi we i save painim bagarap taim ol marasin nogut bilong ol drag ya i go long en. Sampela taim ol tisa i save askim long toktok long wanem aidia ol pikinini i gat long olgeta long bung na harim.

Misis Siele i tok planti ol pikinini i no save ting olsem dispela ol samting olsem smok, bia na buai em ol drag. Planti taim ol i save ting drag em "mariwana".

Laif Edukesin Senta i go we nau

LAIF Edukesin Senta long Lae i wok gut tru na ol wok long klas i kamap gutpela tru. Tupela tisa o eduketa i long senta wok long kamap gutpela tru long ol wok bilong ol. Planti taim ol i save wok long kamapim ol program we i save sut stret long skulim ol pikinini bilong Papua Niugini stret.

Bikpela salens nau em long bungim ol laik bilong ol komyuniti. Singaut i bin kam long haikul trening, tisa trening, staf trening na ol dispela tisa bilong Laif Edukesin Senta i save go na toktok long ol dispela semina bilong helpim ol. Wok bilong bringim ap senta i ken go het long helpim olgeta kain lain pipel long komyuniti. Tasol dispela i ken go orait sapos i gat mani.

Ol pikini long olgeta hap bilong Papua Niugini i misaut. Nau yet i gat wanpela komiti long Mosbi husat i wok long statim senta long hap. Dispela komiti nau yet i wok long painim wanpela gutpela ples long wokim dispela senta. Dispela eria i mas nogat trabel na ol pikinini i ken amamas.

Wanpela gutpela rot em long wokim Laif Edukesin Senta long olgeta taun long kantri na bringim aut wok i go long ol rurel eria. Sapos yu husat i laik save moa long Laif Edukesin Senta, yu ken ring long telepon namba long Lae long 420411 o feks long 420466. Ol komiti bilong tupela senta long Lae na Mosbi i wok long painim ol manmeri husat i gat laik, ol sevis klap na ol bisnis long kamap memba.

JOHNSTON'S PHARMACY

Serving PNG for over

40
YEARS FROM 1951

Supports life education in PNG

RETAIL PHARMACIES:

PORT MORESBY: Douglas St.(P.O. Box 146, Port Moresby)....321 4424

BOROKO: Tabari Place (P.O. Box 1066, Boroko).....325 5336

Fax: 325 9411

RETAIL STORES:

KOKI MARKET: Koki (P.O. Box 1066, Boroko).....321 7318

WAIGANI: Next to Kina Mart (P.O. Box 1066, Boroko).....323 3706

ERIMA: Shopping Centre (P.O. Box 1066, Boroko).....325 2120

Fax: 325 9717

PERSONAL MAIL ORDERS:

P.O. BOX Box 146 Port Moresby, Facsimile 321 4424



Big Bro REBO



Spak MAIK



As pukpuk na palai i kamap long Wara Ramu



BIPO bipo tru long Ramu i nogat pukpuk na palai. Olgeta man meri ol i save stap gut tasol.

Long wanpela ples nem bilong em Nodubu, wanpela man wantaim meri bilong em na tupela pikinini man bilong tupela ol i stap. Nem bilong tupela pikinini man ya em Nronari na Mambokuri.

Wanpela taim bikpela hangre i kamap long Ramu na olgeta man meri i hangre. Papamama bilong Nronari na Mambokuri i tingting planti long tupela pikinini ya nogut tupela i dai long hangre.

Wanpela dei nau, papa mama bilong tupela manki ya i pasim tok long putim tupela insait long basket bilong slip na tripim tupela long wara Ramu.

Taim tupela manki i wok long pilai pilai ausait long haus, papamama bilong tupela i stretim gut basket bilong slip bilong tupela, olsem nogut bai wara i go insait.

Long biknait nau taim olgeta manmeri long ples i slip pinis, tupela papamama i kisim tupela manki ya wantaim basket bilong tupela na go daun long wara Ramu na putim long wara na wara i karim tupela manki ya i go daun.

Long moning taim nau, basket bilong tupela manki ya i go pas long wanpela diwai arere long wara. Nronari i pilim em i kol tumas na em i kirap. Em i go ausait long bas-

ket na em i lukim basket bilong Mambokuri tu i stap klostu. Em i go kirapim liklik brata bilong em na tupela wantaim i wokabut bihainim diwai i go antap long sait long wara.

Mambokuri i askim Nronari olsem, mitupela i stap we nau ya?. Nronari i bekim na i tok, mi no save, tasol mi ting papa na mama tasol i wokim dispela samting long mitupela.

Tupela liklik manki ya i sindaun long sait long wara i go longpela taim inap san i kam antap olgeta. Bihain nau Mambokuri i tok. Hei, Nronari, i go daun gen long wara na i kisim wanpela kanda long basket bilong slip bilong em. Em i kisim i kam antap na em rabim long namel bilong wanpela diwai i drai na paia i kamap.

Mambokuri i kisim sampela diwai na

tupela i wokim bikpela paia. Bihain Nronari i go antap long wanpela kapiak na em i hukim planti kapiak i go daun na tupela i kukim na kaikai.

Tasol plenti kapiak i tan pinis i stap yet, tupela i no pinisim long kaikai. Em nau tupela mangi ya i stat long pilai pilai long pait long sutim narapela long kapiak.

Nronari i kalap i go daun long wara Ramu na Mambokuri i stap antap long sait long wara. Tupela i pilai long sutim narapela narapela i go na bodi bilong tupela tu i wok long senis. Lek bilong Nronari i kamap olsem lek bilong pukpuk na as bilong em i longpela i kamap tel bilong pukpuk.

Mambokuri tu i oslem. Lek na as bilong em i kamap lek na tel bilong palai bilong kundu. Na taim olgeta kapiak i tan tupela i

sutim narapela narapela i pinis, Nronari i tokim Mambokuri olsem "Em i gutpela, yu ken stap antap na mi bai stap long wara."

Mambokuri i bekim na i tok, "Em i orait, yu ken was long wara na mi ken was long ol diwai."

Taim tupela i toktok pinis bodi bilong tupela i senis olgeta na tupela i kamap pukpuk na palai olgeta.

Nau yumi ken lukim planti pukpuk na palai bilong kundu long Ramu, em bikos ol i kamap long tupela brata ya, Nronari na Mambokuri.

Em tasol stori bilong mi, mama bilong mi Jimbegim bilong Viutobua ples long Ramu i stori long mi

Otto G Ume
Kwalakessi village
Hoskins.



□ Kanage go raun long Bugati long Madang provins. Em i go sindaun na lukluk long pilai i stap long wanpela wiken na sampela meri Bugati i lukim em na i wok long lap i stap long sait. Kanage i kisim bikpela hevi tru bikos ol meri ya i wok long lap nating na lukluk long em.

Kanage tingting i go nogat na wokabout i go klostu long ol na askim, "wanem taim yupela i save lukim mun long ples Bugati?". Na olgeta meri ya i lap no gut tru na tokim Kanage, "yu stap we na mipela i lukim pinis long aste?"

Kanage kisim bikpela amamas tru na i go bikos em i save olsem em paulim tru ol meri Bugati long dispela hap toktok.

Joke Masta
Wewak

■ Wanpela taim meri bilong Kanage i bel na i laik karim. Olsem na Kanage i hariap bringim em i go long Modilon haus sik long Madang. Kanage go bek long haus na pukim kaikai na kisim i kam sanap long haus dua bilong rum ol mama i save karim long en. Em i laik kisim kaikai i go givim meri bilong em taim wanpela nes i kam aut na tokim Kanage, "your baby is son".

Kanage harim olsem em i ting meri i karim san pikinini. Olsem na em tekov i go tokim olgeta lain long ples olsem meri i karim san pikinini. Kanage i tok sampela taim em i save wok long nait olsem na em bai hangamapim dispela san pikinini long diwai long givim em lait na em bai wok long nait. Ol lain long ples i harim na ol i tok, nogut yu paul. Em mas pikinini man ya.

Bihain meri karim pikinini i kam na em i lukim olsem nus pes bilong pikinini em olsem Kanage yet. Trangu Kanage pulim win na painim toktok long mekim.

Billy Gomola
MADANG

□ Wanpela taim wanpela lida bilong ples i askim ol yangpela man long resis long wanpela bikpela pilai we ol inap long winim pikinini meri bilong em. Resis ya em ol man bai kalap swim long solwara na go kamap long narapela ailan. Tasol ol i mas strong na abrusim ol pukpuk we bai i kam long kaikaim ol.

Kanage sindaun i go na em go daun long nambis long lukim dispela resis. Em sanap i stap na resis i stat. Olgeta man i kalap i go daun long solwara na swim i go. Kirap nogut, sampela lain long beksait i pusim Kanage na em pundaun i go insait long solwara tu. Kanage i pusim em yet long swim bikos ol pukpuk tu i kam tasol Kanage i abrusim ol gut tru na em kamap pas long ailan. Nau ol lida ya i askim Kanage long maritim pikinini meri bilong em.

Tasol Kanage i tokim bikman ya, "pikinini meri em bilong yu, haus na mani em bilong yu, olgeta samting em bilong yu yet. Tasol mi laik save husat tru i pusim mi go daun long solwara".

Willie Anton
WEWAK

■ Sampela pren bilong Kanage i kisim Kanage i go kaikai long Winjamar Beach Motel long Wewak. Kanage amamas tru bikos dispela em namba wan taim bilong em long kaikai long bikpela hotel olsem.

Ol i kaikai long tebol na Kanage i lukim olsem ol bikman i kaikai long naip na fok olsem na em tu i holim wanpela bata naip na fok long han na traim long katim mit. Tasol bata naip ya i no sap olsem na naip i wel long plet. Kanage mekim i go na belhat. Nau em singautim wetres meri bilong hotel i kam na askim em long go kisim fail bai em sapim naip ya.

Wetres meri ya i lap tasol na i go karim stek naip stret na i kam bek. Nau Kanage i lukim ol tit bilong naip ya na em wanbel long naip ya.

Willie Anton
WEWAK

Man wari long gelpren lusim em



Dia Laiplain,

Wankain olsem arapela ol man, mi gat wanpela hevi mi ting yu inap long helpim mi long stretim.

Stat long dispela taim mi bin lusim skul, mi biri i gat sampela prenmeri. Tasol tripela bilong ol tasol em ol naispela switpela ol meri stret. Wanpela taim, wanpela samting i kamap na mekim dispela ol meri i no gutpela moa long ai bilong mi.

Bihainim dispela mi tingting long painim wanpela gutpela meri stret. Na dispela i go kamap stret, mi painim wanpela angelo stret. Na mitupela i bin gat gutpela taim wantaim stret. Mitupela i no bin stap wantaim, tasol mitupela bin pren long leta na telepon. Mi save amamas stret long ai bilong ol pren bilong mi. Long wanem ol i save olsem mi gat naispela gelpren stret.

Dispela meri i save tokim mi olsem em i laikim mi stret. Tasol mi save gat narapela kain tingting. Olsem na mi ringim em. Namba wan samting em i tok em, "Mi laik givap long yu". Mi askim em long wanem as stret em i laik givap o lusim mi. Na em i tok, "Long wanem ol wantok bilong yu i laikim mi long givap long yu." Mi tokim em olsem dispela i no tru na i nogat dispela kain samting i wok long kamap. Tasol em i tok dispela em i tru na i gat dispela kain samting i wok long kamap. Em nau mi askim em long wanem dispela ol samting na em i tok em i no save. Na mi askim em gen sapos em i no save long wanem as em i bilip tru long dispela ol toktok. Bihainim dispela em i no bin tok wanpela samting.

Em nau mi tokim em olsem, em i fri wankain olsem mi na mi laikim em. Toktok bilong mitupela i pinis long dispela taim. Taim mi ringim em gen, em i tokim mi olsem em i bungim wanpela narapela man. Mi askim em long ples bilong dispela man. Na em i tok man ya long ples bilong mi yet.

Nau long dispela taim, maski mi pinis long dispela meri, mi save tingting yet long harim nek bilong em. Em wanpela meri tru stret long dispela taim bilong mi. Nau long dispela taim mi no nap tru lus tingting long nek bilong em taim em i save toktok long mi long dispela gutpela taim bilong mitupela. Na mi laik harim nek bilong em gen.

Dia Fren, Lavsik em i wanpela samting tru stret. Em i bai kamap long yu long bikpela na liklik wei bihainim wanem wei yu pilim. Sampela ol lain i save go longpela taim bihain ol i save abrusim dispela samting. Na ol arapela i save abrusim dispela samting hariap tasol. Mipela i save olsem dispela ol husat i save bungim dispela sik i save kisim taim stret.

Mipela i lukluk gut long leta bilong yu, na mipela i painim aut olsem dispela kain wei bilong yu long tok pilai raun em gutpela tru long dispela kain taim yu stap long em. Dispela kain man olsem yu husait i gat dispela

kain pasin i no nap long hatwok long painim pren.

Mipela save olsem yu no frenim dispela meri taim yu lukim em. Em yutupela i bin stap fren long leta na telepon tasol. Yu bilip tru olsem dispela meri em bilong yu stret bihainim dispela rot yu bungim em?

Yu mas save olsem naispela nek i no olgeta taim i save kam long wanpela naispela man o meri. Yu pilim tru olsem yu laikim em tru bihain long dispela taim yu save long em long leta na telepon tasol o nogat?

Dispela hap toktok laikim, em i min wanem stret long yu? Yu tok olsem yu wanpela man

TOKSAVE:

Sapos yu gat hevi, rait i kam long LAIPLAIN, Box 6047, Boroko, o ring long telipon namba 326-0011. Taim yu rait long mipela, plis putim nem na adres bilong yu. Mipela i no inap bekim pas sapos yu no putim trupela nem na adres bilong yu. Ol trupela hevi em mipela bai tokaut long dispela spes long niuspepa. Tasol mipela i no inap tokaut long nem na adres bilong yu.

Laiplain.

Ol meri yusim toilet wara long Lae Maket long wasim kaikai

Dia Edita,
Mi askim ol atoriti long Lae wantaim provinsal gavman long mekim samting long wara na tu toilet long Lae maket.

Wanpela samting mi lukim long maket i mekim na mi no amamas. Olsem na mi rait i kam long Wantok Niuspepa long stretim wari na tu long pablik na ol bikman long Lae i lukim na mekim samting long en.

Wanpela taim mi go long Lae maket, mi lukim ol mama husat i sindaun salim ol kumu kaikai wantaim ol wan wan baket wara bilong ol long wasim ol kaikai na ol kumu olsem kabis, kerot, aibika na ol arapela moa.

Orait, taim mi askim ol long wanem hap ol i kisim wara long em, ol i tok ol i kisim ausait long toilet.

Mi no amamas tumas long dispela rot we ol mama i kisim wara

bilong wasim ol kumu samting long wara paip ausait long toilet.

Mi askim long helt inspeka i sekim dispela samting na stretim. Na tu sasim ol bos na wokman bilong Lae siti atoriti long mekim gut ples bilong ol mama long kisim gutpela wara na salim kaikai bilong ol long Lae maket.

**Mona Kam'n
Lae
Morobe provins.**

Nupela provinsal rifom i gutpela

Dia Edita,
Long tingting bilong mi, provinsal gavman rifom em i gutpela bikos mi lukim olsem insait long dispela olupela gavman, i gat planti bos insait long ol provins.

Mani na sevis i save kam na pas long provinsal gavman. Na i no kari-naut ol sevis na wok hariap we ol pipel i wet long em. Nau mi klia liklik long dispela poin long provinsal na lokol level gavman rifom.

Tasol long narapela senis olsem long len rifom, mi ting em ino gutpela bikos mi no inap larim gavman long kisim graun bilong mi na sanapim wok bisnis long em. Save graun i hap laip bilong mi tru. Na bilong

Mi laik tok klia olsem mi no wok long liklik hap graun mi stap wan eantaim ol plaua, gras, diwai na wara i laik na amamas bilong mi.

Mi sapotim ol NGO na ol UPNG sumatin long rausim ol len rejistresen we Wol beng/IMF na nesanel gavman i laik kamapim hia long PNG.

Olsem na long nau mi askim yupela wan wan long holim pas graun bilong yupela bikos graun em i hap long laip bilong yumi. Em i bikipela samting tru.

**Mona Kamin
Lae
Morobe provins.**

Reks Ben wokim biknem pinis

Dia Edita,
Mi bekim pas bilong brata Maigo Kongrama we i bin kamap long wantok Niuspepa bilong Ogas 31. Brata ya i tok olsem ol Reks Ben i save singim ol nogut song.

Harim brata, Reks Ben i save katim lewa bilong yu stret. Ben ya i no save singim wanpela nogut song. Dispela singsing "Yausaganewa" we yu tok i gat tok nogut long en i song bilong Sagi Kubi Ben bilong Pindiu.

Yu wantaim ol arapela moa brata husat i rait i kam long Wantok Niuspepa na komplem olsem ol Reks ben i singim dispela nogut song i mas klia nau olsem yupela i rong. Na maski long bagarapim gutpela nem bilong Reks Ben taim singsing ya i bilong narapela grup.

Nau yu ken lukim olsem gutpela song na gutpela nem bilong Reks Ben i kisim em i go long Japan nau long pilai long hap. Na plan-ti song bilong em bai ol Japan i tanim i go long tok ples bilong ol.

Yu ting ol arapela ben long PNG i bin mekim olsem pinis o wanem?. Tingting gut na toktok bikos no gut yu sem nating long tok-tok bilong yu yet.

Em tasol komplem bilong mi na husat arapela i laik bekim em laik tasol.

**Klif Melco
Finsafen
Morobe provins.**

Mani bilong PNG i go we?

Dia Edita,
Mi gat sampela liklik toktok we mi laik autim long ol 109 palamen memba bilong yumi hia long PNG. Moa yet taim kantri i bungim hevi long mani na mipela ol grasrut lain i kisim taim tru long pei bilong ol kaikai klos samting i sut i go antap olgeta.

Mi askim gavman na ol109 nesanel memba bilong yumi olsem bilong wanem na kantri i sot long mani? Yumi gat planti rot long kisim mani long em. Sampela long em ol kopi, kakao, wel, ges, welpam, timba na pis.

Watpo na gavman i kisim bikipela dinau mani long ol arapela kantri? Husat bai i bekim dispela ol dinau? I luk olsem gavman i laik salim kantri bilong yumi ya. Mi wanpela grasrut husat i sapotim papa na namba wan praim minista bilong kantri, Sir Michael Somare.

Mipela ol grasrut i sapotim tru ol toktok we Sir Michael i bin mekim long Waigani Semina. Dispela em

long UPNG long mun Ogas bilong dispela ya.

Em bin tokaut stret long ol hevi we kantri i bungim nau na em i tok kantri i bungim hevi long mani bikos planti lida i brukim mama lo bilong kantri wantaim ol rabis pasin long paulim bikipela pablik mani.

Wanpela piksa em long EDF mani we ol wan wan memba i save kisim long go hetim ol wok long ol ilektret bilong ol. Tasol dispela planti tausena kina ya i save lus nating bikos planti ol memba i wokim wantok sistem na givim mani i go long ol haus lain bilong ol. Na sampela memba i yusim dispela mani long ol wok bisnis bilong ol. I moa gut long yusim dispela bikipela hap mani long ol arapela wok developmen insait long kantri.

Em tasol wari na tingting bilong mi. Husat i laik putim moa tingting antap em laik tasol.

**Hela Huli Igiri
Tari
Sauten Hailans provins.**

Ol meri Sepik i gat moa stail

Dia Edita,
Mi laik bekim pas bilong Tobras Tony bilong Kokopo long Is Nu Briten provins.

Pas bilong em i bin kamap long Wantok Niuspepa bilong Ogas 25. Yangpela manki, ating em i pestaim bilong yu long save long pasin bilong ol Sepik. Tasol harim, noken sutim olgeta Sepik long dispela toktok.

Yu bin tromoi wanpela tok i kam long mipela ol Sepik olsem i nogat ol stail meri long ples bilong mipela.

Yangpela, bai mi sutim yu long wanpela toktok bilong mi na yu bai skelim.


Harim gut, mipela ol Sepik i no lus long ol meri. Mi tokim yu Tobras sapos yu kam long Sepik bai yu lukim ol kain stail ol meri i stap olsem kala bilong renbo.

Sampela bai yu ting em ol meri Manus, ol arapela em ol Papua, sampela olsem ol meri hailans na sampela em ol meri wantok bilong yu, tasol sori tumas em ol PS meri ya.

Sapos yu kam long Sepik, wankain bai yu no nap tingim ples bilong yu. Sepik bai i katim lewa na bai i wokim yu sindaun silip wantaim wari. Noken tok olsem long mipela ol Sepik bikos em ples nogut we, bai yu bagarap long ol meri.

Em tasol toktok bilong mi long bekim hap toktok bilong Tobras ya. Husat i gat moa long tromoi antap em laik tasol.

**John Raun
Kreer Maket
PS kantri Is Sepik.**



• Buai i wanpela bikipela samting long kartri bilong yumi tasol ol manmeri i no save putim ol buai pipia gut taim ol save kaikaim.

Lukautim gut pipia bilong buai

Dia Edita,
Mi no amamas long lukim planti pipia bilong buai we sampela hailans lain husat i kam stap long ol blok i save wokim taim ol i salim buai bilong ol.

Mi toktok long buai we ol lain ya i save salim gen long Kamkumu maket long Lae bihain long ol i baim long Makam maket. Em i rabis pasin stret long no lukautim pipia bilong yupela.

Pasin we yupela ol buai sela na ol arapela lain i kaikai buai na tromoi skin pipia nabaut long maket i nogut olgeta. Smel bilong maket ino isi bikos long ol dispela pipia na moa yet graun i malumalun. Ol lain ino isi long karim buai na salim long hap bilong bas stop.

Mi laikim ol atoriti long Lae na tu gavman long lukluk long dispela hevi na mekim samting nau. Sapos olsem wanem salim ol dispela lain husat i nogat wok na salim buai i stap long go bek long ol asples bilong ol na mekim sampela wok long kamapim developmen long komyuniti na provins bilong ol.

Em tasol komplem bilong mi na husat arapela i laik sapotim o egesim em laik tasol.

**Alphones Bulage
Lae
Morobe provins.**

No ken hangamapim trabelman

Dia Edita,
Mi laik egesim pas bilong wanpela manki Morobe husat i bin kamap long Wantok long 9 Mas long las mun.

Brata ya i tok gavman i mas hangamapim ol raskel na trabelman long nek bilong ol inap ol i dai na bihain go tromoi ol long biksolwara we ol man i no ken lukim bodi bilong ol gen.

Mi laik egesim pas bilong yu bikos mi no

ting i gat dispela lo i stap insait long mama lo bilong kantri bilong yumi.

Dispela em wanpela nupela lo na mi ting taim PNG i kisim independens long 1975 i kam, ol i no bin kamapim kain tingting olsem long lo bilong kantri.

Na mi yet i ting olsem long kilim ol raskel o bikhet man olsem i no gutpela rot bilong daunim ol hevi bilong lo na oda long kantri. Bikos

taim man i gat gutpela amamas na sindaun bai em i no inap mekim trabel.

Tasol sapos bel bilong man i no gutpela na em i no amamas, bai em i mekim trabel. Dispela as tru bilong trabel i kamap na sapos ol lida bilong mipela i lukluk long dispela samting na traim long helpim ol manmeri long kamapim gutpela sindaun, mi no ting bai trabel olsem yumi save harim nau bai kamap.

Olsem na brata komplem bilong yu long hangamapim ol trabelman ya i no gutpela bikos yu mas save gut long as bilong trabel pastaim orait yumi sutim toktok i go long wanem samting i as bilong ol trabel na stil i kamap.

Em tasol pas bilong mi na husat arapela i laik joinim antap em laik tasol.

**Iyave Banogowa
MOSBI**

sekyuriti gad no ken smat long dua

Dia Edita
Mi laik sapotim na givim tok amamas bilong mi i go long brata Dabol Bond long Mosbi long gutpela tingting bilong em.

Mi laik sapotim Brata Dabol Bond na tok olsem tru ya ol sekyuriti tu i no save yusim het bilong ol. Ating ol bos bilong kampani yet i save kamap sekyuriti na kamap bos wantaim ol save menejim wok o olsem wanem?. Olsem na taim mipela painim wok na raun long opis na lukluk long wok ol i save askim mipela kainkain kwesten.

Yupela ol sekyuriti i gat wanem kain save? Na yupela i save laik ekt-ing bos long ai bilong ol save manmeri bilong Papua Niugini.

Sapos wok bilong yu long was long dua na lukim olsem i no gat trabel, yu noken abrusim dispela wok bilong yu.

Em wok bilong ol plisman long askim ol manmeri long painim trabel lain.

Seketeri bilong bos tasol inap tokim mipela sapos bos i stap long opis o i no stap long opis. Na seketeri yet bai tokim mipela long wet o kam bek gen taim bos i kam bek long opis. Na i no yu sekyuriti man long dua.

Sampela sekyuriti tu i save tok i nogat wok na mipela i save paul tru sapos em i praiwet sekyuriti bilong bos. Plis ol sekyuriti gad, no ken so op na smat long mipela bikos sampela bilong mipela i gat moa save long wok na gutpela referens bilong wok wantaim eksperiens.

Husat i laik sapotim o egesim em orait tasol na mi bai amamas tasol long lukim.

**Nomecks Disko
PTC Trening Koles
Lae**

Daunim PMV fea long Talasia na Kimbe

Dia Edita

Mi wanpela pikinini Talasia insait long Wes Niu Briten provins. Mi laik autim wari na komplek na wari bilong mi long yupela ol PMV asosiesen. Na papa bilong ol praivet ka insait long Talasia Distrik.

Olsem wanem, bai mipela ol manmeri bilong ples i wok long westim K2 long baim ol praivet ka long Talasia-Kimbe.

Mi no save long ol praivet ka, sapos yupela ol boi bilong ol praivet ka i daunim pe bilong yupela long K1 Talasia-Kimbe, em bai orait. Na wanem samting yupela i apim pe i go antap tumas. Em yupela

stilim mani bilong ol man na yupela stilim mani bilong ol PMV ka tu.

Mi save lukim ol praivet ka ya, Ol i save resis sapos em pe dei bilong ol kampani long Talasia-Kimbe. Dispela i no gutpela pasin liklik. Olsem na ol lain bilong PMV Bod mas lukluk gut long dispela pasin.

Sapos yu husait Tarina o Brata i laik sapotim mi, laik tasol.

Matasia Nicky
Talasia Kimbe.

Hailans na Momase musik i top stret

Dia Edita,

Mi wanpela manki long Rabaul ENBP. Mi laik joinim na antapim sampela moa tingting long pas bilong brata Richard. Pas bilong brata Richard i kamap long Wantok Ing Julai 27.

Mi gat bikpela amamas tru long sapotim pas bilong Richard. Long wanem planti taim ol lain bilong EMTV i save pilaim ol musik bilong ol Tolai na Sentral provins tasol. Ol musik bilong hailans na Momase rijen i nogat tru.

Plis yupela ol wok manmeri bilong EMTV Fizz i mas traim pilaim musik bilong mipela hailans na Momase tu ya. Mi ken tokim yupela stret, yupela ol wok manmeri bilong EMTV, yupela save mangalim musik bilong ol Tolai na Sentral provins.

Dispela musik bilong ol Tolai i no save singsing long wanpela gutpela samting nogat tru. Mi tokim yupela stret, ol i save singsing long ol meri tasol.

Yupela ol wok manmeri bilong EMTV, yupela i no save pilaim

tumas musik bilong hailans na Momase. Yupela i noken wansait tumas. Yumi mas wok bung wantaim na mekim kantri i go.

Yupela traim pilaim ol musik bilong ol hailans na Momase rijen na lukim wanem kain samting inap kamap. Musik bilong mipela i gat kik ya.

Em tasol tingting bilong mi na husat arapela i laik bekim em laik tasol.

Kupu Paul
Rabaul

No ken yusim sios long wok bisnis

Dia Edita,

Mi laik autim komplek bilong mi i go olsem ol nem bilong lotu o wok bilong yut grup i no nem bilong kisim biknem o wok bisnis.

Mi lukim planti sois i yusim nem bilong ol long wok bisnis na pulim mani na samting bilong gavman na ol manmeri.

Mi ting dispela i no stret bikos sios i gat wok bilong em yet long wokim na i no bilong sanapim bisnis.


Long dispela as, mi ting ol sois husat i wok long mekim dispela kain pasin i laik kamapim wok bisnis na pulim moa manmeri i go insait long amamasim ol wantaim bisnis bilong ol. Dispela i olsem pasin bilong grisim ol manmeri long sensim bilip bilong ol.

Sapos yu wanpela sios husat i wok long mekim wok bisnis antap long nem bilong sios, yu mas tingting gut bikos i gat taim bai yu kisim mekimsave bilong dispela pasin giaman.

Yu i no inap long sevim tupela masta bikos yu bai laikim narapela na luk no gut long narapela.

Em tasol komplek bilong mi na husat i laik egensim o sapotim em laik tasol.

BEN KENORI
MOSBI



• Alfred Sibut i wanpela musik man long kantri bilong yumi.

Memba yet i daunim nem bilong em

Dia Edita

Mi laik bekim pas bilong brata Henry Kons i bin kamap long Septemba 7 long Wantok niuspepa. Em i bin tok olsem Dick Mune i no bin stapim pait.

Brata mi laik sapotim yu olsem, olsem wanem samting Dick Mune i bin wokim long ol lain bilong em, yumi olgeta i harim pinis.

Na brata yu noken belhevi long dispela

kain rabis pasin em i bin wokim long ol lain bilong em.

Brata, em i no wanem kain man em i bin wokim dispela kain rabis pasin long ol lain bilong em.

Nogat. Em i maus man bilong yumi na tu em i rijenal memba bilong yumi ol Sauten Hailans provins.

Mipela olgeta pipei bilong Sauten Hailans provins i no votim yu

long wokim wansait sistem pasin.

Nogat, mipela votim o makim yu bilong lukluk long ol pipel we ol i nidim developmen o lukluk long ol pipel we ol i karim hevi olsem pait i kamap namel long haus lain tu haus lain o distrik tu distrik.

Mipela makim yu long putim ai long dispela kain pasin na stapim ol na givim ol na givim ol

gutpela advais o pis long ol pipel.

Mi wanpela tu mi bin belhevi liklik long dispela kain pasin em i bin wokim long ol pipel. Em i orait na bai yumi lukim em long 1997 ileksen.

Em tasol na yu husat i laik egensim o sapotim mi, rait tasol i kam long Wantok niuspepa na bai mi lukim.

Banny Wak
Nipa SHP

Is Sepik provins i stap las yet

Dia Edita

Mi wanpela manki Goroka insait long Isten Hailens Provins. Tasol nau mi stap long Wewak Is Sepik provins na mi kamap olsem pikinini Sepik o PS.

Wari bilong mi i go olsem, mi no lukim planti ol bisnis kampani olsem long Lae Madang na 5-pela arapela Hailens provins.

Na mi tokim yu sapos yu raun long wansait taun bilong Wewak, bai yu lukim ol bisnis bilong Garamut tasol. Em olsem wanem?

Watpo na ol politisen bilong Is Sepik lukluk na kisim planti Foren kantri i kam insait long provins. Na divelopim provins na bai gat planti

wok bilong ol manki raun nating na wokim bikhet pasin.

Na bikpela samting, Papa bilong mipela Papua Niugini na namba wan Praim Minista Sir Michael Somare em provins yu bin kam long em. Ating moabeta wokim Is Sepik provins i go moa na winim ol narapela provins. Nogut bai ol narapela provins bai lap long yumi Is Sepik.

Is Sepik i stap bihain tru long planti arapela provins long PNG na dispela i no gutpela tru. Em tasol yu husait i laik rait sapotim o egensim rait i kam tasol.

Kumi Bade Tove
Wiwek ESP

Song bilong Sagik Kuklik i no tok nogut

Dia Edita

Mi wanpela manki Pindiu P3 insait long Finsafen 73K. Mi laik bekim pas bilong Maigao Konglana wantok No. 1105. Yes brata yu save komplek long song bilong mi. Na yu i no bilong Pindiu Finsafen. Yu bilong Nabak o Boana.

Mi laik tokim yu olsem mi yet em papa bilong dispela song em Yao Sagakga Newa Waina Kembo. Em olsem tumbuna singsing bilong ol tumbuna bilong mipela. Tasol mipela putim long kaset bilong mipela. Nem bilong ben bilong

mipela em Sagik Kuklik Volum wan.

Pindiu Nec. Mining bilong song olsem wanpela man em bin laik luk stil long ol birua bilong em. Na em i hait i go na birua bilong em i holim em na askim em, "yu laik wokim wanem na yu kam long hap bilong mipela? Nau bai yu pinis long maus bilong mipela. Em nau man ya i nogat tok bilong mekim olsem na em i tok: brata mi dring blut bilong bodi bilong yu inap long yu lusim mi i go. Long wanem mi marit niupela tasol na meri bilong mi i gat bel i stap. Sapos yu kilim mi,

husait bai lukautim tupela.

Nau birua man em sore tru long dispela tok na em larim man ya i go bek.

Em tasol. Na brata Maigao yu kisim ol kain ekstra mining o tok ples long wanem hap kona stret.

Sapos yu bilong Nabak, mi no ting bai yu inap long mekim kain nek olsem. Maski long maus op long pepa. Na bagarapim Reks ben na Sagik Kuklik.

Mi Sagikne
Sagik Merak
Pindiu P3
Finsafen 73K

Kimbe taun i no gat pablik toilet

Dia Edita

Mi laik komplek long Kimbe Taun. Planti taim mi save raun long ol hap taun, i gat ol pablik toilet. Kimbe tasol i nogat.

Olsem na mi askim yupela ol taun kaunsol. Inap yupela i putim wanpela pablik toilet long Kimbe taun o nogat?

Mekim na mipela ol pipel i save go long taun long stua o maket samting na mipela i save kisim taim stret long painim toilet.

Moa gutpela sapos yupela i harim tok na wokim toilet.

Dispela kain pasin bai kamapim bikpela sik na hevi long taun bikos ol manmeri bai stat long yusim ol bus nabaut na mekim ples i pulap long doti na smel.

Sapos Kimbe Taun Atoriti i nogat moni orait em i mas askim ol nesanel memba bilong provins long kam insait na lukluk long kain hevi olsem. Bikos dispela em ol kain hevi we bai i stap insait long komyuniti bilong ol pipel.

Dispela samting em hevi bilong longtaim yet na i no gat wanpela samting i kamap long en. Na mi save olsem planti lain long narapela provins husat i kam stap long Kimbe bai komplek tru long dispela kain samting. Sapos yu husat i save bungim kain hevi olsem rait tasol i kam bai mi lukim.

Daivit Kapari
Mendi
Sauten hailens Provins

Olgeta memba bilong Madang bai lus

Dia Edita,

Mi laik autim komplek bilong mi i go long open memba bilong Madang provins, Stanley Pil.

Mi no harim liklik nem bilong dispela man long redio o lukim long niuspepa long wanem samting em i wok long mekim nau. Man ya i pasim maus na sindaun o em i hait pinis long wanpela hap?.

Mi lukim em i wok long dring raun long ol hotel wantaim ol hailans lain na dispela i no gutpela tru bikos em i no givim wanpela taim bilong em liklik long bung wantaim ol pipel bilong Madang na toktok long ol samting na hevi bilong pipel.

Mi lukim pasin bilong dispela memba i no gutpela bikos ol manmeri i westim taim bilong ol long votim em na em i mas stap klostu long ol pipel.

Wanpela memba tasol em rijenal memba, Peter Barter husat i wok

long mekim bikpela wok tru na toktok gut wantaim ol pipel. Em i givim tu ol gutpela helpim na sapot long ol pipel na mipela i amamas tru long em.

Mipela ol pipel bilong Madang i lukim olsem Peter Barter em memba tru bilong ol pipel na mipela i givim bikpela sapot bilong mipela long em long i ken stap narapela 5-pela kris-mas moa long palamen.

Ol arapela lida bilong Madang provins em mi no klia long yupela long winim gen 1997 nesanel ileksen.

Bikos olgeta memba ya i no gat wanpela gutpela bung wantaim o toktok i go long ol pipel bilong ol insait long Madang provins.

Ol i go long palamen na go olgeta.

Em tasol komplek bilong mi na husat arapela i laik bekim em laik tasol.

JACK ALPHONSE
MADANG

WANTOK PABLIK NOTIS

MIRI AIORI EXT. 214
JEFFREY MALIOU EXT. 215
JOE NAIME EXT. 218

Sapos yu laik advertais, telepon 25 2500 na askim long

BUK BILONG OL SEVISIS

COFFEE MACHINERY

Montale Pty Ltd Ph: 72 2611
Fax: 72 2612

Mipela Agen bilong Pinhalense Kopi Masin. Pulpers, Driers, Hullers, Destoners, Gravity Separators, Elevators na sampela moa.

Oigeta Kopi masin em mipela i gat inap. Kam lukim mipela nau mipela inap helivim yu.

CHRISTIAN BOOK CENTRE

LAE & MADANG

Educational/Christian books
English/Pidgin/Tok Ples

Gifts & school stationery
Nanulon St, Madang
Ph: 82 2043 Fax: 82 3376


4th St Lae
Ph: 42 4156
Fax: 42 7073

ELECTRONIC

PAPA BILONG OL TV
SAPOS TV BILONG
YUPELA I BAGARAP
SEKIM WANTAIM MIPELA

O KAM NA LUKIM MIPELA LONG OLGETA
LEKTRIK SAMTING YU LAIKIM.

■ SPARE PARTS ■ TOOLS ■ EQUIPMENT
■ REPAIRS TO T.V.'s, RADIOS, ETC.



HAIR & BEAUTY

We manufacture hair and beauty products. We wholesale, retail, large range of black hair products. We sell hair pieces and hair equipment. If you manage a salon or would like to open one, we will provide you best quality products at best prices. If you prefer any U.S.A. hair product and you cannot find it here, we will get it for you. Any questions about your hair product you use or braiding, our chemist and cosmetologist are here to help you.

EF - KAY PARADISE PRODUCT CO. PTY. LTD.
Steamships Hardware Compound Properties,
Waigani Drive, NCD. Ph/Fax: (675)
325 0519, P.O. Box 1671, Port Moresby.

HAIR & BEAUTY

His N' Hers HAIR SALON

All Hair Care

Black Hair
&

Beauty Products

42 1843

P.O. Box 1721, Lae, Central Arcade.

"SOMIL"

TOKEN & ZEACAN

Portable Sawmills
Strongest light-weight mills in P.N.G.

Saws 1m3 per hour
New Auto Feed

PRICES START AT K21, 000

For Saw Blades, Filters, Belts, Files, Teeths, Holders, etc.

Contact:

TIMBERSAWS (PNG) PTY LTD.

Laurabada Avenue Lae

Phone: 42 7015 Fax: 42 7673

PO Box 318 Lae

WOKABAUT SOMIL

Petersen Portable Sawing Systems (PNG) Pty Ltd.

I nambawan somil long Nu Silan na i gutpela tru long
of Papua Niugini.

I no hevi, na pe bilong em inap long K15,389 tasol.
Ken katim moa long 8m3 inait long wanpela de.

Het Opis: Madang Telepon/Fax: 82 3482, P.O. Box
2118, Madang *Ajensi: Pot Mosbi - Track Co.

Telepon: 325 8766, Fax: 325 8757. *Ajensi: Wewak

Telepon: 86 3012.

Trening na Infomesen Lae - Telepon: 42 4029 Fax:
42 3586.

Mipela i welkamin ol lain husasit i laik save moa long
Petersen Wokabaut Somil long ol arapela senta o
ajensi.

*Yu ken edvetais hia long **K10** tasol
long wanpela wik. Long painimaut
moa long dispela, ringim Augustine,
Jack or Joe long telipon
namba 325 2500.*

PUBLIC NOTICE

FUNERAL HOME NAU I OP

Noken wari tumas
Ringim mipela na
mipela ken stretim
wari bilong yupela

I gat ol nambawan
Kofin bilong salim

PH: 45 7766
FAX: 45 7073

PNG'S only Business newspaper!

PNG BUSINESS

50¢



NOVEMBA KOPI BAI KAMAUT KLOSTU!

WANTOK
NIUSPEPA BILONG OL PAPUA NIUGINI STREET

Sapos yu laik advertais, telepon 25 2500 na askim long
Phone: Miri Aiori Ext. 214, Jeffrey Maliou Ext. 215, Joe Naime Ext. 218

PABLIK NOTIS



PNG Teachers Savings and Loan Society Limited

PABLIK TOKSAVE

PASIM OL BIKPELA LON APLIKESAN BILONG 1995

Toksave long olgeta fainensal memba bilong mipela olsem "Jeneral Pepos Mesa Lon Aplikesen bilong dispela yia 1995, bai pas long 31st Oktoba, 1995 inap 28th Februari, 1996.

Arapela bikpela lon we i kam bihain long dispela taim bai i no gat ansa bilong em. Ol lon bilong skul fi tasol bai mipela i stretim.

Lon aplikesen bilong ol skul fi i mas kam wantaim opisel ripot bilong dispela skul. Kos bilong skul fi wantaim arapela fi we skul bai sasim i mas stap klia long dispela aplikesen pepa bilong yu.

Bai mipela i lukluk long olgeta lon aplikesen bilong ol skul fi long mun Jenuari, 1996.

IVAN KEROWA

Siaman- Nesenel Lons Komiti

25th Septemba, 1995

**Sapos yu laik salim toksave o
edvatasim spes long**

WANTOK

***ringim 25 2500 na askim
sels dipatmen***



WANTOK

Niuspepa bilong Papua Niugini stret

25 yia nau

THE PAPUA NEW GUINEA BUSINESS AWARDS 1995

ORGANISED BY WORD PUBLISHING COMPANY PTY. LTD.
IN ASSOCIATION WITH THE BUSINESS COUNCIL OF PAPUA NEW GUINEA, THE AUSTRALIA
PAPUA NEW GUINEA BUSINESS COUNCIL AND THE PAPUA NEW GUINEA AUSTRALIA BUSINESS COUNCIL



BUSINESSMAN	-	Sponsored by:- Ela Motors	
BUSINESSWOMAN	-	Sponsored by:- Steamships Trading Company	
SMALL BUSINESS (Two Awards) CATEGORIES - Male - Female	-	Sponsored by:- Australia Papua New Guinea Business Council	
EXPORT AWARD	-	Sponsored by:- Shell Papua New Guinea	
MANUFACTURING	-	Sponsored by:- Westpac (PNG) LTD.	

The **BUSINESSMAN OF THE YEAR** will receive return tickets to Brisbane with four nights accommodation Courtesy of Qantas and Travelodge and a trophy plus K1,000 worth Ela Motors products donated by Ela Motors.
The **BUSINESSWOMAN OF THE YEAR** will receive return tickets to Brisbane with four nights accommodation Courtesy of Qantas and Travelodge and a trophy plus K1,500 worth Steamships Hardware products and access to Steamships Training Programme.
The **SMALL BUSINESS OF THE YEAR** will receive return tickets to Cairns with four nights accommodation Courtesy of Qantas and Travelodge and a trophy plus an appropriate training course sponsored by Australia Papua New Guinea Business Council.
The **EXPORTER OF THE YEAR** will receive return tickets to Brisbane with four nights accommodation Courtesy of Qantas and Travelodge and a trophy plus K500.00 cash donated by Shell Papua New Guinea.
The **MANUFACTURER OF THE YEAR** sponsored by Westpac Bank, details of the award yet to be advised.

Award winners will also receive a trophy and a certificate signed by the Governor General.

Nominations for these awards should be made on the form below:

All nominations will be treated by the panel of judges in the strictest confidence.
Businessman, Businesswoman, Small Business, Export Award and Manufacturing Award.

Name of the Business person: Name of Business he or she operates:
Address of the Business he or she operates: Telephone:
Time since business commenced: years Nature of business:
Your reason for nominating he or she to be **BUSINESS PERSON OF THE YEAR**
(eg: Created new job, created new export market, found new uses of local produce and mention all special achievements)

* Please tick the box below to identify the award you are nominating.

(1) BUSINESSMAN <input type="checkbox"/>	(2) BUSINESSWOMAN <input type="checkbox"/>	(3) SMALL BUSINESS - MALE <input type="checkbox"/>
(4) SMALL BUSINESS - FEMALE <input type="checkbox"/>	(5) EXPORT AWARD <input type="checkbox"/>	(6) MANUFACTURING <input type="checkbox"/>

Nominated by:
Name: Address: Telephone:

Note:- *THE PAPUA NEW GUINEA EXPORT AWARD IS OPEN TO EXPORTING COMPANIES WITH AT LEAST 51 PERCENT NATIONAL OWNERSHIP.*
WHAT TO DO: Provide supporting details of your Company's export achievements in 1994, eg, volume percentage increases, new markets, new products, etc. Growth in turnover profitability employment and the of business are essential consideration. So be specific when nominating.


ENTRIES CLOSING DATE, 6th NOVEMBER, 1995.
Send your details or enquiries to: THE ADVERTISING MANAGER, JAMES DELISLE, WORD PUBLISHING COMPANY PTY. LTD.
P.O. BOX 1982, BOROKO, NCD, TEL: 325 2500 - FAX: 325 2579.

THE AWARD DINNER WILL TAKE PLACE ON WEDNESDAY 15th NOVEMBER AT THE PORT MORESBY TRAVELDGE AND WILL BE HONOURED BY THE PRESENCE OF THE GOVERNOR GENERAL SIR WIWA KOROWI.

OL SPOT POTO BILONG MOSBI




□ Crazy Colours em wanela skul tim husat i pilai long gren fainel bilong volibal resis long las wiken.



□ Volibal resis bilong ol studen long Mosbi long las wiken. Dispela em gren fainel we i pinisim olgeta resis.




□ Rural Development Bank volibal tim husat i bin pilai long Bankers volibal resis long Mosbi. Potos: MichaelSogoromo.



□ Sofbal resis bilong ol meri long Mosbi i stat pinis na ol meri i kilim skin nau long pilai.



□ Golkipa bilong GFC i kalap long holim bal na PNG straika Steven Mune i sanap lukluk long em.



□ Yangpela ya autim tru stail bning pilaim volibal long las wiken long Mirinda Volibal resis bilong ol studen.

PORT MORESBY SOCCER ASSOCIATION
SOCCER DRAW - WEEK 25
Saturday October 28, 1995

Table with soccer match details including time, team names, and venue for Bisini 1, Bisini 2, and Sunday October 29 1995.

UNAGI OFF-SEASON LEAGUE
ROUND ONE WEEK 6 DRAWS
DATED: 28/10/95

Table with soccer match details including time, field, club names, and grade for Unagi Off-Season League Round One Week 6.

GEREHU NETBALL DRAWS
SATURDAY OCTOBER 28, 1995

Table with netball match details including time, team names, and venue for Gerehu Netball Draws.

POM BANKERS VOLLEYBALL ASSOCIATION
DRAWS
VENUE: GEREHU VOLLEYBALL COURTS
DATE: 25/10/95

Table with volleyball match details including time, game number, team names, and venue for Pom Bankers Volleyball Association.

POM WOMENS SOFTBALL ASSOCIATION
A GRADE DRAW
Saturday October 28, 1995

Table with softball match details including time, team names, and venue for Pom Womens Softball Association.

GEREHU TOUCH RUGBY DRAWS
SATURDAY OCTOBER 28 1995

Table with touch rugby match details including time, team names, and venue for Gerehu Touch Rugby Draws.

LAE WOMENS SOFTBALL ASSOCIATION
1995-1996 SEASON


Participating clubs:
YMCA, Bankers, Bismark, Defence, Manolos, Taubar, Karanas, Aviat, Coronation, Malangan, Elcees, Medics and Katoiu

Week two draws Saturday October 28, 1995


Table with softball match details including time, team names, and venue for Lae Womens Softball Association.

PORT MORESBY MENS SOFTBALL ASSOCIATION
1995-1996 ROUND 1 - WEEK 4
Sunday 20 October 1995
Diamond 1

Table with softball match details including time, grade, team names, and venue for Port Moresby Mens Softball Association.




* Tupela plaia pait long bal long Pot Mosbi basketbal competisen. Foto: Joe Ivahana

FRENCHBAKEHAUS

 • CAKES
 Weddings & Birthdays
 Our speciality
 25 1266 Pom
 42 5349 Lae

PROVINSAL

SOKA NIUS

FRENCHBAKEHAUS

 • CAKES
 Weddings & Birthdays
 Our speciality
 25 1266 Pom
 42 5349 Lae

Wewak Posinu brukim rekot

POSINU Soka Klap bilong Wewak i brukim bikpela rekot long Papua Niugini long kamap olsem wanpela sempion klap insait long kantri.

Posinu i bin kamapim bikpela rekot tru long winim pri sisen fainal, Ista Kap resis long Wewak, winim John Tekwie Sil long Vanimo na nau em i redi long pilaim gren fainal long Wewak soka resis long neks wiken.

Posinu i bin kamap tu long nesanel klap sempionsip long Lae long mun Jun. Na em i bin soim wanpela stail gem tru taim em i

pilaim Yunivesiti husat em wanpela biknem tim bilong Mosbi.

Mosbi i bin win 1-0 long dispela gem tasol stail bilong Posinu tasol i pulim tru bikpela sapot long ol manmeri long sait lain.

Posinu i bin salim tim bilong em i go long Vanimo long pilaim bikpela soka tonamen bilong John Tekwie Sil long Septemba. Dispela taim em i soim planti soka tim long Vanimo, Ramu, Tabubil na arapela husat i bin kamap olsem em i sempion tim bilong Wewak. Olsem na

WEWAK SOKA RIPOT

em i winim dispela Tekwie Sil tonamen.

Klap menesa bilong Posinu, Bruce Sembang i tok Posinu i brukim tru rekot bilong PNG bikos planti klap i no save mekim kain samting olsem insait long wanpela yia. Ol klap i save win long wan tasol.

Sembang i tok Posinu i soim olsem em i wanpela strongpela tim

long PNG na i ken autim tiket bilong ol bikpela klap long Mosbi na Lae bikos long kain rekot em i kamapim.

Posinu i bin pilaim maina semi fainal pinis wantaim Wewak Ice husat em wanpela strongpela tim bilong Wewak tu long las wiken. Na em i win 2-1 long fultaim.

Wewak Ais bai pilaim ol boi bilong Wewak Eels husat tu i bin nekim Gawi 1-0 long fultaim long las wiken.

Posinu na Wewak Ice i namba wan namba tu tim long poin lata

olsem na tupela i pilai long painim wina bilong go wetim gren fainal. Wewak Eels na Gawi i stap namba tri na namba foa. Olsem na lusa bilong tupela bai hangamapim su na wina bai pilaim Wewak Ice long neks wiken we wina bai i go gen na pilaim gren fainal egensim Posinu.

Sembang i tok em i gat bikpela bilip olsem Posinu bai winim yet gren fainal long dispela yia bikos long kain hatwok ol i bin go insait long em na kamapim long dispela yia.



• Ol boi Blue kumuls bilong LFA, Lae. Ol tu i gat stail na nau maina primiasip taitel long Lae. Foto: Alphones Pu.



• Ol susa nogut bilong Vanimo husat tu i bin givim bikpela salens long John Tekwie Sil. Foto: Ari Haba.

Lahi paia long gren fainal

SOBOU bai bungim Guria long gren fainal bilong Lahi Soka Asosiesen (LSA) long neks wiken long Lae. Dispela wiken bai i no gat gem. Dispela bai wanpela bikpela na strongpela gem tru bikos tupela tim wantaim i gat biknem na eksperiens pilaia i stap. Tupela tu i olpela na biknem klap husat i bin bruk lusim LFA i go wokim nupela asosiesen ya.

Sobou husat em maina primia i bin winim sans long gren fainal ya long narapela wik i go pinis. Na em i wetim tasol Guria na Asiawe long pilai na painim wina.

Guria i bin bungim Asiawe long las wiken na pilaim wanpela strongpela gem tru wantaim em. Asiawe i bin netim namba wan gol i go insait long umben bilong Guria na kirapim paia long winim Guria. Tasol fulbek bilong Asiawe, Eli Memelong i bin kamapim birua taim em i wokim han-bal insait long penalti eria. Yangpela nesanel pilaia bilong Guria, Hanz Fred i kikim dispela penalti na mekim skoa i level long 1-1.

Long fultaim tupela tim wantaim i dro 1-1 olsem na referi i larim tupela i go moa long ekstra taim. Long ekstra taim i nogat skoa i

LAHI SOKA RIPOT

kamap olsem na tupela i go gen long penalti kik.

Long penalti kik, Guria i soim tru dispela eksperiens bilong em long kikim olgeta 5-pela gol i go insait long golmak bilong Asiawe na Asiawe i kikim tasol tupela. Olsem na fultaim skoa em Guria i win 6-3. Long dispela wiken bai Guria i bungim Sobou na dispela bai wanpela bikpela gren fainal.

Sobou i gat planti stail pilaia olsem John Laskam, Harrison Kamake, Richard Daniel, Harold Kawambara, Godfried na arapela moa. Ol i gat gutpela lain ap na gem plen we inap helpim ol i givim hevi long Guria.

Tasol Guria i kam long longpela rot na em i wok hat i kam. Olsem na em bai i no inap givim isi gem long Sobou. Ol yangpela manki bilong Guria olsem, Hanz Fred, David Panap, Chris Nagai, Eddie Fred, Kelly Jim na arapela moa inap wok bung wantaim long kamapim strongpela difens egens Sobou.

Sobou o Guria bai win taim narapela i mekim ol lik-

lik asua na i no tingting hari-ap long go bek na banisim posisen bilong em. Long gren fainal bilong ol meri bai ol susa bilong Guria na Gaziga i bung. Gaziga i bin autim tiket bilong ol meri Asiawe long las wiken na nau bai em i bungim Guria long gren fainal.

Ol meri Makam tu i gat nem long kain strongpela kik na pawa ron bilong ol. Tasol Guria tu i gat hap liklik i stap long bekim. Sapos Guria i holim strong stail bilong em na i no pundaun long pawa bilong ol meri Makam, em bai lusim dispela gren fainal taitel i go long ol meri Makam.

Long gren fainal bilong Divisen 1 em Sunkist bai bungim ol boi nogut bilong Avetau. Na dispela em gren fainal taim olsem na planti bun na bai pairap na stail bai bruk long ol wanwan pilaia long winim ol gem bilong ol.

Gren fainal bilong ol yangpela manki long Anda 19 bai i stap namel long Sikambu na Sibou long dispela wiken. Dispela wiken em gren fainal taim bilong Lahi Soka Asosiesen (LSA) na Sir Ignatius Kilage Spot Stadium bai paia stret long ol manmeri na sapota long go sapotim ol feveret tim na klap bilong ol.

LFA pilaim las gem long dispela wiken

LFA SOKA RIPOT

LAE Futbol Asosiesen (LFA) i kamap klostu nau long pinisim olgeta soka resis bilong em long dispela wiken. Dispela wiken bai planti tim i pilaim ol laspela pilai bilong ol.

Ripot i kam long LFA i tok olgeta pilai i kamap long mak bilong pinis nau bikos planti primia tim i gat wan wan gem i stap long pinisim olgeta resis bilong ol. Dispela wiken bai olgeta tim ya i pinisim ol dispela wan wan gem bilong ol.

Long las wiken gem, bikpela salens tru i bin kamap namel long ol primia gem we Blue Kumuls i soim bikpela strong tru long nekim Saints 6-1 long fultaim.

Kumuls i bin redi gut tru long pilaim dispela gem na em i no laik lusim dispela gem i go nating. Bikos em tu i gat gutpela sans long pilai insait long nokaut bilong LFA taim eksekutiv i sindaun na tokaut long ol fainal tim bilong kik long fainal.

Long dispela as, Kumuls i no westim taim long skorim ol gol bilong ol. Kumuls i bin yusim gut tru olgeta sans em i bin bungim long mekimsave long ol Saints manki wantaim dispela 6 skoa long fultaim.

Saints i painim hat long stapim ol dispela gol long kamap bikos ol boi bilong Kumuls i no-moa pilai pilai long dispela gem bilong ol.

Arapela primia gem em Mopi i bin dro 0-0 wantaim ol manki bilong West bilong West Taraka.

Dispela tu i bin wanpela strongpela gem bikos tupela tim wantaim i gat ol gutpela na

strongpela pilaia i stap long tupela sait wantaim. Tupela tim wantaim i gat planti yangpela manki husat i save pilaim ol stail gem. Olsem na tupela i wok hat long brukim umben bilong narapela tasol difens i tait moa na tupela dro 0-0 long fultaim.

Buresong tu wantaim Jaura i bin dro 1-1 long fultaim insait long wanpela bikpela na strongpela gem. Dispela em ol las gem bilong ol olsem na ol tim i wok long traim kamapim gutpela risal long poin lata bilong ol.

Telikom i bin kisim wanpela isi win egens ol studen bilong Yunivesiti bikos ol i no kamap long pilaim dispela gem. Olsem na Telikom i kisim isi 3 poin long pofit na dispela inap apim skoa bilong ol i go moa we inap soim olsem Telikom i ken kamap maina primia.

Ol poin lata i no kamaut ples klia yet tasol i gat luksave olsem PTC i go pas long poin lata na Blue Kumuls i bihainim.

Ol eksekutiv bilong LFA i no tokaut yet long dispela samting bikos ol i mas sindaun gut na lukluk gen long olgeta gem na poin lata bilong ol. Na dispela inap mekim ol i tokaut long husat em maina primia bilong LFA long dispela yia.

Mitif i soim stail tru bilong em las wiken taim em i nekim ol bilong Goro 2-1 long las wiken.

Dispela i bin wanpela strongpela gem namel long Goro na Mitif tasol ol boi Mitif i gat ekstra strong olsem na ol i skorim las gol na winim gem ya.

Yuni winim ples long gren fainal

Lyna Waho i helpim ol meri Yunivesiti i go long gren fainal bihain long em i skorim las gol egensim Guria long las wiken kota fainal long Mosbi soka resis. Yunivesiti bai go redi long gren fainal long neks wiken taim Guria i pilaim wina bilong Waliya na Sunam.

Lyna Waho i kamapim dispela gol taim em i kisim wanpela gutpela bal long Serah Gewabing na em ron abrusim Tabitha Suwae na Nelie Taman bilong Guria na skoa. Dispela em long ekstra taim bilong gem taim tupela i bin dro 1-1 long fultaim.

Insait long dispela kota fainal bilong ol meri, Yunivesiti i bin kamapim gutpela tim tru long traime winim dispela sans. Ol i putim ol gutpela pilaia olsem, Serah Gewabing, Anneth, Elizabeth Turia, Lyna na ol arapela moa. Yunivesiti i kamapim strongpela gem egens Guria long stat bilong pilai i go long haptaim we tupela i no skoa.

MOSBI SOKA RIPOT

Long namba tu hap bilong gem, Guria i opim rot wantaim namba wan gol taim Roose Suwae i ron i go abrusim tupela beklain bilong Yuni na skoa. Tasol Roose i bin bungim liklik hevi long lek bilong em na i go ausait long fil. Dispela i lusim Guria wantaim 8-pela pilaia tasol.

Olsem na Yunivesiti kisim dispela sans long putim presa antap long Guria. Na long dispela taim, Tabitha yet i kamapim wanpela han bal na Serah Gewabing bilong Yuni i kikim i go abrusim Christine Petrus long golkipa na i go insait.

Tupela i dro 1-1 inap fultaim we ol i go gen long ekstra taim na Yunivesiti i winim gem taim Lyna i bomim umben bilong Guria.

Gem bilong ol meri Sunam na Waliya i no bin pinis gut bikos

referi na lainsmen i straik na lusim pilai graun i go ausait.


Dispela hevi i kamap taim wanpela sapota bilong ol meri Sunam i toktok strong wantaim lainsmen na pusim lainsmen long kros na lusim pilai.

Tupela i bin dro 1-1 long fultaim na i go long ekstra taim bilong painim wina bilong pilaim lusa bilong Yuni na Guria long dispela wiken.

Ol referi i no mekim disisen bilong ol yet long wanem samting ol bai mekim long holim gen dispela pilai bilong ol meri.

Gem bilong Sunam na Waliya i bin wanpela strongpela gem tru bikos tupela tim wantaim i redi gut long pilai na i laik win long go pilai long semi fainal.

Sunam i gat ol gutpela pilaia long ol meri Waliya na i gat gutpela sans long winim dispela gem. Ol i bin lusim planti gutpela sans bilong skoa long las wiken bikos ol fulbek bilong Waliya tu i no mekim bikpela wok tru long stapim Sunam long skoa.



• Emmanuel Tatao bilong Mosbi Yunivesiti i soim kain stail bilong em long las wiken gem egensim GFC. Yuni win long 6-1.

Strong bilong Momase i wok long kirap

MOSBI SOKA RIPOT

SAMUEL BASIM i raitim

STRONG bilong Momase i holim yet nem bilong em long Mosbi soka resis. Las wiken gem bilong em wantaim Sobou i bin wanpela gutpela piksa stret we i soim tru dispela stail na strong em Momase i gat. Sobou i givim wanpela strongpela gem tru long ol manki Momase we ol i winim planti bal na pretim golmak bilong ol. Tasol ol boi Momase i no pundaun long dispela. Ol i sanap strong na pusim bek strong bilong Sobou.

Sobou em wanpela olupela primia klap bilong Mosbi soka resis na em i gat dispela primia eksperiens long givim hevi long Momase. Bikos Momase em yangpela klap husat i kam insait long primia divisen long dispela yia tasol na i wokim nem pinis.

Long namba wan hap bilong pilai, tupela tim wantaim i kamapim olgeta strong bilong tupela long brukim umben bilong narapela. Tasol difens i wok long strong tru. Olsem na long namba wan hap bilong pilai em skoa i no gat long tupela tim wantaim. Long namba tu hap bilong pilai, tupela i kam bek na putim moa strong long difens na moa sapot long ol straiika. Sobou i bin kamapim planti pret long mak bilong Momase bikos ol straiika bilong Sobou i bin winim planti gutpela sans long bomim umben bilong ol boi Momase.

Planti kik bilong Sobou i wok long go abrus na tu golkipa bilong Momase i wok long sevim ol kik bilong Sobou. Sans bilong Momase i bin kamap stret taim fulbek bilong Sobou i kisim planti presa long ol straiika bilong Momase na kamapim han bal long insait long penalti eria. Olsem na Budah i bin go kikim dispela penalti na putim stret i go pas long umben bilong Sobou. Dispela skoa bilong bilong Momase i lokim Sobou i go inap fultaim we

Momase i win long dispela wanpis gol tasol. Long arapela primia gem, Guria i statim win bilong em bihain long longpela taim em i wok long lus na dro i kam. Em i nekim PTC 2-1. Dispela win i kamap taim yangpela Geno Voivoi i kam bek na pilaim namba wan gem bilong em long las wiken. Geno i kisim wanpela kik i kam long olupela PNG intanesenel pilaia, Simon Emmanuel long midfil na em i brosim na straikim i go pas long umben bilong PTC.

Tasol PTC husat tu i gat ol PNG intanesenel na eksperiens pilaia olsem Mame Kasalau, Raymond Nasa, Francis Moyap na Wesley Waiwai i putim bikpela presa gen long Guria. Olsem na PTC midfilda, Raymond Nasa i pulim bal i go abrusim ol difenda bilong Guria na bihain em pusim bal ya i go bek long PNG straiika, Francis Moyap na em pinisim ron bilong bal long golmak bilong Guria.

Long hap taim tupela tim wantaim i dro 1-1. Tasol long namba tu hap taim tupela i kam bek, PTC i kisim planti presa long Guria na dispela i mekim fulbek, Lenie i kikim bal krangi na bomim umben bilong em yet. Guria i strongim dispela gol inap long fultaim. Wanpela gutpela sans bilong Guria long apim skoa i go antap long 3 points i bin abrusim taim Geno i kisim bal na abrusim tupela fulbek bilong PTC. Em i salim gen long yangpela straiika bilong Guria, Jacob Bejigi we em i bomim i go antap abrusim golmak bilong PTC.

Long arapela primia gem long las wiken tu em Rapatona i autim tiket bilong Ela Yunaitet 2-1 long fultaim. Rapatona i bin bungim bikpela salens tru bilong ol yangpela manki bilong Ela Yunaitet. Tasol laki bilong em na em i skorim narapela gol long apim skoa i go antap na winim gem.

Yunivesiti long narapela gem i givim bikpela skul tru long ol manki bilong GFC wantaim 6-1 skoa long fultaim. Dispela em wanpela bikpela skul pasin tru em GFC i kisim long las wiken.



• Yangpela junia Basausau i kisim bal i go fowat long mak bilong gol bilong Yunivesiti long las wiken gem long Mosbi soka resis.

SANDAUN i mas kamapim ol gutpela spotsman long ol soka gems long neks yia sapos Sandaun i laik holim pas Tekwie Sil. Dispela em toktok bilong man i go pas long Posinu Soka Tim husait i kamap long Vanimo long stap insait long ol soka gems bilong Tekwie Sil. Long amamasim 20 krismas bilong PNG Independens, Tim Menesa na olupela Is Sepik Premia Mista Bruce Samban.

Mista Samban i tokaut long Wantok olsem em i gat bikpela wari tru long lukim ol soka gems long dispela taim i go bagarap tru. Long klostu bilong pinis bilong ol fainels we i bin gat pait i kamap. Em ol pilaia bilong wanpela

Posinu salensim Sandaun long soim gutpela spotman neks yia

Sandaun tim i wok long pilai egensim tim bilong em.

Em i tok pasin ya i no soim tru gutpela piksa bilong pilai soka insait long Sandaun. Na Sandaun i mas sem long kamapim ol kain pilaia olsem husait i ken gat dispela laik long kirapim pait. Na i no soim tru kala bilong spotsman na spotsmeri long taim bilong pilai ol kain spots.

Tim Menesa bilong Posinu i tok as bilong em i bringim tim bilong em i go long Vanimo. Em long lainim ol nupela stail em Sandaun i lainim pinis long ol gems em i

save holim wantaim ol soka tim bilong Jayapura.

Husait long ol i save go kam long Vanimo planti taim. Na i nap nau bai ol tim bilong Vanimo i mas gat ol nupela stail bilong soka we em i laik bai ol yanpela bilong em i mas lainim na kisim. "Tasol taim mi bringim anda 19 tim bilong mi i go long Vanimo. Piksa i no luk wankain olsem ol stori mi save harim. We i tok ol tim bilong Vanimo i save pilaim ol gutpela na nupela stail bilong soka. Na ol dispela nupela stail ol i lainim long ol pilaia bilong narapela sait. Mi kirap nogut long lukim olsem ol

pilaia bilong mi i pilaim gutpela gem na kilim dai stail bilong ol Sandaun tim. "Nau olsem Posinu i winim pinis Tekwie Sil, mi gat strongpela bilip olsem soka kod insait long Sandaun i no senis. Maski ol tim ya i kisim ol gutpela salens na trening i kam long ol tim bilong Jayapura. Olsem na piksa i soim olsem ol tim bilong Vanimo i mas lainim soka kod na stail bilong soka mipela i gat longen. Sapos ol i laik winim Tekwie Sil long Septemba neks yia, nogat mi bilip bai Posinu i holim pas yet dispela Sil", Tim Menesa Mista Samban i tokim Wantok.

Em i go hed na tokaut tu olsem olgeta pilaia em i bringim long Vanimo, em ol anda 19. Na long yia bihain bai ol i gat pinis moa save na stail bilong pilai soka we bai i nogat narapela tim i ken winim ol. Olsem na em i salensim Sandaun tim long lusim pasin bilong belhat haripa na tu long kirapim nating pait. Mista Samban i tok ol pilaia i mas lukim olsem ol i trenim ol yet long kamap ol gutpela spotsman. Bikpela samting wanpela kod pilaia i mas mekim em long pilaim gutpela na klinpela gen wantaim pasin bilong belisi we dispela bai i kisim tim i go long we na winim gem.

Mumeng stesin bai paia long spot tonamen

MUMENG Distrik Spot Kaunsil i makim dispela wiken long 27-29 Oktoba long holim wanpela bikpela spot tonamen long Mumeng stesin. Dispela tonamen bai ol manmeri insait long Mumeng Distrik i pilaim soka na basketbal.

Siaman bilong Mumeng Distrik Spot Kaunsil, Leo Peni i tok spot i no bin kamap gut long Mumeng eria bikos i nogat gutpela sapot bilong ronim gut asosiesen. Olsem na ol i laik kamapim dispela kain tonamen long traim pulim bek ol interes bilong pilai spot i kam bek. Na dispela inap traim long kirapim interes bilong ol yangpela

long pilai spot. Peni i tok ol i makim pinis K1,310 long givim aut olsem ol prais mani bilong wanwan pilai ya.

Tim bilong ol man husat i kamap namba wan bai winim K300, tim i kamap namba tu bai kisim 200 na tim i kamap namba tri bai kisim K100 na namba foa tim bai kisim K50. Long basketbal resis bilong ol man, tim i kamap namba wan bai kisim K200, namba tu bai kisim K100, namba tri bai kisim 70 na namba foa bai kisim K40. Long resis bilong ol meri long basketbal bai tim i kamap namba wan bai kisim K100, namba tu bai kisim

K70, namba tri bai kisim K50 na namba foa bai kisim K30.

Spot Kaunsil i makim tim rejistresen bilong wanwan klap em K50 long soka tim bilong ol man, K30 long rejistresen bilong ol meri long basketbal na K40 long rejistresen bilong ol man basketbal.

Asosiesen i singautim ol tim long wanwan jon olsem Wabau, Mapos, Midel Watut, Samsam, Timze na Mama asosiesen yet long Mumeng stesin long redim ol tim bilong ol na salim i go insait long pilai insait long dispela tonamen.

Peni i tok dispela em pilai bilong olgeta manmeri bilong Mumeng na ol i mas amamas long joinim na pilai.

Em i tok pilai i mas kamap gut na pinis gut long gutpela pasin bilong amamas long pilai na bung wantaim. Ol pilaia i no ken pulim kros na birua bilong ausait i go insait na yusim long ples bilong pilai.

Bikos dispela kain pasin tasol inap kilim indai gutpela tingting na pasin bilong kirapim spot insait long distrik bilong mipela.

Peni i askim olgeta manmeri long amamas wantaim long dis-

pela pilai na i no kam bung wantaim.

Bai asosiesen i yusim ol liklik toea ol i pulim long geit na rejistresen fi long stretim ol samting olsem banis na graun bilong pilai long en. Bikos planti samting long yusim long pilai i no gutpela na ol i mas painim mani long stretim ol.

Dispela pilai bai bungim tru planti manmeri bilong Mumeng long go bung na sapotim ol tim bilong ol na ol brata susa bilong ol. Na dispela i min olsem ples bai pas olgeta long ol manmeri long dispela wiken.



• **Redi ...** Lukaut long em, Janet Petrus bilong Mazda tim i redi gut tru long brukim bal long Mosbi sofbal resis bilong ol meri long las wiken.

Blue Kumuls na Guria bai pilaim tupela gem

BLUE Kumuls na Guria primia divisen bai pilaim tupela gem long dispela wiken long Mosbi soka resis. Dispela em long traim pinisim ol hap gem bilong ol we i no bin pinis yet. Long Sarere bai Blue Kumuls i pilaim Momase na long Sande em bai bungim Guria. Guria tu bai pilaim Ela Yunaitet long Sarere na long Sande em bai bungim Kumuls.

Dispela bai wanpela bikpela wiken bilong tupela tim wantaim na tupela i mas win long putim tupela long sampela gutpela posisen bilong PMSA poin lata. Gem bilong Momase na Kumuls long Sarere bai wanpela strongpela gem na dispela bai tokaut long husat inap mekim fainal egens tupela biknem klap olsem Rapatona na Yunivesiti husat i stap antap long lata. Momase i stap long namba 5 ples na em bai pait strong long win na i go antap long winim posisen bilong em. Bihain long Rapatona na Yunivesiti em tripela nupela primia tim ya, PTC, Kumuls na Momase. Olsem na ol bai wok hat tru long traim kamap long nokaut.

Guria tu bai pait strong long traim winim Ela Yunaitet bikos em i sempion bilong las ya na em i mas pait long go bek insait long fainal. Dispela bai wanpela gutpela gem namel long tupela tim ya. Long arapela primia gem tu em Rapatona na Difens bai pilaim wanpela strongpela gem tru. Dispela gem bai pulim planti nois long sait lain bikos Difens i wok long soim pawa bilong em long boim ol arapela tim i kam antap. Nau bai em i bungim Rapatona, em bai redim olgeta katres bilong em long daunim ol boi bilong Rapatona.

Rapatona em strongpela tim na Difens bai wok strong tru long traim winim em. Tasol ol boi Difens i save long kain pasin bilong givim salens na mekim nois long umben bilong ol birua tim. Gem bilong PTC na GFC bai wanpela gutpela gem tu bikos GFC i bin lus long las wiken na em bai traim long bringim bek win bilong em. Em bai traim long katim telefon waia bilong PTC long dispela wiken. Maski PTC i gat ol gutpela lainap na eksperiens pilaia, GFC tu i gat ol yangpela blut husat i ken kalap antap long PTC na katim em daun.

Yunivesiti bai bungim Sobou na dispela em isin win bilong Yunivesiti bikos Sobou i no bin rejistaim ol pilaia bilong em na tu sampela pilaia bilong em. Olsem na em bai pilaim Yunivesiti tasol Yunivesiti bai kisim tasol isi tri pions antap long poin bilong em.

Wantoks sempion bilong Wau basketbal

OL meri Donna Wantoks long Wau i kamap kwin bilong Wau basketbal resis long las wiken taim ol i nekim Saint Francis wantaim 50-46 basket long fultaim. Tupela i bin dro 44-44 long fultaim na referi i givim ekstra taim gen na tupela i pilai na long dispela taim ol susa bilong Donna i pait strong na apim skoa i go antap long 50 na winim gren fainal. Long stat bilong pilai, ol susa bilong Saints i putim kamap bikpela salens tru we ol i tromoi bal i go kam na traim brukim difens na i go insait long mak bilong Wantoks. Ol meri olsem Susan Yang i kamapim planti gutpela stail tru long dispela taim na mekim pilai bilong Saints i go strong moa.

Saints i bin putim 2 basket na Wantoks i go pas wantaim 4 basket taim bikmeri bilong Saints, Agatha Nimbu i kisim wanpela longpela sot na kamapim 3 poin na srukim skoa i go antap long 5. Dispela 3 pions bilong Agatha i opim ai bilong Daphney James na Anitha Peter bilong Wantoks long pilai strong. Ol meri Wantok i stat long kirapim paia long putim moa basket long ring bilong Saints. Tasol Vero Alex, Agatha Raphael na Grace Tawa i save givim bikpela sapot wantaim long bungim strong na stapim ol kain strik na ron bilong ol meri Wantoks.

Long hap taim, o meri Saints i bin pilai strong tru na pasim skoa bilong ol long 28 basket na Wantoks long 22. Long namba tu hap bilong pilai, tupela tim wantaim i kam bek na pilai strong tru. Ol meri bilong Saints i putim bikpela presa tru long Wantoks tasol ol susa bilong Wantoks i no wari bikos ol tu i gat namba long putim presa long husat tim i traim ol. Long dispela taim, ol meri Wantok i stat long tromoi bal i go i kam na kamapim birua long mak bilong Saints. Ol i stat long apim skoa bilong ol i go antap wantaim moa basket.

Saints i luksave long dispela na em i traim long bungim ol meri wantaim na strongim skoa bilong ol tu long i go antap. Olsem na long fultaim, tupela i dro 44-44 we ol opisel i skelim na givim tupela ekstra taim long pilai gen na painim wina. Long dispela ekstra taim, bikpela salens tru i kamap long husat bai apim skoa bilong em i go antap. Tasol ol meri Wantok i senisim stail na stat long mekim gutpela draiv we Daphney, Anitha na Betty i rejistaim 6 moa pions bilong Wantoks na pasim gem long 50 pions. Long sait bilong Saints Francis em Susan Yang i pait strong na subim wanpela basket tasol na apim skoa i go antap long 46.



• **Mark Lister bilong SP Holding i holim K2,000 sek mani na givim i go long Hash House Harriers grup. Bos bilong HHH grup, David Out (law) Hill i brukim skru long dispela helpim. Foto: Joe Ivaharia,**

Mosbi soka i lusim strong bilong em

MOSBI SOKA RIPOT

KOMPLEN i kamap olsem ol i no save Mosbi Soka Asosiesen (PMSA) i ranim soka olsem wanem nau long dispela ya.

Wanpela biknem soka opisal na sapota long Mosbi i tokim Wantok olsem watpo na sampela pilai i pinis pas na sampela i no yet na arapela i gat planti gem i stap yet?. Bikman ya i no laik tokaut long nem bilong em.

Bikman ya i tok em i lukim ol meri i wok long pilaim gren fainal na ol kota fainal bilong ol long las wik na nara-pela wik i go pinis na em i no inap klia long dispela samting. Bikos ol gem bilong ol man i stap yet long 5-pela divisen bilong ol man. Na ol meri tasol i pinis pastaim na pilaim gren fainal namel long ol dispela nomol gem.

Bikman ya i aski PMSA long hariap holim wanpela bikpela miting bilong olgeta eksekutiv bilong ol klap na asosiesen we ol i ken toktok na painimaut wanem hap na wanem rot em PMSA i wok long ranim soka long Mosbi.

Mosbi olsem wanpela bikpela senta insait long Papua Niugini, menesmen bilong em long soka i brukim bus tru, bikman ya i tok.

Em i tok i luk olsem seketeri bilong PMSA, Mojeck Selsel tasol i wok long mekim olgeta disisen na ranim edministresen bilong PMSA. Tasol wok bilong seketeri i no bilong mekim wanpela disisen. Em i bilong kari-maut tasol disisen bilong ol eksekutiv.

Mosbi soka resis nau i stap long wanpela bikpela senis we inap daunim tru interes bilong soka. Bikos long ol wiken, i no gat planti manmeri i kamap long lukim pilai na sampela klap i lusim pinis asosiesen bikos ol i no bin rejista. PMSA i rausim ol pinis long buk bilong em.

Bikman ya i tok em i no save sapos ol eksekutiv bilong PMSA i save bung tu o no gat bikos em i no bin lukim pes bilong ol PMSA eksekutiv longpela taim nau na tu i no lukim sampela kain senis o pasin we PMSA i laik kamapim. Wanpela samting tasol em i ken lukim em, i no gat inap sapota long pilai graun long olgeta wiken.

WANTOK SPOTS

Ostrelia pret long lus long Inglen

LEEDS, ENGLAND OKTO-BA 24: PRET i no bin wanpela samting em Tim Brasher i pilim taim em i go insait long 1992 Ragbi Lig Wol Kap fainal egen-sim Gret Briten.

Tasol bikpela laik na wari wantaim i wok long gro insait long em long dispela wik.

Brasher em i wanpela tasol bilong tupela pilaia husat i bin pilai long 1992 Wol Kap fainal tim, we Ostrelia i win, na narapela em kepten Brad Fitter.


Dispela pilaia ya bilong Balmain i bin mekim nem bilong em long Intanesenel pilai long 1992 taim em i gat 21 krismas tasol na em bin kisim posisen olsem fulbek taim ol i pilai long Wembli.

Na dispela taim gen, em bai pilaia dispela posisen gen na olsem wanpela olupela pilaia bilong tim na tu wanpela pilaia husat i stap long fom yet.


Tasol em i tok olsem long taim Ostrelia i bin redi long pilaim Gret Briten long 1992 taim i luk olsem nogat wanpela tim i nap long winim ol, pret i no bin wanpela samting we i mekim ol i no sindaun gut.

Tasol long nau yet, dispela em i olsem wanpela samting bilong kirapim tingting bilong ol pilaia.


"Long 1992, mi no bin pret olsem bai mipela i lus, tasol mi wok long wari tasol bai mi pilai gut o nogat," Brasher i tok.



● Kepten Brad Fitter ... em wantaim Brasher em tupela pilaia tasol long 1992 tim husat i winim las Wol Kap fainal.



● Tim Brasher ... tingting planti o pret long Ostrelia tim i lusim Wol Kap long bikpela birua tim, Inglen.



● Steve Renouf ... skoring wining trai bilong Ostrelia long 1992 gren fainal. Em i no stap nau long tim.

1995 WOL KAP RIPOT

"Tasol long nau yet, olgeta pilaia i gat bikpela bilip long win tasol mipela i pret long lus na mipela i no laik stap insait long dispela tim husat i lus long Wol kap ... dispela i no wanpela rabis samting tasol dispela bai mekim mipela long win moa yet.

"Long dispela yia, Englen i gat wanpela strongpela tim tru em ol i no bin gat long bipo na ol i bin redim dispela tim longpela taim tru na pilai bai wanpela strongpela tru long Sarere."

Brasher i tok olsem dispela lo bilong i no tok yesa long ol long pilai ol wom ap pilai i mekim na olgeta samting i hat tru na i no olsem 1992 taim Steve Renouf i skorim las trai long 75 minit na helpim Ostrelia long win.

Long narapela stori gen, nupela hap bek bilong Englen Bobby Goulding, maski sapos kepten Shaun Edwards i fit long pilai yet. Edwards long asde i tokaut olsem em yet i no fit long pilai long wanem em i gat bagarap long lek bilong em.

Tasol i bin gat ol kinkain toktok olsem ol bai putim em long risev sapos bagarap long lek bilong em i orait liklik na dispela i soim olsem laip bilong Edwards long pilai bai pinis.

Englen kosa Phil Larder i tok long Mande pinis olsem em i mekim disisen bilong hap bek posisen pinis na tu em i tokim wanpela bilong tupela pinis long husat i holim dispela posisen pinis.

Dispela strongpela hap bek bilong Sen Helens i

winim pinis tupela man-of-the-match awot pinis taim Edwards i no bin pilai. Wanpela em long namba wan pilai bilong ol egensim Ostrelia na narapela egensim ol Saut Afrika.

Long sampela ol gutpela nius long ol lain Englen, senta Garry Connolly i gat sans long pilai long wol kap bihain long em i bin stap insait long tupela strongpela trening taim wantaim ol narapela pilaia na i redi tasol long kisim pilai graun.

Long sait bilong ol Ostrelia gen, ol i malolo liklik long trening bilong ol las bihain long dispela bikpela pilai egensim ol Nu Silan long las wiken tasol gol kika Andrew Johns i bin wokhat tru long traime stretim ol kik bilong em bihain long em i kikim tripela gol tasol insait long 8-pela kik egensim Nu Silan Kiwis.

- AAP

Kreer Eagles em i sempion bilong Wewak basketbal

BASKETBAL RIPOT

FUZO PAUL i raitim

KREER High Eagles i winim basketbal taitel bilong Wewak basketbal resis taim em i nekim Jokkers long 49-47 skoa long las wiken long ekstra taim.

Dispela i bin wanpela strongpela gren fainel tru namel long tupela strongpela tim ya we planti gutpela stail i kamap na bikpela salens tru i kamap long painimaut husat inap winim dispela basketbal taitel.

Kreer High Eagles em wanpela nupela tim insait tlong Wewak Amatsa Basketbal Asosiesen (WABA) na dispela em namba wan taim bilong em long em long go insait long gren fainel. Em i bin pait strong tru long autim planti klap i kam inap long gren fainel taim em i bungim biknem Jokkers bilong Wewak. Em i gat tupela biknem pilaia olsem Joe Moka husat em kosa na pilaia na Gilbert Sari husat tu em trenna na pilaia.

Jokkers em wanpela lapun tim bilong bipo tasol em i gat ol nupela yangpela pilaia bikos planti olupela pilaia i bin lusim i go joinim arapela klap na tu sampela i statim ol nupela tim bilong ol long asosiesen. Olsem na long dispela yia em i bin pait strong tru i kam long winim ples insait long fainel.

Lapun bilong Jokkers, Terence Moka i bin go pas long ol boi bilong em na em i kisim helpim tu long ol boi olsem Albert Mark na David Tunan husat i save mekim ol breks long mak bilong Eagles.

Long haptaim, Jokkers i bin go pas wantaim 23 points na Eagles long 17.

Long namba tu hap bilong resis, Eagles i kam bek wantaim moa strong we Joe Moka i yusim eksperiens bilong em long mekim ol longpela sut long longwe na kisim ol tri points. Em i kisim gutpela helpim tru long ol boi olsem Gilbert Sari, Kenneth Beari, Dean Kava na Sem Kewa. Dispela sapot bilong ol i givim bikpela presa long Jokkers. Olsem na long fultaim, skoa i bin level long 47-47.

Long ekstra taim, tupela tim wantaim i pait strong tru long putim ol basket na long dispela taim, Joe Moka husat i gat moa strong i stap yet i kisim wanpela gutpela sans long draiv i go insait long ki hol bilong Jokkers na em leiap long ring na putim las basket we i kamapim win bilong Kreer High Eagles. Wisel i krai tu long fultaim na skoa i kamap Kreer High Eagles 49 na Jokkers 47.

Long A gret fainel bilong ol meri, Elcom i bungim ol meri Jokkers na dispela tu i bin wanpela strongpela gem. Elcom i pilaim wanpela gutpela gem tru we wok bung namel long ol gad olsem Grace Kanaru na senta Carol Siaguru na fowet Carol Gule, Joyce Kanaru, Sheron Siaguru na Margret Muri i bin helpim win bilong ol. Jokkers husat tu i putim gutpela tim i bin pait hat tru. Kepten na gad, Judith Moka i bin go pas long holim stia bilong ol wantaim helpim bilong Antonia Otto, Rose Moka, Rondi Wanuk, Maria Paknus na Petho Aivak.

Nupela Lemon

FAB FOR THE ULTIMATE CLEAR

NEW LEMON

CONCENTRATED DETERGENT BAR FOR CLOTHES

Nau wantaim Lemon!!!

STRONGPELA PAWA BILONG KLINIM, NAU IKAM LONG LIKLIK FAB LEMON BARI!

LAE
BISCUIT



RAGBI LIG



NIUS

I NO BILONG SALIM


LAE
BISCUIT



Mosbi Lig winim kot egensim PNGRFL



• (ANTAP) Stail bilong East Boroko. East Boroko pilaia i ranawe long ol pilaia bilong 5 mile nogats.
• (Daumbilo) Tupela Eels pilaia i daunim pinis wanpela 5 mile Nogats pilaia



Das Kirap... • (Raithan) Resis bilong Unagi op sisen lig i stat pinis na tupela brata ya wanpela bilong Saraga na 5mile i taitim bun stret long takel.

...PRL gen pilai long Kwinslen neks ya

RODNEY KAMUS i raitim

MOSBI Ragbi Futbol Lig (PRL) i winim kot bilong em pinis na bai bruk long Papua Niugini Ragbi Futbol Lig (PNGRFL) na kamap olsem wanpela bodi bilong em yet na joinim Kwinslen Stet Wide resis long neks ya. Dispela em disisen Nesenel Kot i bin mekim long las wik.

Nesenel Kot long las wik i tok olsem Papua Niugini Ragbi Futbol Lig (PNGRFL) em wanpela volentri ogenaísesen na afiliesen i go long em em volentri na ol memba husat i afiliet i ken pinisim afiliesen bilong ol yet long wanem taim ol i laikim.

Dispela disisen bilong nesanel kot jas Tracey Doherty long las wik i stretim olgeta rot bilong Mosbi Ragbi Lig (PRL) long pilaia na maketim ol pilaia bilong ol long Queensland Ragbi Lig resis long Australia long neks sisen.

Taim Papua Niugini Ragbi Futbol Lig i sain wantaim supa lig long dispela resis bilong Rupert Murdoch, Mosbi Ragbi Lig i tokaut olsem ol bai bruk na lusim PNGRFL na joinim Kwinslen Ragbi Lig husat i stap aninit long Australian Ragbi Futbol Lig.

Sentrel Ragbi Lig i join pinis wantaim Mosbi Ragbi Lig na ol i opim dua bilong ol yet long ol narapela lig senta long joinim ol.

Papua Niugini Ragbi Futbol Lig long Oktoba 4 i bin painim kot oda long traim stopim Mosbi Ragbi Lig long bruk lusim ol ol long wanem dispela i no bihain stret lo.

Loya bilong Mosbi Ragbi Lig Tau Rei i bin mekim wanpela apil long kot bai rausim dispela kes we em i tok olsem dispela ol oda PNGRFL i kisim i nogat wanpela hap bilong ol i sanap.

"Sapos dispela em i kot kes, ol lo bilong stopim dispela i mas tok olsem PNGRFL i mas gat as long wanem kain eksen em i kisim, na sapos dispela eksen bilong ol i win em bai PNGRFL i baim olgeta kos bilong kot."

Loya ya i tok moa olsem Papua Niugini Ragbi Futbol Lig i no wanpela afilieted memba

bilong Mosbi Ragbi Lig na bai i gat bikpela sans long kotim PRL.

"Lukluk gut, dispela disisen em PRL i mekim bai sanap long kot sapos ol 10-pela memba lig em i afiliet wantaim ol i bringim dispela long kot.

"Long kamap wanpela afilieted memba, wanpela em lo long seksen 4 na 5 bilong Mosbi Ragbi Lig em long baim wanpela fi, registaim olgeta memba na baim ful registresen fi bilong ol pilai bilong ol." "PNGRFL i no pundaun aninit long dispela samting na i nogat wanpela poin long kwestenim disisen bilong Mosbi Ragbi Lig (PRL)," Rei i tok.

Loya bilong ol Papua Niugini Ragbi Futbol Lig Kerenga, Kya, i tok olsem

PNGRFL em wanpela volentri ogenaísesen na ol planti lig insait long kantri i afiliet wantaim em na memba sip bilong Mosbi Ragbi Lig i stap wantaim ol na dispela i stap aninit long lo bilong ol yet tu.

Em i tok moa olsem aninit long lo bilong dispela nesanel bodi, PNGRFL i no painim rot bilong pasim tasol Mosbi Ragbi Lig long bruk na lusim ol i go. PNGRFL i laik lukim olsem PRL i mas stap aninit long em i go inap November 25.

Toktok long sapos ol i tingting long afiliet gen wantaim PNGRFL, Mosbi Ragbi Lig Edministreta Badi Dou i tok olsem; "Mipela i ken stil afiliet yet wantaim Papua Niugini Ragbi Futbol Lig, tasol PNGRFL wantaim Supa Lig i mekim sampela samting we mipela ting i ron long mipela na ol narapela lig insait long kantri we i pasim rait bilong mipela."

Sentrel lig bai rausin 6-pela tim long neks yia

KENNEDY EDENE i raitim

SENTREL Ragbi Lig(CRL) i stap aninit nau long mekim bikipela senis wantaim menesmen bilong em long lukim olsem olgeta samting i ron gut tru. Man husat yet i go pas long dispela em Presiden Paul Aisa.

Sentrel Ragbi Lig husat i kirapim resis bilong ol long dispela yia tasol i laik mekim dispela ol senis long lukim olsem neks yia bai ol i gat wangepa gutpela sisen tru.

Presiden Aisa i tok olsem i gat sampela ol samting i stap long lainap bilong ol na ol bai kamapim ol disisen long dispela. Em i tok olsem long luk-

luk bilong em yet long 1995 ragbi lig yia bilong sentral lig i no bin ron gut olsem na ol i tingting long stretim ol samting long menesmen bilong ol yet.

"Olsem wangepa as tingting bilong kamapim Sentrel Lig, mipela i laik setim wangepa bikipela stendet ragbi lig na dispela em long kamapim gut tru ol gret i stap aninit," Aisa i tok.

CRL nau yet i wok long lukluk long daunim namba bilong ol tim long 18 i go daun olgeta long 12-pela tim tasol long resis ya neks yia. Bai i nogat nupela tim i kam insait long lig na tu ol bai tingting long dropim 6-pela klab. Lig bai dropim tupela tim long neks yia na tu ol bai i no nap stop i

go inap long 10-pela tim we ol i ken menesim gut tru.

Dispela em i narapela rot ol i wok long traim long lukim olsem Sentrel Lig resis i kamap gut tru na kamapim sampela strongpela pilai moa yet.

Ol klab husat bai kisim tamiok long neks yia i no kisim toksave yet. Tasol i luk olsem ol CRL eksekutiv bai tokaut long ol nem bilong ol klab ya long neks yia.

Narapela samting lig ya i mas stretim hariap em long makim wangepa fultaim edministreta long ronim wok long lig na ol edministresen samting bilong lig.

Nau yet CRL i afiliet pinis wantaim Mosbi Ragbi Lig long

pilai long Kwinslen Stet Wide resis long neks yia na Asosiesen ya i laik lukim olsem ol i mas gat wangepa gutpela nem long dispela resis.

CRL nau yet i wok long lukim olsem ol junia tim bilong ol bai pilai aninit long PRL resis we ol bai toktok long dispela long neks yia.

Wangepa nupela resis we bai kirap em Sentrel Lig Skulbois resis tasol dispela em ol i wok long tingting long kamapim hariap bipo long yia i pinis na fainelaisim olgeta toktok.

Long sait bilong ol skulbois lig, ol bai kisim kain ol sait olsem Bereina, Kairiku, East Hiri, West Hiri, Kwikila,

Kupiano, Marshall Lagoon na Sogeri.

Ol wanwan ples ya i mas ranim resis bilong ol yet na makim wangepa sait long kam pilai long Sentrel Skulbois Ragbi Lig tonamen we bai kamap long wanwan yia.

Wangepa spotsmasta long wanwan son bai stap na lukautim dispela wok long lig na ol tim bilong ol yet.

Sentrel Ragbi Lig long 1996 sisen bai wankain yet olsem las yia wantaim tripela gret olgeta em A, B na anda 21.

Long sait bilong sponsasip, lig ya i no kisim wangepa gutpela toktok yet tasol planti kamapani i wok long soim bikipela interes bilong ol long sponsaim lig ya.

Saraga bagarapim sindaun bilong Morea Tobo

UNAGI LIG RIPOT

OL Stail mangi bilong Saraga i holim wangepa strongpela kambek bilong ol birua bilong ol Morea Tobo na putim ol i go insait long wangepa taim nogut stret we ol i win 10-4 long Unagi Lig resis long las wik Sande.

Long naptaim, skoa bilong tupela tim wantaim i bin pas long 10-4 long sait bilong ol Saraga, ol Morea Tobo bois i luk strong moa long namba tu hap taim ol i kam insait long pilai graun na dispela i soim strongpela tingting bilong ol tru long winim dispela pilai tasol long ol liklik asua tasol ol mekim wantaim bal i lukim ol i lusim dispela pilai.

Long namba wan hap bilong pilai, senta David Waso i gat bikipela sans long skoa taim em i sapos long pasim bal i go long winga bilong em tasol em holim bal strong tumas. Em i bukim banis long em yet i go tasol ol i stopim em. Na tu ol Morea Tobo i bin gat tupela trai bilong ol em ol i putim tasol referi Paul Gull nusat i was long dispela pilai i no tok yesa long ol.


Saraga husat i lusim wangepa pilai tasol insait long 5-pela olgeta i bin pilai hat tru. Presiden bilong Saraga klab Ben Tabie i amamasim ol mangi bilong em long winim dispela pilai na i tok olsem ol gutpela pilai bilong em long dispela gem em senta David Robert, faiv-eit Peter Wemin na hapbek Ian Ben. Smith Kiage huka na Michael Rob i bin pilai hat tru long sait bilong ol.

Ol Saraga i bin laki tru long pasim skoa long 5-pela minit bipo long fultaim 6-4 na wantaim tripela minit tasol bilong pilai long stap ol i skoa na fultaim skoa i bin pas long

10-4 long haptaim.

Long seken hap, i bin gat gutpela na strongpela pilai tru i bin kamap namel long tupela tim ya. Difens bilong ol tu i bin strong nogut tru na nogat wangepa trai i kamap long tupela sait wantaim i go inap long pilai i pinis long fultaim stret.

- **Hansut: Wangepa 5 Mile pilai i daunim wangepa East Boroko Eels long Unagi lig resis. Daunbilo: Unagi Lig eksen namel long 3-4 Mile na Makana.**



Paiyo bai traim Brisbane Broncos seleksen

STEVE MASCORD
BILONG AAP NA RODNEY
KAMUS i raitim

KUMUL Huka husat i mekim nem bilong em yet long pilai long Wol Kap long Inglen long dispela mun Elias Paiyo i tokaut olsem em i redi tasol long traim Broncos Seleksen trail long neks yia sapos olgeta samting i go orait long em.

Paiyo husat i bin wanpela ki man bilong ol Kumuls long Wol Kap kempain bilong ol i bin amasim dispela klab bilong Australia na bai kamap long seleksen bilong ol long neks yia.

Kepten bilong PNG Kumuls Adrian Lam i tok olsem em i gat bikpela bilip long Paiyo olsem em i ken kisim wanpela spes bilong em yet wantaim dispela biknem klab bilong Australia ya.

Lam i bin tok long Inglen long las wik olsem Paiyo i redi tasol long kamap long ol seleksen trails bilong ol Broncos long neks mun.

Long Tundei, Paiyo i tokim Ragbi Lig Nius olsem dispela toktok i stap insait long tingting bilong em yet na bai i kam yet.

Em i tok olsem em bai no no nap mekim wanpela tok



• Paiyo i kisim bikpela sapot tru long ol mangi Yunivesiti long las wik taim ol Kumuls i go raun long hap. Foto: Pou Toivita.

promis olsem em bai pilai long Broncos neks yia tasol tasol olgeta samting em bai stap long han bilong ol lain long seleksen trails tasol.

Paiyo husat i wanpela

strongpela pilaia tru long wol kap resis i bin kisim bikpela welkam tru wantaim ol narapela Kumuls pilai taim ol i kam long Yunivesiti long Tundei. Paiyo i bin

kamap wantaim ol narapela pilaia olsem David Westley, Bruce Mamando na Adrain Lam long toktok wantaim ol mangi long hap. Bihain long dispela, ol Kumuls i

bin go raun long Tabari ples long 4-mail we ol i bin bungim planti ol manmeri husat i laik kisim mak bilong ol na tok helo long ol.

Nupela awot bilong ol pilaias

by JOE KANEKANE

NAMBATU siaman bilong Papua Niugini Ragbu Futbol Lig, Mark Kevin Murphy i tokaut long wanpela nupela awot bilong ol pilaia i pilai gut tru insait long dispela yia. Dispela awot i wankain long awot bilong Dr Jim Jacobi, O PNG pilaia bilong yia tasol dispela awot bai ol i kolim Siaman's Awot na ol wina bai kamap long olgeta senta.

Murphy i tok tingting bilong kamapim dispela awot i kamap bihain tasol long miting bilong ragbi lig bot las yia.

Long dispela miting bot i mekim disisen long kamapim dispela niupela awot long wanem Dr Jim Jacobi i wok long givim luksave i go long ol pilaia long Inta - Siti

tasol.

Na, dispela i mekim ol pilaia long narapela hap bilong kantri i mis ant.

Sampela lo i stap long makim ol pilaia husait bai i stap long dispela resis.

• Olgeta 28 senta i regista wantaim PNGRFL i ken makim wanpela pilaia

• Dispela pilaia i mas no ken stap insait long Inta-Siti tim

• Wanpela pilaia husait i winim Dr Jacobi Awot bai i no inap long resis

• Ol wanwan lig i mas mekim stori bilong pilaia long wanem samting em wokim long dispela yia tasol.

Dispela em i nambawan taim tru long wokim dispela kain awot na olgeta senta i mas salim nem bilong ol pilaia, ol i tingting em i ken stap long dispela resis.

Pepsi Op Sisen Lig redi long stat

KENNEDY EDENE i raitim

PEPSI Op Sisen Ragbi Lig wanpela op sisen we ol i save ogenaisim gut tru i redi long kik op nau na dispela op sisen resis bai go insait long namba 5 yia bilong em olgeta long dispela yia.

Bihain long dispela laspela bikpela AGM bilong ol long Oktoba 6 long Sir Donald Cleland Pul, ol samting i stap

aninit em ol i pasim na fainelaisim pinis.

Dei bilong dispela bikpela op sisen lig resis long kirap em Novemba 5 em i stap olsem tupela wik long nau.

Deit bilong opim dispela resis em long Novemba 2 long Fonde na deitlain bilong ol klab afiliesen fi em long Oktoba 31 na fi em wankain yet olse long las yia K100. Tasol ol pilaia registresen fi em i go antap long K2. Rejsitresen fi bipo em

K5 na nau i go antap K7 long wanem insurens bilong wanwan pilai em K2 bai i go long Pepsi Asosiesen.

Long resis bilong dispela yia, i gat sampela moa tim i tokaut olsem ol tu bai laik joinim tasol i no klia gut yet na i luk olsem 15-20 tim i redi tasol long pilai long dispela resis.

Narapela bikpela miting gen bai kamap long Oktoba 28 na dispela em bai toktok long stretim na pinisim olgeta samting




• Das kirap long Unagi Lig ragbi resis.



● Kumul kepten Adrian Lam i sanap wantaim ol sampela sapota bilong em bihain long ol Kumuls i kam: bek long Wol Kap long Inglen.

WANTOK Ragbi Lig Nius posta

JAMES KOPS - KUMUL WINGER




WANTOK Ragbi Nius

TOP

Amamas bilong ol manmeri long tim bilong yumi, "Kumuls"



• David Westley tu i bin painim hatpela taim stret long sainim nem bilong em long lek bilong wanpela mangi.



• Kumul kepten Adrian Lam i sainim pepa bilong ol sumatin bilong Yunivesiti.



• Tripela Kumuls fowat Tiuyo Evei, Max Tiri na Samuel Pinpin i sanap wantaim ol sumatin long Yunivesiti.



• Kumul huka Elias Paiyo i kisim bikpela sapot tru long ol wan-pisin bilong em long Yunivesiti.



• Kumul senta Marcus Bai i bungim ol lain femeli bilong em long Jacksons ples balus long Mosbi.



• Sampela bilong ol sumatin long Yunivesiti husat i bin bung long lukim ol PNG Kumuls taim ol i go raun lonh hap long las wik.



• Dispela em tim bilong ol Hebou Panthers long Unagi Op Sisen Lig.



• Dispela em tim bilong ol mangi 5 Mile Nogats long Unagi Op Sisen Lig resis long Mosbi.




• Wanpela pilai bilong 5 Mile Nogats i laik ranawe long ol Boroko Eels.

MOA UNAGI LIG EKSEN POTO


OL POTO: IVAN BAYAGAU



• Baga nogut ya bilong Makana i laik ranawe egensim ol 3-4 Mile long bikpela pilai bilong ol long las wiken



• Wapela 3-4 Mile pilai i kisim wapela bal na redi long ron. Dispela em long Unagi Op Sisen Lig long Mosbi.




• Wapela pilaia bilong East Boroko Eels i pasim bal i go long poroman bilong em long Unagi Lig resis.



• Baga nogut ya bilong 3-4 Mile Sharks i redi long autim bal i go long poroman bilong em. Oi i pilaia egensim ol Makana long Unagi Op Sisen Lig.



• Taim Nogut. Wapela Makana pilai i givim skisti tasol em i no nap abrusim dispela 3-4 Mile pilaia.



• Dispela 5 Mile Nogats pilaia i laik abrusim wapela East Boroko pilaia.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.